

# TUTÚ NÍ CADÚHA TÉ PĀBLÚ QUÍHÍ<sup>n</sup> NDAHA ÑÁYIU ÑUÚ RÒMÁ

---

**Té Pāblú cādūha-dé tutú quíhí<sup>n</sup> ndaha ñáyi  
xíndecu ichi Xítohá Jesucristú ndécú ñuú Rómá**

**1** Yúhú té Pāblú xínú cuèchi-í núú Xítohá Jesucristú, chi mee Yă Ndiöxí ní cachí-gá sá cúu-í ñ<sup>n</sup> tée cáhá<sup>n</sup> tnúhu-gá núú ñáyi, te tnúhu-gá cúu-xí tnúhu sá cāhá<sup>n</sup> nācuāa naníhí tǎhú-ó, núu diu-gá ní tendaha ñāha-gá xii-í xicá cūu-í cāhá<sup>n</sup>-í tnúhu-gá.

**2** Te ndée sanaha ñí cachí Yă Ndiöxí sá dācuítí sàá nduu ngūndecu ndíhi ñáyi tnúhu-gá. Te duca<sup>n</sup> ñí xāha<sup>n</sup>-gǎ xii cue tée ní cáhá<sup>n</sup> tnúhu-gá dāvā-á<sup>n</sup> ñí chídó tnùn-í-güedé núú tütú-gá. **3** Te tnúhu-gá sá cāhá<sup>n</sup>-í-a cāhá<sup>n</sup>-xi diu-ni cuendá Xítohá Jesucristú Yaá cúu Dēhe-gá. Te Dēhe-gá-á<sup>n</sup> cúu-gǎ ñ<sup>n</sup> ñáyi, te cūu-gá ñaní tñáhá ndíi Dāví. **4** Te cūu-gá Yaá ñá túu tñáhí cuéchi-xi. Te ní xíhí-gá te ní ndoto-gá, te xǎ<sup>n</sup> cútnùn-í iní-ó sǎ cúu-gǎ Dēhe Yă Ndiöxí, te ío cāhnu cuu-gá. **5** Te diu-ni Xítohá Jesucristú ní quide-gá ní nduu tǎhù-í núú Yă Ndiöxí sá cāhá<sup>n</sup>-í tnúhu-gá núú cuè ñáyi ñuyíú-a cuendá quíndáá iní-yu tnúhu-gá te canchicú<sup>n</sup> nihnú-yu cadá-yu nchaa nācuāa cāhá<sup>n</sup>-xi, te duca<sup>n</sup> ío cuu cāhnu-gá. **6** Te tñáhá nchòhó cúu-ndó ñáyi sa nchícú<sup>n</sup> nihnu quide-ndo nchaa nācuāa cāhá<sup>n</sup> tnúhu-á<sup>n</sup>, chi ní cachí Yă Ndiöxí sá nchòhó tñáhá tnúhu-ndo ndíhi Xítohá Jesucristú. **7** Te nchòhó ñáyi xíndecu ñuú Rómá, ñáyi ío cūu iní ñáhá Yă Ndiöxí, cādúha-í tutú-a daquixi-í ndaha-ndo. Te diu-ni nchòhó cúu-ndó cuè ñáyi ní cachí Yă Ndiöxí cada ndáá cundecu-ndo ñúú-gǎ. Te xicá<sup>n</sup> tǎhù-í núú Tǎtá-ó Dütú Ndiöxí ndíhi núú Xítohá Jesucristú sá ío na chindee chitúu ñaha-gǎ xii-ndo, te duca<sup>n</sup> ndí nduú-gá ná cāda te ío váha cuu iní-ndó cūndecu-ndo.

**Té Pāblú cuín-í-dé quíhí<sup>n</sup> ngoto-dé cue ñáyi  
xíndecu ichi Xítohá Jesucristú ndécú ñuú Rómá**

**8** Te díhna nuu-gǎ cāchí tnúhu-í xii-ndo sǎ ío ndácá<sup>n</sup> tǎhù-í núú Yă Ndiöxí cuendá sá ío sāndáá iní-ndó-gǎ, te nchaa ñáyi nihí-yu tnúhu sá dúcá<sup>n</sup> quide-ndo. Te Xítohá Jesucristú dáyāha-gá nchaa tnúhu cāhá<sup>n</sup>-í núú Yă Ndiöxí. **9** Te ndí tñáhá òré cāhá<sup>n</sup> ndíhi-í Yă Ndiöxí duca<sup>n</sup>-ni xicá<sup>n</sup> tǎhù-í

núú-gă cuendá-ndó, te mee-gă náhá-gă sá cãhá<sup>n</sup> ndáá-í, te ñiu-ni núú-gă xínú cuèchi-í ni yùhu ni iní-í, chi cãhá<sup>n</sup>-í nàcuáa ní quide Déhe-gá Xítóhó Jesucrístú cuendá naníhí tàhú-ó. **10**Te xicá<sup>n</sup> táhù-í núú Yă Ndiöxí sá nñu mee-gă ná cãchí te sáá ñ<sup>n</sup> nduu quixi coto ñaha-í xii-ndo. **11**Chi ío cuiní-í cundecu ndihi ñaha-í xii-ndo dãnehé ñáhà-í ñ<sup>n</sup> úú tnúhu nàcuáa ío-gá chindee ñaha Espíritú Yă Ndiöxí xii-ndo, te duca<sup>n</sup> ño-gá cuita nducu ndèe-ndo cada-ndo nchaa nacuáa cuiní-gá. **12**Te ío chí ná cuãha tnàha-o tnúhu ndee ñí cundecu-o ñchi-gá, chi nchòhó ndihi yúhú ío sàndáá iní-ó-gă.

**13**Te nchòhó ñáyiu ndècu ndihi-í ichi Xítóhó Jesucrístú na cãchí tnúhu-í xii-ndo sã dúcá<sup>n</sup>-ní ño sàni iní-í quixi coto ñaha-í xii-ndo. Te cuiní-í sá òrè quixi coto ñaha-í xii-ndo, te vá cuíta chiú<sup>n</sup> quixi-í dàtná quidè-í òrè sãngoto-í nchaa ñáyiu dava-gá ñuú ñá túú xíta chiú<sup>n</sup>-í chi ío váha sàhúu<sup>n</sup>-yu tnúhu cãhá<sup>n</sup>-í, dico ñá ndácù-í quixi-í quixi coto ñaha-í xii-ndo. **14**Te yúhú yídiquè-í cãhá<sup>n</sup>-í tnúhu Xítóhó Jesucrístú núú nchàa ñáyiu cãhá<sup>n</sup> tnúhu grìégú, ndihi núú nchàa ñáyiu cãhá<sup>n</sup> dava-gá núú tnúhu, ndihi núú nchàa ñáyiu túha, ndihi núú nchàa ñáyiu ñá túú túha. **15**Te cuendá sá dúhá yídiquè-í cãhá<sup>n</sup>-í tnúhu-gá, xíá<sup>n</sup> ío cuiní-í danèhé ñáhà-í xii nchaa nchòhó ñáyiu ñuú Rómá nàcuáa ndùu tnúhu sá cãhá<sup>n</sup> nàcuáa naníhí tàhú-ó.

### Ío cùnuu tnúhu Xítóhó Jesucrístú

**16**Te yúhú ñá túú tnàhí cùcaha<sup>n</sup> núú-í cãhá<sup>n</sup>-í tnúhu Xítóhó Jesucrístú, chi cùu-xi tnúhu ío cùnuu, chi Yá Ndiöxí ní cachí-gá sá ncháá ñáyiu na quìndáá iní-xi tnúhu-á<sup>n</sup> te naníhí tàhú-yu. Te ní cachí-gá sá dñhnanuu-gă ñáyiu isràél ngúndecu ndihí-yu tnúhu-á<sup>n</sup> te dàtnùní ngúndecu ndihi ñáyiu ñá túú cùu ñáyiu isràél. **17**Te tnúhu-á<sup>n</sup> dãnèhé ñáhà-xí xii-o sá cúdiú-o núú Yă Ndiöxí te núu mee-ni sã quìndáá iní-ó-gă dàtná cãhá<sup>n</sup>-xi núú tùtú-gá núú cãchí-xi: “Nchaa ñáyiu sàndáá iní ñáhà xii Yá Ndiöxí cúdiú-yu núú-gă, te ndècu ndihi ñahá-yu xii-gá”, duha cãchí-xi núú tùtú-gá.

### Nchaa ñáyiu ndècu ñuyíú ndècuéchi-yu

**18**Te ndéé andiu tëndaha Yá Ndiöxí sá ùhú quixi sá cúú-xí nchàa ñáyiu ñá túú quide ndáá núú-gă, ñáyiu quide nchaa sá cuèhé sá dúhá. Te cuendá nchaa sá quidè-yu-á<sup>n</sup> xíá<sup>n</sup> ñá túú cuiní-yu tnúhu-á<sup>n</sup> tnúhu ndáá tnúhu Yá Ndiöxí cuendá cuu-xi ñ<sup>n</sup> sá vãha sá cúú-xí-yu. **19**Te cuèi duca<sup>n</sup> quidè-yu dico cùnùní ndáá iní-yu nàcuáa ndùu sá sání ñí Yă Ndiöxí ndihi nàcuáa ndùu sá quidè-gă dàtná cùnùní iní nchaa dava-gá-yu, chi ñiu-gá dãnèhé ñáhà-gă xii-yu. **20**Te ni vã ndácú-ó quini núú-ó nãsa cãa-gá, te ni vã ndácú-ó quini-ó nãsa cãa iní-gá, te ni vã ndácú-ó quini-ó nãsa quide-gá táxí

tnùní-gá nchaa nduu nchaa quíú. Te cuèi duca<sup>n</sup> dico ndéé cútnàhá ní ngáva ñuyíú ní ngúíta nchaa ñáyiú tècú tnùní váha-yu nàcuáa ndùu sá sání iní-gá ndihi nàcuáa ndùu sá quidé-gă te duca<sup>n</sup> tècú tnùní-yu cuendá nchaa sá ní cadúha-gá ndéhě-yu íó ñuyíú-a, núu xíă<sup>n</sup> vá cächí-yu sá ñà túú cuèchi-yu. **21**Te cuèi duca<sup>n</sup> ní cutnùní iní-yu cuendá Yă Ndiöxí dico ñà túú cuiní-yu canehé-yu sá yíñuhu núú-gă nàcuáa tàú-xi cunduu. Te ni ñà túú cuiní-yu ndacá<sup>n</sup> táhũ-yu núú-gă cuendá nchaa sá vâha quide ñaha-gá xií-yu, chi mee-ni nchâa sá ñà túú vëdana nândíhi ñuhu iní-yu. Te quidé-yu dàtná quidé ì<sup>n</sup> ñáyiú ñà túú ndècu ndihi nchaa sá xíní tnùní-xi. Te uu<sup>n</sup>-gá uu<sup>n</sup>-gá tá quidé-yu cuáhá<sup>n</sup>. **22**Te cächí-yu sá cúũ-yu ñáyiú íó váha sâá sá xíní tnùní-xi dico ñà ndâá, chi cùú-yu ñáyiú íó ñi dǐquí-xi. **23**Te ñà túú cuiní-yu cáhá<sup>n</sup>-yu sá ío cãhnu cuu Yá Ndiöxí Yaá ndécú nchâa nduu nchaa quíú, chi da nchaa sá ní cadúha mée-yu quide cahnú-yu. Te ní cadúha-yu nchaa sá nâhá ñáyiú ñà túú cùdíí ndècu ñuyíú-a. Te ní cadúha-yu sá nâhá quiti ndàva, ndihi sá nâhá quiti sàcuíta ñuhu mee-xi, ndihi sá nâhá nchaa dava-gá quiti, nchaa xíă<sup>n</sup> quidé cãhnú-yu.

**24**Te xíă<sup>n</sup> núu ní dáñá Yă Ndiöxí quidě-yu nchaa sá cuèhé sá dúhá sàni iní-yu. Te xíă<sup>n</sup> íó quide ndihi tnahá-yu sá cuèhé sá dúhá sàcúú-xí yèqui cuñú-yu. **25**Te duca<sup>n</sup> quidé-yu chi ñà túú sândáá iní-yu tnúhu ndáá tnúhu Yá Ndiöxí. Te mee-ni tnúhu ndehnde sândáá iní-yu, te nèhé-yu sá yíñuhu núú dâva sá ní cadúha-gá íó ñuyíú-a ndihi dava sá ndèé andiu te quide cahnú-yu, te ñà túú cächí-yu sá mée-gă ío cãhnu cuu-gá, dico mee-gă xíní ñuhu-xi cáhá<sup>n</sup>-yu sá ío cãhnu cuu-gá ni caa ni quíh<sup>n</sup>. Te ndáá ndisa sá ío cãhnu cuu-gá.

**26**Te sá dúcá<sup>n</sup> ñà túú quide váha-yu núu xíă<sup>n</sup> ní dáñá-ñă Yă Ndiöxí quidě-yu nchaa sá cuèhé sá dúhá sàni iní mée-yu. Te dava ñáyiú ðíhí cãhá<sup>n</sup> ndihi tnâhá-yu ndi mée ðíhí-yu te ñà túú quidé-yu nàcuáa ní nduu táhũ-yu cadá-yu. **27**Te ðiu-ni duca<sup>n</sup> xǐquide dava cue téé chi sàni cuehé sání dùha iní-güedé sá cúú-xí yèqui cuñú-güedé ndi mée tnaha téé-güedé, chi cãhá<sup>n</sup> ndihi tnâha ndi mee-güedé te ñà túú quide-güedé nàcuáa ní nduu táhũ-güedé cada-güedé, te sá dúcá<sup>n</sup> quide-güedé te ñà túú tnâhí cùu váha iní-güedé ndécú-güedé, te duca<sup>n</sup> tnâhí tàú-xi ndoho-güedé cundecu-güedé.

**28**Te ñà túú tnâhí ñuhu iní-yu Yá Ndiöxí núu xíă<sup>n</sup> duu<sup>n</sup> duu<sup>n</sup> ní dáñá ñihnu ñaha-gá xií-yu sàni cuehé sání dùha iní-yu, te quidé-yu nchaa sá ñà túú tàú-yu cadá-yu. **29**Te nchaa núú sã cuèhé sá dúhá cùnuu quidé-yu. Te cue téé cãhá<sup>n</sup> ndihi-güedé ñáyiú ðíhí te ñà díú ñàðíhí-güedé cúũ-yu. Te ðiu-ni duca<sup>n</sup> xǐquide cue ñáyiú ðíhí chi cãhá<sup>n</sup> ndíhí-yu cue téé te ñà díú yè-yu cùu-güedé. Te mee-ni sã ñà túú vâha quidé-yu sá cúú-xí tnâha ñáyiú-yu, te xihó-yu cundecu ndíhí-yu sá ndécú ndihi dava-gá tnâha ñáyiú-yu, te ío sàni cuehé sání dùha iní-yu sá cúú-xí tnâha ñáyiú-yu, te ío

cuédú ínĭ-yu, te sàhni tnahá-yu, te ío plètú-yu, te dándahú tnáhă-yu, te cùu úhú ínĭ-yu cue tnàha ñáyĭú-yu, te ío yĭti yùhú-yu. <sup>30</sup>Te càhá<sup>n</sup> cuèhé-yu cuèndá nchaa dava-gá tnàha ñáyĭú-yu, te cùu úhú ínĭ-yu Yá Ndiöxí, te xio xio cuĭní-yu cunuu tnúhu-yu, te mee-ni sàni ínĭ-yu sá ĩo váha cunduú-yu, te ío quĭde cahnú-yu mèé-yu, te ío sàni ínĭ-yu sá cádá úhú-yu tnàha ñáyĭú-yu, te ñá túú sàndáá ínĭ-yu ni tătă-yu ni nănă-yu. <sup>31</sup>Te ñá túú tècú tnùnĭ-yu sá vâha, te ñá túú quĭdé-yu ĩĭ<sup>n</sup> sá càhá<sup>n</sup>-yu, te ñá túú cùu ínĭ-yu ñi ñáyĭu cùu ndi meé-yu, te ni dàva-gá tnàha ñáyĭú-yu, te ñá túú quĭde cahnu ínĭ-yu ĩĭ<sup>n</sup> sá cúmăní nŭú tnáhă-yu, te ni ñà túú cùndahú ínĭ-yu tnàha ñáyĭú-yu. <sup>32</sup>Te Yá Ndiöxí ní cachĭ-gá sá ncháá ñăyĭu duca<sup>n</sup> xĭquĭde quĭhĭ<sup>n</sup>-yu núú ùhú núú ndàhú. Te xĭní-yu sá Yă Ndiöxí daquĭhĭ<sup>n</sup> ñáhă-gă xĭĭ-yu núú ùhú núú ndàhú sá dúcá<sup>n</sup> quĭdé-yu, dico uu<sup>n</sup>-gá quĭdĕ-yu chi váha-gá cúú ĩní-yu cue ñáyĭu quĭde datná quĭdé mèé-yu.

**Yá Ndiöxí cada ndáá-gá cuéchi nchaa ñáyĭu ndècu ñuyĭú**

**2** <sup>1</sup>Te nchòhó ñáyĭu càchĭ sá ĩo ndècu cuéchi dava-gá ñáyĭu tnàhá-ndó ĩo ndècu cuéchi-ndo cuĕi nágá ñáyĭu cùu-ndo, chi tnàhá-ndó quĭde-ni-ndo nchaa nacuáa quĭde dava-gá ñáyĭu càchĭ-ndó ndècu cuéchi-xi, te sá dúcá<sup>n</sup> càhá<sup>n</sup>-ndó să ndécú cuĕchi ñáyĭu-á<sup>n</sup> te dàcaa-ndo cuéchi díquí-ndó chi tnàhá-ndó quĭde-ndo datná quĭdĕ-yu. <sup>2</sup>Te nchoo xĭní-ó să Yă Ndiöxí ío váha cùtnunĭ ínĭ-gá nàcuáa cada ndáá-gá cuéchi ĩĭ<sup>n</sup> ĩĭ<sup>n</sup> nchoo ñáyĭu ndècu ñuyĭú-a, chi daquĭhĭ<sup>n</sup>-gá nchaa ñáyĭu quĭde nacuáa ní cáhá<sup>n</sup>-í núú ùhú núú ndàhú. <sup>3</sup>Te nchòhó ñáyĭu ĩĭ<sup>n</sup>-ni quĭde ndĭhi ñáyĭu càchĭ méé-ndó să ndécú cuĕchi-xi dacuitĭí să ná chăhu-ndo nŭú Yă Ndiöxí sá dúcá<sup>n</sup> quĭde-ndo. <sup>4</sup>Te ñá túú cùu váha ínĭ-ndó să Yă Ndiöxí cùndàhú ínĭ ñáhă-gă xĭi-ndo, te ni ñà túú cùu váha ínĭ-ndó să ĩo cuĭní-gá cada cahnu ínĭ-gá nchaa sá ñà túú vâha quĭde-ndo, te ni ñà túú quĭde cuendá-ndó să Yă Ndiöxí quĭdé vâha ñaha-gă xĭi-ndo cuèndá cuĭní-gá sá nchòhó ndĭxi túu ínĭ-ndó să ñà túú quĭde váha-ndo ndècu-ndo. <sup>5</sup>Te nchòhó cúú-ndó ñáyĭu ío sàá ínĭ-xi, chi ñá túú cuĭní-ndó ndĭxi túu ínĭ-ndó să ñà túú quĭde váha-ndo ndècu-ndo, te xĭă<sup>n</sup> nŭu ío-gá tá cùu vai tnúndòho sá cúú-xĭ-ndó. Te na sàá nduu tnúhu ndòho tnúhu ndàhú te ío ndoho-ndo, chi Yá Ndiöxí cada ndáá-gá nàcuáa ndùu cuéchi-ndo. <sup>6</sup>Te dàvá-á<sup>n</sup> cada ndáá Yă Ndiöxí nchaa nàcuáa ndùu nchaa sá ñĭ quĭde ĩĭ<sup>n</sup> ĩĭ<sup>n</sup> ñáyĭu ndècu ñuyĭú-a. <sup>7</sup>Te nchaa ñáyĭu nchĭcú<sup>n</sup> nihnu-ni quĭde mee-ni sá vâha, ñáyĭu-á<sup>n</sup> nduu táhŭ-yu cundecú-yu ndĭhi Yá Ndiöxí ni caa ni quĭhĭ<sup>n</sup>, te duca<sup>n</sup> quĭde váha-yu chi cuĭní-yu sá Yă Ndiöxí cuu váha ínĭ ñáhă-gă xĭĭ-yu, te cuĭní tucú-yu nduu táhŭ-yu núú ĩo váha càa ndecu Yá Ndiöxí cundecú-yu ni caa ni quĭhĭ<sup>n</sup>. <sup>8</sup>Te ío cùdĕé<sup>n</sup>-gă núú nchàa ñáyĭu ñùhu ínĭ mee-ni să cúú-xĭ mèe-xi, te ñá túú sàndáá ínĭ-yu tnúhu ndáá chi mee-ni să cuèhé sá dúhá quĭdé-yu. <sup>9</sup>Te nchaa

ñáyiú duca<sup>n</sup> xiquide ío ndíhú iní-yu. Te díhna-gá ñáyiú isràél ngüíta-xi ndohó-yu, te dătnùní ngüíta-xi ndoho nchaa ñáyiú ñá túú cùu ñáyiú isràél. **10**Te nchaa ñáyiú ní quide váha, te Yá Ndiöxí cada-gá te ngúndecú-yu núú ïo váha càa ndecu-gá, te cachí-gá sá ñí quide váha-yu, te ío váha cuu iní-yu cundecú-yu. Te díhna-gá ñáyiú isràél ñáyiú ní quide váha duca<sup>n</sup> càda ñaha-gá xií-yu, te dătnùní duca<sup>n</sup> càda ñaha-gá xii ñáyiú ñá túú cùu ñáyiú isràél ñáyiú ní quide váha.

**11**Te ñá túú quide cuendá-gá cuèi náí ñáyiú cùú-yu. **12**Te nchaa ñáyiú ndècu ndíhi nchaa tnúhu ní chídó tnùní ndíi Moisés, Yá Ndiöxí cada ndáá-gá cuéchi-yu năcuáa càhá<sup>n</sup> nchaa tnúhu-á<sup>n</sup>. Te nchaa ñáyiú ñá túú ndècu ndíhi tnúhu ní chídó tnùní ndíi-á<sup>n</sup>, Yá Ndiöxí vá cáda ndáá-gá cuéchi-yu năcuáa càhá<sup>n</sup> nchaa tnúhu-á<sup>n</sup>. Dico nchaa ñáyiú quide nândi sá cuèhé sá dúhá dăcuitíí cuíta nihnú-yu cuèi ndècu ndíhi-yu tnúhu ní chídó tnùní ndíi Moisés àdi ñá túú ndècu ndíhi-yu. **13**Te nchaa ñáyiú dícó-ni sàcúndedóho nchaa tnúhu ní cáhá<sup>n</sup> ndíi Moisés te ñá túú tnèi-yu, ñáyiú-á<sup>n</sup> ñà túú cùdiú-yu núú Yă Ndiöxí, dico nchaa ñáyiú tnèi nchaa tnúhu ní cáhá<sup>n</sup> ndíi, ñáyiú-á<sup>n</sup> càchí Yă Ndiöxí sá cúdiú-yu núú-gă, chi ñá túú-gă cuéchi-yu ndècu núú-gă. **14**Te nchaa ñáyiú ñá túú ndècu ndíhi tnúhu ní chídó tnùní ndíi Moisés, te núu quidé-yu nchaa năcuáa ní cáhá<sup>n</sup> ndíi te cùu-xi ïi<sup>n</sup> sá sání tnàhí iní mēē-yu cadá-yu, te sá sání iní-yu-á<sup>n</sup> cúú-xí ïi<sup>n</sup> tnúhu váha sá sánú ìchi ñaha xií-yu năcuáa cada váha-yu cundecú-yu. **15**Te sá dúcá<sup>n</sup> quidé-yu xíă<sup>n</sup> cútnùní sá sání iní-yu dătná càhá<sup>n</sup> tnúhu ní chídó tnùní ndíi Moisés cada ñáyiú isràél, te ío váha cùtnuní iní-yu nchaa năcuáa quidé-yu chi ndixi túu iní-yu òré ñá túú quide váha-yu. **16**Te sáá nduu te Yá Ndiöxí cúñaha-gă xii Xítohó Jesucristú cada ndáá-gá nchaa cuéchi ñáyiú, nchaa sá sání iní mēē-yu ndùu yuhu, te cada-gá dătná càhá<sup>n</sup> tnúhu sá sánú ìchi ñaha xii-o năcuáa naníhí tàhú-ó, tnúhu sá dănèhé ñáhà-í xii-ndo.

**Cuendá ñáyiú isràél ndíhi cuendá nchaa tnúhu ní chídó tnùní ndíi Moisés**

**17**Te nchòhó ñáyiú isràél nchaa-ndo cùu-ndo ndi mee-í, te càchí-ndó să nchìcú<sup>n</sup> nihnu-ndo quide-ndo nchaa tnúhu ní cáhá<sup>n</sup> ndíi Moisés nūu xíă<sup>n</sup> ndécú văha-ndo, te càchí-ndó să ïo càhnu cuu-ndo sá ndécú ndíhi-ndo Yá Ndiöxí. **18**Te cùtnuní iní-ndó nchàa năcuáa cuíní Yă Ndiöxí cada-ndo, te sá dúcá<sup>n</sup> nchìcú<sup>n</sup> nihnu-ndo quide-ndo năcuáa càhá<sup>n</sup> tnúhu-á<sup>n</sup> xíă<sup>n</sup> cútnùní iní-ndó nchàa sá ïo-gá váha xìni ñuhu-xi cada-ndo. **19**Te càchí-ndó să ïo váha xìní-ndó cànuichi-ndo nchaa ñáyiú ñá túú cùtnuní iní-xi, te càchí tucu-ndo să ïo váha xìní-ndó nà canu ichi-ndo nchaa ñáyiú ndècu ichi cuehé ichi duha. **20**Te sànu ichi-ndo nchaa ñáyiú ío ñi dīquí-xi, ndíhi nchaa ñáyiú vitna ta tècú tnùní nchaa sá văha, te duca<sup>n</sup> quide-ndo chi ndècu ndíhi-ndo nchaa tnúhu ní chídó tnùní ndíi Moisés, te tnúhu-á<sup>n</sup>



cúu-xí tnũhu ndáá, chi sànu ichi ñaha-xi xii-ndo nacuaáa cada-ndo. **21**Te nchòhó dàcuaha-ndo ñáyiù nàcuáa cada-yu, te mee-ndo ñà túú dàcuaha-ndo cada-ndo nchaa nacuaáa tàú-xi cunduu, te xãha<sup>n</sup>-ndo xií-yu sá vã cúú dùhú-yu te mee-ndo dùhu-ndo. **22**Te dàcuaha-ndó-yu sá cuè téé vá cúú cãhá<sup>n</sup> ndihí-güedé ñáyiù ðihí te núu ñá díú ñàðihí-güedé cúu-yu, te duca<sup>n</sup>-ni cuè ñáyiù ðihí, vá cúú cãhá<sup>n</sup> ndihí-yu téé te núu ñá díú yíi-yu cùu-güedé. Te nchaa sá xãha<sup>n</sup>-ndo vã cúú càda ñáyiù te mee-ndo quide-ni-ndo, te xãha<sup>n</sup>-ndo xií-yu sá vã cànèhé-yu sá yíñũhu núú nchàa sá cãchí-yu cùu ndiòxí-yu, te mee-ndo nèhé-gá quidé-ndó, chi dùhu-ndo nchaa sá ndécú vèñũhu. **23**Te cãchí-ndó sã ío cùnũu nchaa tnũhu ní chídó tnùnì ndíi Moisés, te ñá túú quide-ndo nchaa nacuaáa ní cãhá<sup>n</sup> ndíi, te sá dúcá<sup>n</sup> quide-ndo-á<sup>n</sup> te dàquee tñhú-ndó Yã Ndiòxí. **24**Te quèe ndáá-xi nàcuáa cãhá<sup>n</sup>-xi núú tùtú Yã Ndiòxí nàcuáa quide-ndo-á<sup>n</sup> nũú cãchí-xi sá ncháá ñáyiù ñá túú cùu ñáyiù isràél cãhá<sup>n</sup> cuèhé-yu cuèndá Yã Ndiòxí sá cuèndá-ndó.

**25**Te nchòhó ñáyiù isràél nchaa-ndo cùu-ndo ndi mee-í, te tnàhá-ndó ndècu ndihí-ndo seña ñii-ndo, te váha-ni sá dúcá<sup>n</sup> te núu quide-ndo nchaa nacuaáa ní cãhá<sup>n</sup> ndíi Moisés. Dico núu ñá túú quide-ndo nchaa nacuaáa ní cãhá<sup>n</sup> ndíi ña, te ñá túú nàndíhi-xi sá cúú-ndó ñáyiù isràél cuèi ndècu seña ñii-ndo. **26**Te nchaa ñáyiù ñá túú ndècu ndihí seña ñii-xi, te núu quidé-yu nchaa nàcuáa ní cãhá<sup>n</sup> ndíi Moisés, te cùu-yu dàtná cue ñáyiù ndècu ndihí seña ñii-xi, chi quidé-yu nchaa nàcuáa ní cãhá<sup>n</sup> ndíi. **27**Te ñáyiù ñá túú ndècu ndihí seña ñii-xi, te núu na càdá-yu nchaa nàcuáa ní cãhá<sup>n</sup> ndíi Moisés, te ñáyiù-á<sup>n</sup> cãchí-yu sá ñà túú quide ndáá nchaa nchòhó ñáyiù ndècu ndihí seña ñii-xi, chi ndècu ndihí-ndo nchaa tnũhu ní chídó tnùnì ndíi te ñá túú quide-ndo nacuaáa cãhá<sup>n</sup> tnũhu-á<sup>n</sup>. **28**Te nchòhó ñáyiù isràél, ñáyiù nchìcú<sup>n</sup> nihnu-ni quide nchaa nacuaáa ta quide tnahi-ndo véxi, ñá túú quide-ndo sá cúú-ndó ñáyiù isràél, te mee-ndo ndècu seña ñii-ndo dico ñá túú quide-ndo nacuaáa tàú-xi cada nchaa ñáyiù ndècu seña ñii-xi, te mee-ni sèñá-á<sup>n</sup> sãha-ndo ñii-ndo te ñá túú quide-ndo nacuaáa cuèní Yã Ndiòxí cada-ndo. **29**Te nchaa ñáyiù sàndáá ndisa iní-xi Yá Ndiòxí, ñáyiù-á<sup>n</sup> cúú ndisá-yu ñáyiù isràél, te sa ní nduu ndoo ní nduu nine iní-yu chi Espiritú Yã Ndiòxí duca<sup>n</sup> nĩ quide-xi, dico ñá díú sã sãha-yu sèñá ñii-yu dàtná ní cãchí ndíi Moisés. Te ñáyiù-á<sup>n</sup> cúú vãha iní ñáhá Yã Ndiòxí xií-yu cuèi ñá túú cãhá<sup>n</sup> váha tnàha ñáyiú-yu cuèndá-yu.

**3**<sup>1</sup>Te sá dúhá cãhá<sup>n</sup>-í te ío dava ñáyiù quesàhá-yu sá íí<sup>n</sup>-ní cùu ñáyiù ñá túú cùu ñáyiù isràél ndihí nchoo ñáyiù isràél, te quesaha tùcú-yu sá íí<sup>n</sup>-ní quide tucu-xi cuèi na cuãha àdi vá cuãha seña ñii-yu. <sup>2</sup>Dico yúhú cãchí-í sá ncháá ñáyiù isràél ío-gá cúnùu-yu, chi ío titní núú sã vãha ní quide ñaha Yã Ndiòxí xií-yu, chi ní sãñaha-gã tnũhu-gá ndécú ndihí-yu.

**3**Te davá-yu ñá túú cuíní-yu cada ndáá-yu, dico ñá díú sǎ xǎ<sup>n</sup> te cùyica iní Yǎ Ndiöxí ñá túú quide ndáá-gá. **4**Dico ñáhá chi xìni ñuhu-xi sá ncháá ñáyiú cada cuèndá-yu sá Yǎ Ndiöxí cúú-gǎ Yaá quidé ndáá cuíti, te cuèi ncháá-yu na càchí-yu sá ñà túú quide ndáá-gá, dico mee-gǎ chi quide ndáá-ni-gá. Te núú tütú-gá càhá<sup>n</sup>-xi nàcuáa ní xáha<sup>n</sup> ì<sup>n</sup> téé ní xíndecu ndéé sanaha xii-gá, te duha ní xáha<sup>n</sup>-dě:

Yòhó Dútú Ndiöxí, cùtnuní iní ñáyiú sá ìo ndáá càhá<sup>n</sup>-n,  
te cùnuu nahi-ni tnúhu-n cuèi òré càchí ñáyiú sá ñà túú càhá<sup>n</sup>  
ndáá-n.

Duha ní xáha<sup>n</sup> tée ndéé sanaha-ǎ<sup>n</sup> xii-gá càchí-xi núú tütú-gá.

**5**Te cuèndá nchaa sá cuèhé sá dúhá quide ñáyiú, xiǎ<sup>n</sup> cútnuní iní-yu sá Yǎ Ndiöxí cúú-gǎ Yaá ío váha quide ndáá, chi mee-gǎ ñá túú dùca<sup>n</sup> quide-gá. Te cuèi duca<sup>n</sup> dico vá cání iní-yu sá Yǎ Ndiöxí ñá túú quide ndáá-gá sá dándòho ñaha-gá xií-yu na sàá nduu, te núú duca<sup>n</sup> na càni iní-yu, te sàni iní-yu dàtná sání iní cue ñáyiú ñá túú ndècu ichi-gá. **6**Te vá dúcá<sup>n</sup> càni iní-yu, chi núú Yá Ndiöxí ñá túú quide ndáá-gá ñá, te vá cúú càda ndáá-gá nchaa cuèchi cue ñáyiú ñuyíú-a te núú duca<sup>n</sup>.

**7**Te núú yúhú ná càni iní-í cáhá<sup>n</sup>-í ì<sup>n</sup> tnúhu ndehnde, te sá tnúhu-á<sup>n</sup> te cani tucu iní-í sá quidé càhnu-gá-í tnúhu ndáá tnúhu Yá Ndiöxí, te sá dúcá<sup>n</sup> ná càhá<sup>n</sup>-í te cani tucu iní-í sá vǎ cúú càhá<sup>n</sup> Yǎ Ndiöxí sá ndécú cuèchi-í.

**8**Te núú na càni tucu iní-í sá vǎha-gá cada-í nchaa sá cuèhé sá dúhá cuèndá Yǎ Ndiöxí cada-gá sá vǎha, dico ñá ndáá. Te ìo ñáyiú càhá<sup>n</sup> cuèhé cuèndá-í te càchí-yu sá díú-ní dùca<sup>n</sup> dacuaha-í ñáyiú dico ñá ndáá sá dúcá<sup>n</sup> dànehé-í-yu, te ñáyiú-á<sup>n</sup> nacháhu-yu tnúhu càhá<sup>n</sup>-yu, chi duca<sup>n</sup> tàú-xi cunduu.

### Nchaa ñáyiú ñuyíú-a ndècuèchi-yu

**9**Te vitna càchí dava ñáyiú sá ìo-gá cúnùu nchoo cue ñáyiú isràél dàcúxí dàva-gá ñáyiú, dico yúhú càchí-í sá ñáhá, te sa ní cachí tnúhu ndáá-í xii-ndo sǎ nchàa ñáyiú ndècuèchi-yu cuèi ñáyiú isràél te cuèi ñáyiú ñá túú cùu ñáyiú isràél. **10**Te núú tütú Yǎ Ndiöxí càchí-xi:

Vá yǎo ì<sup>n</sup> quide ndáá,

**11** te ni vá yǎo ì<sup>n</sup> tècú tnùní tnúhu váha,  
te ni vá yǎo ì<sup>n</sup> nànducu nihnu Yá Ndiöxí.

**12** Chi ncháá-yu ñá túú nchìcú<sup>n</sup> nihnú-yu ichi váha, te ncháá-yu  
cùú-yu ñáyiú xíndecu neñùú sá cúú-xí Yǎ Ndiöxí.

Te ni ì<sup>n</sup>-yu ñá túú quidé-yu ì<sup>n</sup> sá vǎha.

**13** Te cada iní-ndó sǎ yúhú-yu cùu-xi datná cúú ì<sup>n</sup> yaú núú yíndüxi  
ndíyi núú ìo ndehe sàhá<sup>n</sup>,

te duca<sup>n</sup> sãtnahá-xi cùu yuhú-yu, chi ío càhá<sup>n</sup> cuèhé-yu, te mee-ni dândahú-yu nchaa tnàha ñáyíu-yu.

Te cada iní-ndó sã vènenú cóo yíhí yùhú-yu chi mee-ni càhá<sup>n</sup> úhú-yu cuèndá tnàha ñáyíu-yu.

14 Te ío iní-yu càhá<sup>n</sup> úhú tnáhă-yu.

15 Te àú<sup>n</sup> nă cuu àú<sup>n</sup> nă xiă<sup>n</sup> xĩsahni tnàhá-yu.

16 Te nchaa núú xícá cùú-yu quide úhú iní-yu nchaa tnàha ñáyíu-yu nàcuáa ndìhú iní ñáyíu-á<sup>n</sup>.

17 Te ñá túú cuiní-yu cundecu ndihi tnàha váha-yu.

18 Te ñá túú sàni iní-yu canehé-yu sá yĩñùhu núú Yă Ndiöxí.

Duha quidé-yu càchí-xi núú tütú-gá.

19 Te cùtnuní iní-ó sã nchaa tnúhu ní chídó tnùní ndíi Moisés cúú-xí cuèndá nchaa ñáyíu nchìcú<sup>n</sup> nihnu nchaa tnúhu-á<sup>n</sup>. Te tnúhu-á<sup>n</sup> cúú-xí cuèndá sá vă yõo tnàhí cachí sá ñà túú cuèchi-xi, te duca<sup>n</sup> te nchaandi túhú ñáyíu cutnùní iní-yu sá ná chăhu-yu nchaa sá quidě-yu núú Yă Ndiöxí.

20 Te duca<sup>n</sup> càda-xi chi ni ì<sup>n</sup> ñáyíu vá càchí-ó sã vă cùndècu cuèchi-yu núú Yă Ndiöxí cuèndá-ni sá nchìcú<sup>n</sup> nihnú-yu nchaa tnúhu sá ñi chídó tnùní ndíi Moisés, te tnúhu-á<sup>n</sup> càchí tnúhu-xi cuèndá-ni sá cùtnuní iní-ó sã ndécú-ó ìchi cuehé ichi duha.

### Te núu na quìndáá iní-ó Xítohó Jesucristú te naníhí tàhú-ó

21 Te vitna ní cutnùní iní-ó sã ñà díú sã cáda-ó nchaa nacuáa ní cáhá<sup>n</sup> ndíi Moisés cudíu-o núú Yă Ndiöxí, chi mee-gă quidé cùdíu-o núú-gă. Te núú tütú ndíi Moisés ndihi núú tütú cue téé ní xóo cáhá<sup>n</sup> tnúhu Yă Ndiöxí ndéé sanaha càhá<sup>n</sup>-xi nàcuáa cada ñaha-gă xii-o vitna. 22 Te duca<sup>n</sup> cùdíu-o núú Yă Ndiöxí te núu na quìndáá iní-ó Xítohó Jesucristú. Te díu-ni duca<sup>n</sup> cùdíu nchaa ñáyíu ñuyíú te núu na quìndáá iní ñáhă-yu xii-gá, chi ì<sup>n</sup>-ni cùu-o nchaa-o sá cúú-xí Yă Ndiöxí. 23 Chi nchaá-yu ndècu cuèchi-yu, chi ñá ì<sup>n</sup>-yu quidé-yu nàcuáa cáhá<sup>n</sup> Yă Ndiöxí sá cúú-yu ñáyíu quide váha. 24 Dico Yă Ndiöxí ío váha iní-gá chi ní quide ñaha-gă xii-o ì<sup>n</sup> sá văha, chi dícó-ni duca<sup>n</sup> ñi quide-gá nàcuáa vá cùndècu-gá cuèchi-o nùú-gă, chi Xítohó Jesucristú ní satì ñíñí-gă te ní xíhí-gá, te duca<sup>n</sup> ñi yáha-gá cuèndá sá vă cùndècu-gá cuèchi-o. 25 Te Yă Ndiöxí ní taxi ndecu-gá Xítohó Jesucristú núú ñáyíu ñuyíú-a, te ní xíhí-gá sá cuèndá nchaa yícá cuèchi-yu, te duca<sup>n</sup> ñi cuu cuèndá sá ncháá ñáyíu na quìndáá iní ñáhá xii-gá te vá náchăhu-yu cuèchi-yu núú Yă Ndiöxí. Te Yă Ndiöxí ní quide ndee ìní-gá nchaa sá cuèhé sá dúhá ñi quide cue ñáyíu ní xíndecu ndéé sanaha. Te xiă<sup>n</sup> ní xíhí Xítohó Jesucristú cuèndá cutnùní iní-ó sã Yă Ndiöxí cúú-gă Yaá ío váha quide ndáá cuèi duca<sup>n</sup> ñi quide ndee ìní-gá nchaa sá ñi quide cue ñáyíu-á<sup>n</sup>.

26 Núú xiă<sup>n</sup> vitna ní cutnùní ndisa iní-ó sã quidé ndáá-gá, te quide-gá sá



cuè ñáyiú vá cúndècu-gá cuéchi-yu núú-gă, te núu na quìndáá iní-yu Xítohó Jesucrìstú.

**27**Te vitna vá càchí-ó sǎ ìo càhnu cuu-o cuendá sá ñà túú-gă cuéchi-o ndècu núú Yă Ndiöxí, te duca<sup>n</sup> ñà túú-gă cuéchi-o ndècu núú-gă cuendá sá sàndáá iní-ó Xítohó Jesucrìstú, te ñá díú sǎ cuendá nchaa tnúhu ní cáhá<sup>n</sup> ndíi Moisés. **28**Te cùtnuní iní-ó sǎ ndèda-ni cà ñáyiú vá cúndècu-gá cuéchi-yu núú Yă Ndiöxí te núu na quìndáá iní-yu Xítohó Jesucrìstú cuèi ní quidé-yu nchaa nàcuáa ní cáhá<sup>n</sup> ndíi Moisés àdi ñá túú ní quidé-yu.

**29**Te cùtnuní iní-ó sǎ Yă Ndiöxí cúú-gă Ndiöxí nchaandi túhú ñáyiú, te ñá díú mèe-ni Ndiöxí ñáyiú isràèl cúú-gă. **30**Te ìi<sup>n</sup> dìi díi-gă cúú-gă Ndiöxí, te nchaa ñáyiú sàndáá iní ñáhá xii Xítohó Jesucrìstú te vá cúndècu-gá cuéchi-yu núú Yă Ndiöxí cuèi cùú-yu ñáyiú isràèl àdi ñá túú cùú-yu. **31**Te ñá díú sǎ sàndáá iní-ó Xítohó Jesucrìstú te cachí-ó sǎ ñà túú nàndíhi nchaa tnúhu sá sánú ìchi ñaha xii-o nacuáa cada-o, te ñáhá chi sá dúhá sàndáá iní-ó-gă te xǎ<sup>n</sup> nchìcú<sup>n</sup> nihnu-o quide-o nacuáa càhá<sup>n</sup> tnúhu-á<sup>n</sup>.

#### Cuèndá ndíi Àbrahám

**4** **1**Te vitna na càchí tnúhu-í xii-ndo cuèndá ndíi Àbrahám téé ní cuu ñaní tnáhá-ó ñí xíndecu ndéé sanaha. **2**Te ndíi-á<sup>n</sup> ñà túú ní xíndecu cuéchi ndíi núú Yă Ndiöxí, dico ñá díú cuèndá ìi<sup>n</sup> chiu<sup>n</sup> ní quide ndíi duca<sup>n</sup> ñà túú ní xíndecu cuéchi ndíi núú-gă. Chi núu cuèndá ìi<sup>n</sup> chiu<sup>n</sup> ní quide ndíi duca<sup>n</sup> ñà túú ní xíndecu cuéchi ndíi núú Yă Ndiöxí ñá, te cada càhnu ndíi mee ndíi ni cùu, dico ñá díú núú Yă Ndiöxí cada càhnu ndíi mee ndíi te núu duca<sup>n</sup> ñí quide ndíi. **3**Te chí dándàcu iní nàcuáa càhá<sup>n</sup>-xi núú tütú Yă Ndiöxí núú càchí-xi: “Té Àbrahám ní sàndáá iní-dé Yă Ndiöxí, te xǎ<sup>n</sup> ní cachí-gá sá cudìu-dé núú-gă”, duha càchí-xi núú tütú-gă. **4**Te sá cùhú<sup>n</sup> yǎhu ìi<sup>n</sup> téé quide chiu<sup>n</sup>, te vá càchí-ó sǎ xǎ<sup>n</sup> cúú-xí ìi<sup>n</sup> táhú sǎ cúú-xí-dě chi yáhu tnàhí-dé cúú-xí. **5**Te vá yóo ìi<sup>n</sup> ndàcu cada ìi<sup>n</sup> chiu<sup>n</sup> nacuáa cudìu-xi núú Yă Ndiöxí. Te ñá túú ñà chiu<sup>n</sup> xini ñuhu-xi cada ñáyiú te cudìú-yu núú-gă, chi xini ñuhu-ni-xi sá quìndáá-ni iní-yu-gá. Te diu-gá càchí-gá sá ñáyiú ndècu ichi cuehé ichi duha vá cúndècu-gá cuéchi-yu núú-gă, te núu na quìndáá iní ñáhă-yu xii-gá. **6**Te diu-ni duca<sup>n</sup> ñí cáhá<sup>n</sup> ndíi Dàvíí, chi ní cachí ndíi sá ìo váha táhú nchaa ñáyiú ní cachí Yă Ndiöxí cudìu núú-gă, dico ñá díú cuèndá ìi<sup>n</sup> chiu<sup>n</sup> quidé-yu cudìú-yu núú-gă. **7**Te duha ní cachí ndíi:

Váha táhú nchaa ñáyiú quide cahnu iní Yă Ndiöxí nchaa cuéchi-xi, te ñá túú-gă quidé cuèndá-gá nchaa sá cuèhé sá dúhá ñí quidé-yu.

**8**Váha táhú-yu chi Yá Ndiöxí càchí-gá sá ñà túú-gă cuéchi-yu. Duha ní cachí ndíi Dàvíí.

<sup>9</sup>Te ñá díú m̀e-ni ñáyiú ngũndecu seňá ñii-xi duca<sup>n</sup> v̄aha táhũ-yu, chi tnàhá ñáyiú ñá túú ngũndecu seňá ñii-xi duca<sup>n</sup> v̄aha táhũ-yu. Te sa nàha-o sá Yá Ndiõxí ní cachí-gá sá cúdiu ndíi Àbrahám núú-gã cuendá sá ni sàndáá iní ñáhá ndíi xii-gá. <sup>10</sup>Te cunaha-ndo sã d̄ihna-gá ní cachí Yá Ndiõxí sá cúdiu ndíi Àbrahám núú-gã te dàtǹnì ngũndecu seňá ñii ndíi. <sup>11</sup>Te ní ngũndecu seňá ñii ndíi cuendá xiã<sup>n</sup> cuu-xi ñi<sup>n</sup> seňá sá cúdiu ndíi núú Yá Ndiõxí. Te ndéé cútnàhá vátá ngũndecu-gá seňá ñii ndíi, te sa cùdiu ndíi núú-gã chi ní sàndáá iní ñáhá ndíi xii-gá. Te sá dúcá<sup>n</sup> ñà túú ndècu seňá ñii ndíi cútnàhá ní sàndáá iní ndíi Yá Ndiõxí xiã<sup>n</sup> ní cuu ndíi dàtná ñi<sup>n</sup> d̄íhí d̄tú nchaa ñáyiú sàndáá iní ñáhá xii-gá, ñáyiú ñá túú ní ngũndecu seňá ñii-xi, te cùdiú-yu núú-gã. <sup>12</sup>Te ndíi Àbrahám ní cuu tucu ndíi dàtná ñi<sup>n</sup> d̄íhí d̄tú nchaa ñáyiú ní ngũndecu seňá ñii-xi, dico ñá díú cuendá-ni sá ñi ngũndecu seňá ñii-yu cùu ndíi d̄íhí d̄tú-yu, chi cuendá sá sàndáá iní-yu Yá Ndiõxí nchìcú<sup>n</sup> nihnú-yu nàcuáa ní quide ndíi ní sàndáá iní ñáhá ndíi xii-gá ndéé cútnàhá vátá ngũndecu-gá seňá ñii ndíi.

**Yá Ndiõxí cada-gá nchaa nàcuáa ní cachí-gá te núu na quindáá iní-ó-gã**

<sup>13</sup>Te Yá Ndiõxí ní xáha<sup>n</sup>-gã xii ndíi Àbrahám sá ndúú tãhú ndíi cunuu ndíi ñuyíú, ndíhi cue déhe ndíi, ndíhi nchaa dava-gá cue ñaní tnàhá ndíi vitna cacu túu. Te duca<sup>n</sup> ñi xáha<sup>n</sup> Yá Ndiõxí xii ndíi ndíhi cue ñaní tnàhá ndíi, chi ní sàndáá iní ñáhá ndíi xii-gá ñuu xiã<sup>n</sup> ní cud̄u ndíi núú-gã. Te duca<sup>n</sup> ñi xáha<sup>n</sup>-gã xii ndíi dico ñá díú cuendá sá ñi quide ndíi nàcuáa ní xáha<sup>n</sup> Yá Ndiõxí xii ndíi Moisés cada ñáyiú ndéé cuèé-gá. <sup>14</sup>Te núu mee-ni ñáyiú nchìcú<sup>n</sup> nihnu quide nacuáa ní cáhá<sup>n</sup> ndíi Moisés ní ndùu táhũ-yu cunúú-yu ñuyíú-a ni cùu ña, te ñá túú xini ñuhu-xi quindáá iní-ó Yá Ndiõxí, te ñá túú nàndíhi tnúhu ní xáha<sup>n</sup> Yá Ndiõxí xii ndíi Àbrahám ní cùu te núu duca<sup>n</sup>. <sup>15</sup>Te núu ñi<sup>n</sup> ñáyiú ñá túú quide nacuáa càhá<sup>n</sup> tnúhu sá sánú ìchi ñaha xii-o nacuáa cada-o te nacháhu-yu sá dúcá<sup>n</sup> quidé-yu. Te núu ñá túú tnúhu sá sánú ìchi ñaha-xi xii-o nacuáa cada-o ni cùu ña, te ñá túú cuèchi-o ni cùu.

<sup>16</sup>Te duca<sup>n</sup> ñi xáha<sup>n</sup> Yá Ndiõxí xii ndíi Àbrahám nàcuáa cada-gá, chi cuendá sá ni sàndáá iní ñáhá ndíi xii-gá. Te duca<sup>n</sup> ñi quide-gá chi ío v̄aha iní-gá, dico ñá díú sã ñi<sup>n</sup> chiu<sup>n</sup> ni quide ndíi duca<sup>n</sup> ñi xáha<sup>n</sup>-gã. Te sá dúcá<sup>n</sup> ñi cuu te cùu-xi ñi<sup>n</sup> tnúhu ndáá sá cúú-xí nchàa ñaní tnàhá ndíi, ñáyiú sàndáá iní ñáhá xii-gá dàtná ní sàndáá iní ñáhá m̀e ndíi xii-gá, te ñá díú m̀e-ni cuendá nchaa ñaní tnàhá ndíi nchìcú<sup>n</sup> nihnu nchaa nàcuáa ní cáhá<sup>n</sup> ndíi Moisés, chi ndíi Àbrahám-á<sup>n</sup> ñi cuu ndíi dàtná ñi<sup>n</sup> d̄íhí d̄tú cue ñáyiú sàndáá iní ñáhá xii Yá Ndiõxí. <sup>17</sup>Te núú tútú Yá Ndiõxí càhá<sup>n</sup>-xi nàcuáa ní xáha<sup>n</sup>-gã xii ndíi, te duha ní xáha<sup>n</sup>-gã: “Yòhó té Àbrahám ní quide ñaha-í xii-n dàtná ñi<sup>n</sup> d̄íhí d̄tú cue ñáyiú x̄ndecu nihí ñuyíú.” Duha ní xáha<sup>n</sup> Yá

Ndiöxí xii ndíi, càchí-xi núú tütú-gá. Te Yá Ndiöxí náhá ndää-gá sá cáda-xí nàcuáa ní xáha<sup>n</sup>-gã xii ndíi Àbrahám, te diu-ni-gá cúú Yáa ní sándáa iní ndíi, te diu-ni-gá dándòto-gá ñáyiú ní xíhí, te diu-ni-gá quidé tá ngündecu nchaa sá vätä cündècu-gá ñuyíú-a.

**18**Te Yá Ndiöxí ní xáha<sup>n</sup>-gã xii ndíi Àbrahám sá ïo cuéhé dèhe ndíi coo, te ío ní sándáa iní ndíi nàcuáa ní xáha<sup>n</sup>-gã dico ñá túú ní cùtnuní iní ndíi nása cada-gá, chi ío ní sahnú ndíi. Te cuèndá sá dúcá<sup>n</sup> ïo ní sándáa iní ndíi tnúhu ní xáha<sup>n</sup>-gã nùu xíã<sup>n</sup> ní cuu ndíi díhí dütú vai ñáyiú xíndecu ñihí ñuyíú. **19**Te ndíi Àbrahám ñúhu ndíi ñi<sup>n</sup> cièndú cuíá cùtnàhá duca<sup>n</sup> ñí xáha<sup>n</sup> Yá Ndiöxí xii ndíi, te ní cutnùní iní ndíi sá ñà túú tàhú ndíi sá cóo dèhe ndíi ñihí ñàdihí ndíi ndíi Sàrá, chi ndi ndúu-yu sa ní sahnú vèhí-yu, te cuèi duca<sup>n</sup> dico ní sándáa-ni iní ndíi nàcuáa ní xáha<sup>n</sup> Yá Ndiöxí. **20**Te ñá túú ní sàni ñi<sup>n</sup> sani úú iní ndíi nàcuáa ní xáha<sup>n</sup> Yá Ndiöxí cada-gá sá cúú-xí ndíi, chi da uu<sup>n</sup>-gá váha ní sándáa iní ndíi nàcuáa ní xáha<sup>n</sup>-gã, te ní cachí ndíi sá ïo càhnú cuu-gá. **21**Te ní cutnùní ndáa iní ndíi sá Yá Ndiöxí ndácú-gã quidé-gã nchaa sá càhá<sup>n</sup>-gá. **22**Te sá ni sándáa iní ndíi nàcuáa ní cáhá<sup>n</sup> Yá Ndiöxí, núu xíã<sup>n</sup> ní cachí-gá sá cúú ndíi ñi<sup>n</sup> téé ñá túú cuèchi-xi núú-gã.

**23**Te ní ngódó tnùní núú tütú Yá Ndiöxí cuèndá ndíi Àbrahám sá ñí cachí-gá sá ñà túú cuèchi ndíi núú-gã, te ñá díú-ní cuèndá méé ndíi ni ngódó tnùní núú tütú-gá. **24**Chi tnàhá cuèndá-ó nchàa-o ní ngódó tnùní núú tütú-gá. Te càchí-gá sá ñà túú cuèchi-o nùú-gã chi sándáa iní-ó-gã, te diu-gá cúú-gã Yáa ní dándótó ñàha xii Xítohó Jesucristú Yáa cúú Xítohó-ó. **25**Te Yá Ndiöxí ní cachí-gá sá díú Xítohó Jesucristú cuú-gá cuèndá nacháhu-gá nchaa cuèchi-o. Te ní xíhí-gá te ní ndoto-gá cuèndá nchaa-o vã cündècu-gá cuèchi-o nùú Yá Ndiöxí te núu na quíndáa iní-ó-gã.

### Ío váha tnàhá ñáyiú càchí Yá Ndiöxí sá ñà túú cuèchi-xi

**5**<sup>1</sup>Te vitna, ñá túú-gã cuèchi-o ndècu núú Yá Ndiöxí chi sándáa iní-ó Xítohó Jesucristú, te ío váha ndècu ndíhi-o Yá Ndiöxí vitna sá cuèndá Xítohó Jesucristú. <sup>2</sup>Te cuèndá sá ni sándáa iní-ó Xítohó Jesucristú xíã<sup>n</sup> diu-gá ní quide ní ngündecu váha-o nùú Yá Ndiöxí, te duca<sup>n</sup>-ni cündecu-o, te ío cùdíí iní-ó chi ndècu ndíhi-o tnúhu ndee iní sá sàá nduu ngündecu-o nùú ïo váha càa ndecu Yá Ndiöxí. <sup>3</sup>Te ñá díú-ní sã cuèndá sá ndúú tàhú-ó cündecu-o núú ndécú-gã cùdíí iní-ó, chi cùdíí iní-ó ndòho-o cuèndá-gá, chi cùtnuní iní-ó sã nùu na ndòho-o cuèndá-gá te cunduu càhnú-gá iní-ó, <sup>4</sup>te núu cùu-o ñáyiú ta quide cahnu-gá iní-xi te cùtnuní sá cúú-ó ñáyiú quide váha, te núu cùu-o ñáyiú quide váha te uu<sup>n</sup>-gá tá ngündecu ndíhi-o tnúhu ndee iní cuáhá<sup>n</sup> sá cáda váha ñàha Yá Ndiöxí xii-o. <sup>5</sup>Te núu duca<sup>n</sup> te vá íí<sup>n</sup> ndúu ndixi cuèchi iní-ó sã ndécú ndíhi-o tnúhu ndee iní ngündecu váha-o.

Te Espiritú sá nǐ taxi Yá Ndiöxí ndécú ndìhi-o xǎ<sup>n</sup> quidé-xí cùtnuní iní-ó sǎ ïo cùu iní ñáhá Yǎ Ndiöxí xii-o.

<sup>6</sup>Te nchoo ñà túú vèdana ná ní ndàcu-o cada-o cuendá dàcácu nihnu-o mèe-o, dico Xítóhó Jesucrístú ní xíhí-gá cuendá-ó, ndìhi cuendá nchaa dava-gá ñáyiu ñà túú tnàhá tnúhu ndìhi Yá Ndiöxí, te ní xíhí-gá mei ndùu taú-xi cuú-gá. <sup>7</sup>Te cudana-ni núu xìhí ì<sup>n</sup> ñáyiu sá cuendá ì<sup>n</sup> ñáyiu quide ndáá, te áma xìhí tucu ì<sup>n</sup>-yu sá cuendá ñáyiu quide váha tnàha ñáyiu-xi. <sup>8</sup>Te Yá Ndiöxí ní quide-gá sá nchóo cùtnuní iní-ó sǎ ïo cùu iní ñáhá-gǎ xii-o, chi cútnàhá ndécú-ó ìchi cuehé ichi duha te ní tendaha-gǎ Xítóhó Jesucrístú ní quixi-gá ñuyíú-a ní xíhí-gá cuendá-ó. <sup>9</sup>Te sá cuendá sá nǐ xíhí Xítóhó Jesucrístú xǎ<sup>n</sup> ñà túú-gǎ cuéchi-o ndècu núú Yǎ Ndiöxí, te vitna ní cutnùní ndáá iní-ó sǎ vǎ dáquìhí<sup>n</sup> ñáhá-gǎ Yǎ Ndiöxí xii-o núú ùhú núú ndàhú sá cuendá Xítóhó Jesucrístú. <sup>10</sup>Te cútnàhá ñà túú tnàhá tnúhu-o ndìhi Yá Ndiöxí ní cùu ní xíhí Xítóhó Jesucrístú Yaá cúú Dèhe-gá cuendá cuu váha iní ñáhá-gǎ xii-o, te duca<sup>n</sup> te nduu táhú-ó cùndecu-o ndìhi-gá ni caa ni quíhí<sup>n</sup> cuendá sá nǐ ndoto Xítóhó Jesucrístú. <sup>11</sup>Te ndètu-o sáá nduu ngùndecu-o ndìhi-gá ni caa ni quíhí<sup>n</sup>, te ñà díú-ní xǎ<sup>n</sup> quidé-ó chi tnàhá cúdíí iní-ó Yǎ Ndiöxí, chi Xítóhó Jesucrístú ní quide-gá duca<sup>n</sup> cùdíí iní-ó-gǎ, te diu-ni Xítóhó Jesucrístú ní quide-gá ní nucúndecu váha-o ndìhi Yá Ndiöxí.

#### **Nàcuáa ní quide ndíi Àdán ndìhi nàcuáa ní quide Xítóhó Jesucrístú**

<sup>12</sup>Te ndíi Àdán ñà túú ní quide ndáá ndíi núú Yǎ Ndiöxí núu xǎ<sup>n</sup> ní ngùndecu nchaa sá cuèhé sá dúhá ñuyíú-a, te sá cuendá nchaa sá cuèhé sá dúhá quide ñáyiu xǎ<sup>n</sup> xìhí-yu, te nchaá-yu xìhí-yu chi nchaá-yu quidé-yu nchaa sá cuèhé sá dúhá. <sup>13</sup>Te sa quide-gá-yu nchaa sá cuèhé sá dúhá te dǎtnùní ní ngùndecu nchaa tnúhu sá nǐ chídó tnùní ndíi Moisés nàcuáa ní xáha<sup>n</sup> Yǎ Ndiöxí cada ñáyiu, te nchoo cùtnuní iní-ó sǎ núu ñà túú tnúhu sá sánú ìchi ñaha xii-o nacúáa cada-o, te ñà túú cuéchi-o sànuu. <sup>14</sup>Te ndéé cútnàhá ní xíndecu ndíi Àdán ní quesaha-xi xìhí ñáyiu, te duca<sup>n</sup>-ni xìhí-yu ndéé ní sáá nduu nǐ xíndecu ndíi Moisés. Te duca<sup>n</sup> nǐ xíhí-yu chi ní quidé-yu nchaa sá cuèhé sá dúhá cuèi ñà túú ní quidé-yu nàcuáa ní quide ndíi Àdán, chi ndíi-á<sup>n</sup> ñà túú ní sàndáá iní ndíi nàcuáa ní xáha<sup>n</sup> Yǎ Ndiöxí cada ndíi. Te ndíi Àdán ní cuu ndíi ì<sup>n</sup> tée cùu cahnu ní xíndecu ñuyíú-a, te sáta dúcá<sup>n</sup> te ní quixi Xítóhó Jesucrístú te Yaá-á<sup>n</sup> ïo-gá cǎhnu cuu-gá.

<sup>15</sup>Te sá nǐ quide ndíi Àdán te vá cǎchí-ó sǎ ì<sup>n</sup>-ní cùu-xi ndìhi sá nǐ cachí Yǎ Ndiöxí nduu táhú-ó vitna. Te sá ñà túú ní quide ndáá ndíi xǎ<sup>n</sup> nchaa ñáyiu xìhí-yu, dico Yá Ndiöxí ío váha iní-gá chi ío váha ní quide-gá sá cúú-xí nchàa nchoo ñáyiu ndècu ñuyíú-a, chi dícó duca<sup>n</sup> nǐ cachí-gá sá nánìhí tàhú-ó, te ì<sup>n</sup>díi-ni tée tnàhá-dé ío váha ní quide-dé sá cúú-xí-ó, te

tée-á<sup>n</sup> cúú-dě Xítohó Jesucrístú. **16**Te sá nǐ quide ì<sup>n</sup>dii-ni ndíi Àdán ñá túú ì<sup>n</sup>-ni cuu-xi ndíhi sá nǐ quide Yá Ndiöxí sá cúú-xí-ó, chi ndíi-á<sup>n</sup> ñà túú ní quide ndáá ndíi núú-gă. Te sá dúcá<sup>n</sup> nǐ quide ndíi te xǎ<sup>n</sup> ní cuu-xi cuéchi díhna nuu nǐ quide ndíi, núu xǎ<sup>n</sup> ní cachí Yă Ndiöxí sá cuè ñáyiu quíhí<sup>n</sup>-yu núú ùhú núú ndàhú nacháhu-yu nchaa sá cuèhé sá dúhá quidé-yu. Dico mee-gă ní quide sá cuè ñáyiu naníhí tàhú-yu òcò-ni duca<sup>n</sup>, te duca<sup>n</sup> te vá cùndècu-gá cuéchi-yu núú-gă cuèi ío vâi cuéchi-yu. **17**Te sá dúcá<sup>n</sup> ñà túú ní quide ndáá ì<sup>n</sup>dii-ni ndíi Àdán-á<sup>n</sup> nùú Yă Ndiöxí, xǎ<sup>n</sup> ní quide-xi xihí nchaa ñáyiu. Te sá cuendá sá nǐ quide ì<sup>n</sup>dii-ni Xítohó Jesucrístú xǎ<sup>n</sup> ío váha ní quide ñaha Yă Ndiöxí xii ñáyiu, chi òcò-ni duca<sup>n</sup> nǐ nduu táhũ-yu cùdiú-yu núú-gă. Te nchaa ñáyiu duca<sup>n</sup> cùdiu núú-gă nduu táhũ-yu cunúú-yu ndíhi Xítohó Jesucrístú cuendá sá nǐ quide-gá sá vâha sá cúú-xí-yu.

**18**Te sá dúcá<sup>n</sup> nǐ quide ndíi Àdán ñá túú ní quide ndíi nàcuáa ní xáha<sup>n</sup> Yă Ndiöxí xii ndíi ì<sup>n</sup> xito, núu xǎ<sup>n</sup> ní cachí-gá sá ncháá ñáyiu tàú-yu nacháhu-yu nchaa cuéchi-yu, dico Xítohó Jesucrístú ní quide-gá ì<sup>n</sup> sá vâha cuendá nchaa ñáyiu vá cùndècu-gá cuéchi-yu núú Yă Ndiöxí te núu na quìndáá iní ñáhă-yu xii-gá, te duca<sup>n</sup> te cundecú-yu ndíhi-gá ni caa ni quíhí<sup>n</sup>. **19**Te sá ñà túú ní sàndáá iní ì<sup>n</sup>dii-ni ndíi Àdán nàcuáa ní xáha<sup>n</sup> Yă Ndiöxí xii ndíi, xǎ<sup>n</sup> ní nguínchicú<sup>n</sup> nihnu nchaa ñáyiu quidé-yu nchaa sá cuèhé sá dúhá. Te duca<sup>n</sup> ì<sup>n</sup>dii-ni Xítohó Jesucrístú ní quide-gá nàcuáa ní xáha<sup>n</sup> Yă Ndiöxí cuendá sá Yă Ndiöxí cachí-gá sá cùdiú-yu núú-gă.

**20**Te Yá Ndiöxí ní xáha<sup>n</sup>-gă xii ndíi Moisés nàcuáa cada ñáyiu, te sá cuendá tnúhu-á<sup>n</sup> uu<sup>n</sup>-gá ní nguíta nchaa ñáyiu quidé-yu nchaa sá cuèhé sá dúhá, te Yá Ndiöxí uu<sup>n</sup>-gá cùndàhú iní ñáhă-gă xii-yu tucu. **21**Te sá cuendá nchaa cuéchi ñáyiu xǎ<sup>n</sup> xihí-yu, dico Yá Ndiöxí ío váha iní-gá chi diu-gá ní cachí-gá sá ncháá ñáyiu na tnàhá tnúhu ndíhi ñaha xii-gá cùdiú-yu núú-gă, te cundecú-yu ndíhi-gá ni caa ni quíhí<sup>n</sup>, te duca<sup>n</sup> chi Xítohó Jesucrístú ní quide-gá sá vâha sá cúú-xí-yu.

### Ñáyiu ñá túú-gă ndécú ichi cuehé ichi duha ndècú-yu cuendá Xítohó Jesucrístú

**6** **1**Te sá dúcá<sup>n</sup> quide Yá Ndiöxí, te vá cání iní-ó cànchicú<sup>n</sup> nihnu-ni-o ìchi cuehé ichi duha, chi ñá díú sǎ cànchicú<sup>n</sup> nihnu-o ìchi-á<sup>n</sup> te ngóo càní iní-ó sǎ ïo-gá cundàhú iní ñáhă-gă xii-o. **2**Te vá cúú cànchicú<sup>n</sup> nihnu-o ìchi cuehé ichi duha, chi nchoo cùu-o datná cue ñáyiu sa ní xihí, núu xǎ<sup>n</sup> vá cúú-gă canchicú<sup>n</sup> nihnu-o ìchi-á<sup>n</sup>. **3**Te sa nàha-o sá cuendá sá nǐ sandute-o quèe-xi sá tnàhá tnúhu-o ndíhi Xítohó Jesucrístú. Te sá nǐ sandute-o quèe tucu-xi sá cúú-ó datná ñáyiu ní xihí ndíhi-gá. **4**Te ñá díú-ní sǎ nǐ xihí-ó ndíhi-gá chi quèe tucu-xi sá nǐ nguíndũxi-o ndíhi-gá te ní



ndoto-o dàtná ní ndoto mee-gă ní dándótó ñàha Dútú Ndiöxí Yaá ío càhnu cuu, te duca<sup>n</sup> ñí cuu cuendá sá vă cùndècu-gá-ó dàtná ní xíndecu-o.

<sup>5</sup>Te núu ì<sup>n</sup>-ni cùu-o ndihi Xítóhó Jesucrìstú cuendá sá cúú-ó dàtná ñáyiu ní xíhí ndihí-gá, te ndáá sá cúú-ó dàtná ñáyiu ní ndoto ní ngúndecu váha dàtná ní ndoto mee-gă ní nucúndecu váha-gá. <sup>6</sup>Te nchoo ñàha-o sá cúú-ó ñáyiu ío ndècu cuéchi-xi ni cùu, dico sátá ñí cuu-o dàtná ñáyiu ní xíhí dàtná ní xíhí Xítóhó Jesucrìstú núú cùrúxí, te ndéé dàvâ-á<sup>n</sup> ñí dáñá-ó nchàa ichi cuehé ichi duha ndècu-o ni cuu, te ñá túú-gă cúnùu sá cuèhé sá dúhá ìní-ó. <sup>7</sup>Chi nchaa ñáyiu ní xíhí ñá túú-gă ndécü-yu ichi cuèhé ichi duha. <sup>8</sup>Te núu cùu-o datná ñáyiu ní xíhí dàtná ní xíhí Xítóhó Jesucrìstú ñá, te cùtnuní ndáá ìní-ó sà cùndècu-o ndihí-gá ni caa ni quíhí<sup>n</sup>. <sup>9</sup>Te sa ñàha-o sá Xítóhó Jesucrìstú ní xíhí-gá te ní ndoto-gá te vâ í<sup>n</sup> ndùu ì<sup>n</sup> quíú-gă te cuú-gá, chi ñá túú ñăgá sá cádá cùú-gá. <sup>10</sup>Te Xítóhó Jesucrìstú ní xíhí-gá ì<sup>n</sup> xito-ni sá cuendá nchaa cuéchi nchoo ñáyiu ñuyú, te vâ í<sup>n</sup> ndùu-gá cuú-gá, te ndècu-ni-gá sá cúú-xí Yă Ndiöxí. <sup>11</sup>Núu xǎ<sup>n</sup> nchòhó cada ìní-ndó să dàtná sá ñí xíhí-ndó vă cùndècu-gá-ndó sà cúú-xí ìchi cuehé ichi duha, chi ndècu-ná-ndó să cúú-xí Yă Ndiöxí, chi ní tnahá tnúhu-ndo ndihí Xítóhó Jesucrìstú Yaá cúú Xítóhó-ó.

<sup>12</sup>Te núu xǎ<sup>n</sup> vâ dáñá-gă-ndó cúnuu ni ì<sup>n</sup> sá cuèhé sá dúhá ìní-ndó cuendá sá vă cádá-gă-ndó ni ì<sup>n</sup> sá cuèhé sá dúhá sàni ìní-ndó. <sup>13</sup>Te vâ dáñá-ndó tàxi tnuní ñáhá ni ì<sup>n</sup> sá cuèhé sá dúhá-ă<sup>n</sup> xii-ndo cuendá sá vă cádá-gă-ndó, te chí dáñá ná tàxi tnuní ñáhá Yă Ndiöxí xii-ndo, te chí dáñá ná chindee ñàha-gá cada-ndo mèe-ni sá vâha, te duca<sup>n</sup> te cada ìní-ndó să cúú-ndó dàtná ñáyiu ní xíhí te ní ndoto ndècu. <sup>14</sup>Te duca<sup>n</sup> càda-ndo chi vâ ndácú-gă ni ì<sup>n</sup> sá cuèhé sá dúhá tàxi tnuní ñáhá-xí xii-ndo, chi Yá Ndiöxí cùndàhú ìní ñáhá-gă chíndèe ñàha-gá xii-ndo. Te duca<sup>n</sup> chi ñá túú-gă cúnùu nchaa tnúhu sá ñí chídó tnùní ndíi Moisés cada ñáyiu.

### Ñáyiu nchìcú<sup>n</sup> nihnu sá vâha

<sup>15</sup>Te ñá díú să cùndàhú ìní ñáhá Yă Ndiöxí xii-o chindee ñàha-gá ndihí sá ñá túú-gă cúnùu nchaa tnúhu ní chídó tnùní ndíi Moisés, te cachí-ó să cúú-ní cùndecu-o ichi cuehé ichi duha. <sup>16</sup>Te nchoo xìní-ó să nùu na cuăha-o tnúhu cunu cuechi-o nùú ì<sup>n</sup> ñáyiu cùníní cunu cuechi-o nùú-xi, te cùu-ná-ó ñáyiu xínu cuechi núú-yu te quide-o nchaa chiu<sup>n</sup> tahú-yu. Te duca<sup>n</sup> sãtnahá-xi cùu nchaa ñáyiu quide nchaa sá cuèhé sá dúhá chi tàxi tnuní ñáhá-ñă-xi xí-yu, te diu nchaa xǎ<sup>n</sup> dácuíta nihnu ñàha-xi xí-yu, te diu-ni duca<sup>n</sup> sãtnahá-xi cùu nchaa ñáyiu sàndáá ìní ñáhá xii Yá Ndiöxí chi tàxi tnuní ñáhá-gă xí-yu, te quidé-yu nchaa sá vâha ñàcuáa cùníní mée-gă cádá-yu. <sup>17</sup>Te nchòhó duca<sup>n</sup> ñí xóo cada-ndo nchàa sá cuèhé sá dúhá ní cùu, dico táxăhu xii Yá Ndiöxí chi vitna ni yùhu ni ìní-ndó quide-ndo

nchaa nacuáa càhá<sup>n</sup> tnúhu-gá sá nǐ ngúndecu ndìhi-ndo. **18**Te vitna ñá túú-gǎ táxí tnùnì ñáhá nì ìì<sup>n</sup> sá cuèhé sá dúhá xii-ndo, te quide-ná-ndó nchàa sá vǎha tàuchiu<sup>n</sup> Yá Ndiöxí cada-ndo. **19**Te duha càhá<sup>n</sup>-í cuèdá cue ñáyiú xínu cuechi cuèdá sá nchòhó tecú tnùnì-ndó nàcuáa ndùu tnúhu càhá<sup>n</sup>-í. Te nchòhó ní dáñá-ndó nǐ taxi tnùnì ñáhá nchàa sá cuèhé sá dúhá xii-ndo, te ñá túú ní quide-ndo nacuáa ní cáhá<sup>n</sup> Yǎ Ndiöxí cada-ndo chi da vìhi-gá ní quide-ndo, te ñi-ñi duca<sup>n</sup> chí dáñá ná tàxi tnùnì ñáhá Yǎ Ndiöxí xii-ndo vitna cuèdá cada-ndo mèe-ni sá vǎha nàcuáa cuìní méé-gǎ cada-ndo, te duca<sup>n</sup> te cuu-ndo ñáyiú quide ndáá cundecu núú-gǎ.

**20**Te nchoo cǔtnàhá ní xóo cada-o nchàa sá cuèhé sá dúhá ñá túú ní xóo cada-o nì ìì<sup>n</sup> sá vǎha cuìní Yǎ Ndiöxí cada-o. **21**Te òicó sácá<sup>n</sup>núú sǎnaha nchàa sá cuèhé sá dúhá-ǎ<sup>n</sup> te núu na càda-o, te nì ìì<sup>n</sup> sá vǎha vá ñihí-ó te núu na càda-o nchaa xǎ<sup>n</sup>, te ñi nchaa xǎ<sup>n</sup> dácuíta ñihnu ñaha-xi xii-o. **22**Te vitna ñá túú-gǎ cúú-ó ñáyiú ndècu ichi cuehé ichi duha, chi cùu-ná-ó ñáyiú quide nchaa nacuáa càhá<sup>n</sup> Yǎ Ndiöxí. Te sá dúhá quide-o cuu ndisa-xi ìì<sup>n</sup> sá vǎha sá cúú-xí-ó, te cùu-o ñáyiú quide ndáá ndécú-ó núú-gǎ vitna, te sáá nduu cùndecu-o ndìhi-gá ñi caa ñi quíhí<sup>n</sup>. **23**Te nchaa sá cuèhé sá dúhá òicó dácuíta ñihnu ñaha-xi xii-o, dico Yá Ndiöxí ní quide-gá sá òicó-ñi duca<sup>n</sup> ndùu táhú-ó cùndecu-o ndìhi-gá ñi caa ñi quíhí<sup>n</sup>, chi ní tnahá tnúhu-o ndìhi Xítohó Jesucristú Yaá cúú Xítohó-ó.

### Cuèdá ñáyiú tnǎndaha

**7** **1**Te nchaa nchòhó ñáyiú ndècu ndìhi-í ichi Xítohó Jesucristú sa ñaha-ndo nacuáa càhá<sup>n</sup> tnúhu sá dánèhé ñáhá xii-o nacuáa cada-o cùndecu-o, chi tnúhu-á<sup>n</sup> càhá<sup>n</sup>-xi dóho nchaa ñáyiú xǐndecu vívú ñuyíú-a. **2**Te nchaa ñáyiú òihí sa ndècu yǐi-xi, te ñi tnúhu-á<sup>n</sup> dánèhé ñáhá-xí xii-yu sá vǎ dáñá-yu yǐi-yu, dico núu na cùú yǐi-yu te ñá túú-gǎ ná càhá<sup>n</sup> tnúhu-á<sup>n</sup> cuèdá-yu. **3**Dico núu vátá cùú-gá yǐi-yu te ñá túú ndùu váha-xi naquehé<sup>n</sup>-yu ingá téé, dico núu na cùú yǐi-yu te quendóo mèé-yu, te ñá túú nǎgá càhá<sup>n</sup> tnúhu sá dánèhé ñáhá xii-yu nàcuáa cadá-yu te duca<sup>n</sup> te cuu naquehé<sup>n</sup>-yu ingá téé, te ñá túú cùu-xi ìì<sup>n</sup> cuéchi.

**4**Te nchòhó cue ñáyiú ndècu ndìhi-í ichi Xítohó Jesucristú cúú-ndó dàtná ñáyiú ní xíhí dàtná ní xíhí-gá. Te xǎ<sup>n</sup> ñá túú-gǎ táxí tnùnì ñáhá nchàa tnúhu ní chído tnùnì ndíi Moisés xii-ndo. Te duca<sup>n</sup> nǐ cuu cuèdá nchòhó ngúndecu-ndo ndìhi Xítohó Jesucristú Yaá ní xíhí ní cùu te ní ndoto-gá. Te duca<sup>n</sup> nǐ cuu cuèdá nchaa nchoo ñáyiú ndècu ichi-gá cada-o nchàa nacuáa càhá<sup>n</sup> Yǎ Ndiöxí. **5**Te nchoo nǐ xǐndecu-o ìchi cuehé ichi duha, te tnúhu sá sánú ìchi ñaha xii-o nacuáa cada-o cùndecu-o cachí-xi sá ñá túú vǎha cundecu-o ìchi-á<sup>n</sup>, te nchoo dà uu<sup>n</sup>-gá ní quide-o nchàa sá cuèhé sá dúhá sǎ dúcá<sup>n</sup> càhá<sup>n</sup> tnúhu-á<sup>n</sup>, te sá dúcá<sup>n</sup> nǐ quide-o te ta xǐta

nihnu-o cuáhá<sup>n</sup> ní cùu. <sup>6</sup>Te vitna cada iní-ó sǎ cúú-ó dàtná ñáyiú ní xíhí sǎ cúú-xí tñùhu sǎ dánèhé ñáhá xii-o nacuáa cada-o cùndecu-o, chi ñá túú-gǎ cúnùu-xi, te vitna mee-nǎ Espíritú Yǎ Ndiöxí chíndèè ñaha-xi xii-o xinu cuechi-o núú-gǎ, te ñá díú cuèndá nchaa tñùhu sǎ ñí ngúndeé ndéé díhna cada ñáyiú xinu cuechi-o núú-gǎ vitna.

**Nchaa sǎ cuèhé sǎ dúhá ñùhu iní-í**

<sup>7</sup>Te cuèi duha càhá<sup>n</sup>-í dico vá cúú tñàhí cáhá<sup>n</sup>-ó sǎ tñùhu sǎ sánú ìchi ñaha xii-o nacuáa cada-o cùndecu-o ñá díú tñùhu váha cùu-xi. Te yúhú ñá túú cùtnuní iní-í ná cúú nchàa sǎ cuèhé sǎ dúhá ní cùu te núu ñá túú tñùhu-á<sup>n</sup> ní càchí tñùhu-xi xii-í, te ni ñà túú cùtnuní tucu iní-í nùu váha àdi ñá túú váha sǎ nchídó ìní-í sǎ ndécú ndìhi tñaha ñáyiú-o ni cùu te núu ñá túú tñùhu-á<sup>n</sup> ní càchí-xi sǎ vǎ cúú cùu iní-í sǎ ndécú ndìhí-yu. <sup>8</sup>Te tñùhu-á<sup>n</sup> ñí dánèhé ñáhá-xí xii-í sǎ vǎ cúú càda-í ni ì<sup>n</sup> sǎ cuèhé sǎ dúhá, dico sǎ cuèndá tñùhu-á<sup>n</sup> uu<sup>n</sup>-gǎ duca<sup>n</sup> ñí sani iní-í ní quide-í. Te núu ñá túú tñùhu sǎ sánú ìchi ñaha xii-o nacuáa cada-o cùndecu-o ña, te ñá túú cùtnuní iní-í sǎ quídè-í nándi sǎ cuèhé sǎ dúhá ní cùu. <sup>9</sup>Te cútnàhá vátá ñihí-gá-í tñùhu-á<sup>n</sup> te ñá túú tñàhí ná sání ìní-í ndécù-í ni cùu, dico sǎ tá ní ñihí-í tñùhu-á<sup>n</sup> te ní cutnùní iní-í sǎ ndécú cuèchi-í, te ta xíta nihnu-í cuáhá<sup>n</sup> ní cùu. <sup>10</sup>Te núu ni quide-í nchaa nàcuáa càhá<sup>n</sup> tñùhu-á<sup>n</sup> te sa ndéé ama-gǎ naníhí tàhú-í ní cùu, dico ñá túú ní quide-í nùu ní cutnùní iní-í sǎ tá xíta nihnu-í cuáhá<sup>n</sup> ní cùu. <sup>11</sup>Te sǎ xíí tñùhu-á<sup>n</sup> xíǎ<sup>n</sup> uu<sup>n</sup>-gǎ ní cunuu nchàa sǎ cuèhé sǎ dúhá ñí dándàhú ñáhá-xí xii-í te ní quide-í, te ta dàcuíta nihnu ñaha-xi xii-í cuáhá<sup>n</sup> ní cùu.

<sup>12</sup>Te tñùhu sǎ sánú ìchi ñaha xii-o nacuáa cada-o cùndecu-o cuu-xi tñùhu ío yíñùhu ní taxi Yǎ Ndiöxí, te ì<sup>n</sup> ì<sup>n</sup> tñùhu-á<sup>n</sup> cúú-xí mèe-ni tñùhu váha, te ni ì<sup>n</sup> tñùhu cuèhé tñùhu duha ñá túú ñùhu tñahá. <sup>13</sup>Te vá cúú càchí-í sǎ tñùhu váha-á<sup>n</sup> ñí quide-xi ta xíta nihnu-í cuáhá<sup>n</sup> ní cùu, chi nchaa sǎ cuèhé sǎ dúhá ñí quide-í, xíǎ<sup>n</sup> tá dàcuíta nihnu ñaha-xi xii-í cuáhá<sup>n</sup> ní cùu, te sǎ cuèndá tñùhu váha-á<sup>n</sup> ñí cutnùní iní-í sǎ quídè-í nchaa sǎ cuèhé sǎ dúhá, te xíǎ<sup>n</sup> tá xíta nihnu-í cuáhá<sup>n</sup> ní cùu. Te sǎ cuèndá nchaa nàcuáa càhá<sup>n</sup> tñùhu sǎ sánú ìchi ñaha xii-o nacuáa cada-o cùndecu-o ní cutnùní iní-í sǎ xidó ndécú cuèchi-í ní cùu.

<sup>14</sup>Te tñùhu-á<sup>n</sup> ñí taxi Espíritú Yǎ Ndiöxí ndécú ndìhi-o cachí tñùhu-xi nàcuáa cada váha-o. Te nchoo cùu-o mee-ni ñáyiú yíca cuèchi, te tàxi tñuní ñáhá nchàa sǎ cuèhé sǎ dúhá xii-o ni cuu. <sup>15</sup>Dico nchoo tñàhá iní-ó càda-o nchaa sǎ váha dico ñá túú quide-o, te da nchaa sǎ ñà túú tñàhá iní-ó càda-o quide-o, te ñá túú cùtnuní iní-ó ñá cuèndá duca<sup>n</sup> quide-o. <sup>16</sup>Te sǎ dúcá<sup>n</sup> quide-o nchaa sǎ ñà túú tñàhá iní-ó, te xíǎ<sup>n</sup> ndíxí tñu iní-ó sǎ tñùhu sǎ dúcá<sup>n</sup> sànu ichi ñaha xii-o nacuáa cada-o cùndecu-o cuu-xi tñùhu

ío váha. <sup>17</sup>Te cùtnuní iní-ó sǎ nchàa sá cuèhé sá dúhá ñùhu iní-ó, xǎ<sup>n</sup> quidé-xí dùca<sup>n</sup> quide-o sá ñà túú vǎha, te ñá díú sǎ cǎhú ìní méé-ó dùca<sup>n</sup> quide-o. <sup>18</sup>Te cùu-o cue ñáyiú sàni cuehé sání dùha iní-xi, te cuìní-ó càda-o nchaa sá vǎha dico ñá túú ñìhí ndéé-ó càda-o. <sup>19</sup>Te cuìní-ó càda-o nchaa sá vǎha dico ñá ndácú-ó, te ñá túú cuìní-ó càda-o datná quidé nchàa ñáyiú ndècu ichi cuehé ichi duha, chi ñáyiú-á<sup>n</sup> mee-ni nchàa sá cuèhé sá dúhá quidé-yu, dico ñáyiú-ni nchaa xǎ<sup>n</sup> quidé-ó tnàhá-ó. <sup>20</sup>Te sá dúcá<sup>n</sup> quide-o nchaa sá ñà túú tnàhá iní-ó càda-o te ñá díú mèe-o duca<sup>n</sup> cahu iní-ó quide-o, chi nchaa sá cuèhé sá dúhá ñùhu iní-ó xǎ<sup>n</sup> quidé-xí dùca<sup>n</sup> quide-o.

<sup>21</sup>Te duca<sup>n</sup> tnàhí yáha-o òré cuìní-ó càda-o sá vǎha, chi da mee-ni nchàa sá cuèhé sá dúhá quide-o. <sup>22</sup>Te ío cùdíí iní-ó càda-o nchaa nacuáa càhá<sup>n</sup> Yǎ Ndiöxí, <sup>23</sup>te dìcò-ni sá ncháá sǎ cuèhé sá dúhá ñùhu iní-ó, xǎ<sup>n</sup> quidé-xí ngàni ñaha-xi xii-o ñá túú quide-o sá vǎha sàni iní-ó càda-o, te duca<sup>n</sup> yáha-o chi nchaa sá cuèhé sá dúhá-ǎ<sup>n</sup> cúnùu-xi taxi tnuní ñáhá-xí xii-o.

<sup>24</sup>Te ndàhú ní cuu nchoo! Chi vá yǎo ì<sup>n</sup> ni ndàcu cada nacuáa vá táxí tnùní ñáhá-gǎ nchaa sá cuèhé sá dúhá xii-o sá tá dàcuíta nihnu ñaha xii-o cuáhá<sup>n</sup> ní cùu. <sup>25</sup>Te táxǎhu xii Yá Ndiöxí sá Xítóhó Jesucristú ní quide-gá cuèndá sá vǎ táxí tnùní ñáhá-gǎ ni ì<sup>n</sup> sá cuèhé sá dúhá xii-o, sá tá dàcuíta nihnu ñaha xii-o cuáhá<sup>n</sup> ní cùu. Te mee-o sàni iní-ó càda-o nchaa nacuáa càhá<sup>n</sup> Yǎ Ndiöxí, dico núu nchaa sá cuèhé sá dúhá ná cúnùu-xi taxi tnuní ñáhá-xí xii-o, te ñáyiú-ni nchaa xǎ<sup>n</sup> cada-o.

### Ñáyiú quide nchaa nacuáa càhá<sup>n</sup> Espíritú Yǎ Ndiöxí

**8** <sup>1</sup>Te vitna nchaa nchoo ñáyiú tnàhá tnúhu ndihi Xítóhó Jesucristú vá cuíta nihnu-gá-ó, chi ñá túú-gǎ ndécú-ó ìchi cuehé ichi duha, chi mee-nǎ nchaa nacuáa càhá<sup>n</sup> Espíritú Yǎ Ndiöxí quidé-ó. <sup>2</sup>Te Espíritú Yǎ Ndiöxí-ǎ<sup>n</sup> táxí tnùní ñáhá-xí xii-o, te duca<sup>n</sup> chi ndècu ndihi-o Xítóhó Jesucristú, te sá dúcá<sup>n</sup> tàxi tnuní ñáhá Espíritú-gá xii-o nǎu xǎ<sup>n</sup> ñá túú-gǎ táxí tnùní ñáhá ñì ì<sup>n</sup>-gá sá cuèhé sá dúhá xii-o, te duca<sup>n</sup> quide Espíritú-gá cuèndá sá vǎ cuíta nihnu-o, te ñáyiú-ni Espíritú-gá quidé-xí cuèndá sá nchóo ndùu táhú-ó cùndecu-o ndihi-gá ni caa ni quíhí<sup>n</sup>. <sup>3</sup>Te nchoo ñǎ ní ndàcu-o cada-o nchaa nacuáa càhá<sup>n</sup> tnúhu sá sánú ìchi ñaha xii-o nacuáa cada-o cùndecu-o, núu xǎ<sup>n</sup> tnúhu-á<sup>n</sup> ñà túú ní ñìhí ndéé-xí càda-xi cuèndá sá nchóo vǎ cuíta nihnu-o. Dico Yá Ndiöxí ní tendaha-gǎ Déhe mee-gǎ ní quixi ñuyíú-a, te Yaá-á<sup>n</sup> cúu-gǎ ì<sup>n</sup> ñáyiú, te càa-gá dàtná cáá ñáyiú ndècu cuéchi-xi xǎndecu ñuyíú-a, te sá cuèndá nchaa cuéchi nchaa nchoo ñáyiú xǎndecu ñuyíú-a ní quixi-gá, te ndéé dàvá-á<sup>n</sup> ñì quide-gá cuèndá sá vǎ táxí tnùní ñáhá-gǎ ni ì<sup>n</sup> sá cuèhé sá dúhá xii-o. <sup>4</sup>Te duca<sup>n</sup> ñì quide-gá cuèndá nchoo nchìcú<sup>n</sup> nihnu-o quide-o nacuáa càhá<sup>n</sup> tnúhu sá sánú ìchi ñaha xii-o

nacuáa cada-o, chi ñá túú-gă cúnùu ni ìí<sup>n</sup> sá cuèhé sá dúhá ìní-ó, chi Espíritú Yă Ndiöxí-nă táxí tnùnì ñáhá-xí xii-o.

<sup>5</sup>Te nchaa ñáyiú cùnùu nchaa sá cuèhé sá dúhá ìní-xi mee-ni xǎ<sup>n</sup> ñúhú ìní-yu te quidé-yu. Dico nchoo ñáyiú quide nchaa nacuáa cuiní Espíritú Yă Ndiöxí ñúhú ìní-ó mēe-ni nacuáa cǎhá<sup>n</sup> Espíritú-gá-á<sup>n</sup> te quide-o. <sup>6</sup>Te núu mee-ni nchaa sá cuèhé sá dúhá cùnùu ìní-ó, te cuíta nihnu-o, dico núu mee-ni nchaa tnúhu cǎhá<sup>n</sup> Espíritú Yă Ndiöxí cúnùu ìní-ó, te ío váha cuu ìní-ó cùndecu-o ndíhi-gá ni caa ni quíhí<sup>n</sup>. <sup>7</sup>Te nchaa ñáyiú ñúhu ìní mee-ni sǎ cuèhé sá dúhá cùu úhú ìní-yu Yá Ndiöxí, te ñá túú cuiní-yu cadá-yu nacuáa cǎhá<sup>n</sup>-gá, te ni ñǎ ndácǔ-yu cadá-yu. <sup>8</sup>Te nchaa ñáyiú duca<sup>n</sup> cùnùu nchaa sá cuèhé sá dúhá ìní-xi-á<sup>n</sup> ñǎ túú cùdiú-yu núu Yă Ndiöxí.

<sup>9</sup>Te nchòhó chi ñá túú-gă cúnùu sá cuèhé sá dúhá ìní-ndó, chi mee-nǎ nacuáa cǎhá<sup>n</sup> Espíritú Yă Ndiöxí quidé-ndó, te duca<sup>n</sup> quide-ndo chi ndècu ndíhi-ndo Espíritú-gá, te diu-ni Espíritú-gá-á<sup>n</sup> ñǎ tendaha Xítóhó Jesucrístú véxi ndècu ndíhi-o, te nchaa ñáyiú ñá túú ndècu ndíhi Espíritú sá ñǎ tendaha Xítóhó Jesucrístú véxi ndècu ndíhi-o ñá túú ndècu ndíhi ñáhá-yu xii-gá. <sup>10</sup>Te núu ndècu ndíhi-ndo Xítóhó Jesucrístú, te cuéi na cùu yiqui cùñú-ndó sǎ cuèndá nchaa sá cuèhé sá dúhá ío ñuyú-a, dico ìní-ndó chi cundecu ndíhi-xi Yá Ndiöxí chi ñá túú-gă cuéchi-ndo ndècu núú-gă. <sup>11</sup>Te núu ndècu ndíhi-ndo Espíritú Yă Ndiöxí Yaá ní dándótó ñaha xii Xítóhó Jesucrístú, te diu-ni-gá cada te ndoto yiqui cùñú-ndó sǎ tá xíta nihnu cuáhá<sup>n</sup> nǔu na cùú-xi, te duca<sup>n</sup> chi ndècu ndíhi-ndo Espíritú-gá.

<sup>12</sup>Te nchòhó ñáyiú ndècu ndíhi-í ichi Xítóhó Jesucrístú, ñá túú-gă tàú-ndó cùnùu ni ìí<sup>n</sup> sá cuèhé sá dúhá ìní-ndó nacuáa vá cùndecu-gá-ndó ìchi cuehé ichi duha. <sup>13</sup>Chi núu na cùnùu sá cuèhé sá dúhá ìní-ndó te cuíta nihnu-ndo, chi quíhí<sup>n</sup>-ndó nǔú ùhú núú ndàhú. Dico núu daña-ndo mēe-ndo chindee ñaha Espíritú Yă Ndiöxí xii-ndo cuèndá sá vǎ cúnùu-gá sá cuèhé sá dúhá ìní-ndó ñá, te nduu táhú-ndó cùndecu-ndo ndíhi-gá ni caa ni quíhí<sup>n</sup> te núu duca<sup>n</sup> na càda-ndo.

<sup>14</sup>Chi nchaa ñáyiú quide nchaa nacuáa sànu ichi ñaha Espíritú Yă Ndiöxí cúú-yu déhe-gá. <sup>15</sup>Te Espíritú sá ñǎ taxi Yá Ndiöxí ndécú ndíhi-o ñá túú quide-xi sá nchóó yùhú-ó cùnùu cuechi-o núú-gă, chi Espíritú-á<sup>n</sup> quidé-xi sǎ nchóó cùu-o déhe-gá, te diu-ni Espíritú-á<sup>n</sup> quidé xǎha<sup>n</sup>-o xii Yá Ndiöxí: “iYòhó Dútú Ndiöxí cúú-n Tǎtá mēé-ndǎ!”, duha xǎha<sup>n</sup>-o xii-gá. <sup>16</sup>Te diu-ni Espíritú-gá-á<sup>n</sup> tnàhá tnúhu-xi ndíhi ìní-ó, te cǎhá<sup>n</sup> ndáá-xi sá nchóó cùu-o déhe-gá. <sup>17</sup>Te sá dúcá<sup>n</sup> cùu-o déhe Yá Ndiöxí xǎ<sup>n</sup> ní cachí-gá sá tnàhá-ó ndùu táhú-ó sǎ ñǎ nduu táhú Xítóhó Jesucrístú, te duca<sup>n</sup> ndùu táhú-ó te núu na càda ndee ìní-ó ndòho-o datná ní ndoho Xítóhó Jesucrístú, te núu duca<sup>n</sup> te ío cuu cǎhnu-o ndíhi-gá ni caa ni quíhí<sup>n</sup>.



18Te yúhú cächí-í sá ñà túú nă cada-xi cuëi ndòho-o cuendá-gá ndécú-ó ñùyíú-a, chi ío váha cãa núú ndúú tãhú-ó cùndecu-o na saá nduu. 19Te nchaandi túhú sá ñí cadúha Yá Ndiöxí ní taxi ndecu-gá ñuyíú-a ndètu cahnu-ná-xi sáá nduu cächí-gá sá ïo cãhnu cuu nchaa déhe-gá. 20Te nchaa sá ñí cadúha Yá Ndiöxí ní taxi ndecu-gá ñuyíú-a ní sáá nduu ñà túú-gã cúú-xí sã vãha sá cúú-xí-gã. Te ñã díú mèe sá ñí taxi ndecu Yá Ndiöxí ñuyíú-a duca<sup>n</sup> ni sàni iní-xi cunduu, chi mee-gã duca<sup>n</sup> tnàhí ní cachí-gá cunduu sá sàá nduu vã cúú-xí sã vãha sá cúú-xí-gã, dico sáá tucu nduu te nchaa xíã<sup>n</sup> cuu tucu-xi sá vãha sá cúú-xí-gã. 21Te nchaa sá ñí taxi ndecu-gá ñuyíú-a vá cùndèu-gá-xi dàtná cáá-xí vitna te ni vã dánàa-gá, chi nduu saa-xi te ngúndecu váha-xi dàtná ngúndecu váha nchaa cue déhe-gá. 22Te nàha-o sá ncháándì túhú sá nchító ñí cadúha Yá Ndiöxí ndécú ñùyíú-a ndòho-xi vitna datná ndóhó ì<sup>n</sup> ñadihí sa ní tnahá òré cacu déhe-xi. 23Te ñã díú-ní nchaa sá dúcá<sup>n</sup> ñí cadúha-gá-ã<sup>n</sup> duca<sup>n</sup> ndòho-xi, chi tnàhá nchoo dùca<sup>n</sup> ndoho-o ndecu-o ñuyíú-a tucu, te nchoo sà ní nduu táhú-ó Espíritú Yá Ndiöxí Espíritú sá ñí cachí méé-gã nduu táhú-ó dïhnanuu. Te ío ndòho tnahá-ó ndècu-o ñuyíú-a te ndètu cahnu-ná-ó sáá nduu ndàda saa-gá yiqui cùñú-ó, te cáhá<sup>n</sup>-gá sá cúú-ó dèhe-gá. 24Te Yá Ndiöxí ní quide-gá ní naníhí tãhú-ó nũu xíã<sup>n</sup> ní ngúndecu ndihí-o tnũhu ndee ìní ndétú-ó sáá nduu càda-gá nàcuáa ní cachí-gá, te núu sa ndècu ndihí-o sá ndúú tãhú-ó te vá cúú cãhá<sup>n</sup>-ó sã cùndètu-o sá ndúú tãhú-ó chi sa ndècu ndihí-o. 25Dico sá ndétú-ó ndùu táhú-ó cùu-xi sá vátá cùndècu ndihí-gá-ó, te xìni ñuhu-ni-xi cada ndee-ni iní-ó cùndetu-o ndéé sáá nduu ndùu táhú-ó sã dúcá<sup>n</sup> ñí cachí Yá Ndiöxí nduu táhú-ó.

26Te Espíritú-gá chindee ñàha-xi xii-o nacuáa níhí ndéé-ó cùndecu-o, te nchoo ñà túú xìní-ó cãhá<sup>n</sup> ndihí-o Yá Ndiöxí nàcuáa tàú-xi cunduu dico Espíritú-gá cãhá<sup>n</sup> ndàhú-xi núú-gã cuendá-ó cuëi òré ñã ñihí-ó tnũhu cáhá<sup>n</sup>-ó cuendá nchaa sá ïo cuìní-ó cãcá<sup>n</sup>-ó nũú-gã. 27Te Yá Ndiöxí sa nàha ndáá-gá nchaa nàcuáa sàni iní-ó, te duca<sup>n</sup> sà naha ndáá-gá nchaa nàcuáa sàni iní Espíritú-gá. Te Espíritú-gá cãhá<sup>n</sup> ndàhú-xi núú-gã cuendá nchoo ñãyiu yìndaha-gá, te cãhá<sup>n</sup> ndàhú-xi núú-gã nàcuáa cuìní méé-gã cunduu.

**Nchaa sá ná càda ñaha ñãyiu te vá ndácũ-yu nadatùhú-yu iní-ó chi ndacu nahi-ni-o yãha-o nchaa sá ná cáda ñahá-yu**

28Te sa nàha-o sá Yá Ndiöxí quidé-gã sá ncháá sã yãha-o ndècu-o ñuyíú-a cùu-xi sá vãha sá cúú-xí nchòo cue ñãyiu cùu iní ñáhá xìi-gá, chi cùu-o ñãyiu ní cáhá<sup>n</sup>-gá cundecu ndihí-gá dàtná ní cachí iní méé-gã. 29Te ndéé cùtnàhá vátá ngãva-gá ñuyíú, te Yá Ndiöxí sa nàha-gá nándi cùu ñãyiu cundecu ndihí-gá, te diu-ni ndéé dàvá-á<sup>n</sup> ñí cachí-gá sá ñãyiu-á<sup>n</sup> cunduu váha iní-yu dàtná váha iní Déhe mee-gã, te duca<sup>n</sup> ñí cachí-gá

cuendá sá Dēhe mee-gă-á<sup>n</sup> cunuu-gă núú nchàa ñáyiú cundecu ndihi-gă.  
**30**Te nchaa ñáyiú duca<sup>n</sup> ñi cachí-gă cundecu ndihi-gă ndéé cútnàhá vátá  
 ngăva-gă ñuyíú càhá<sup>n</sup> ñáhá-gă xí-yu vitna, te nchaa ñáyiú duca<sup>n</sup> càhá<sup>n</sup>-gă  
 càchí-gă sá ñà túú-gă cuéchi-yu ndècu núú-gă, te diu-ni ñáyiú-á<sup>n</sup> cachí-gă  
 sá ïo càhnu cuú-yu.

**31**Te vitna ní cutnùnì iní-ó, te ñà túú năgá cani iní-ó, chi Yá Ndiöxí  
 ndécú ndìhi ñaha-gă xii-o, te vâ yöö ìi<sup>n</sup>-gă ndacu quehdé nihnu cuendá sá  
 vâ chindèe ñaha-gă xii-o. **32**Te Yá Ndiöxí ñà túú ní cùdíi iní-gă Déhe-gă sá  
 cùú-gă cuendá nchaa nchoo ñáyiú xĩndecu ñuyíú-a, te sá dúcá<sup>n</sup> ndèe  
 Déhe-gă ñà túú ní cùdíi iní-gă xĩá<sup>n</sup> cútnùnì iní-ó sã táxí-gă nchaandi túhú  
 sá xínì ñùhu-o. **33**Te vâ yöö ìi<sup>n</sup> ndacu cacá<sup>n</sup> cuéchi núú Yă Ndiöxí cuendá  
 nchaa ñáyiú ní cachí-gă cundecu ndihi-gă te núú ná cúú cuéchi-yu ndècu.  
 Chi mee-gă càchí-gă sá ñà túú ndècu cuéchi-yu núú-gă. **34**Te vâ yöö ìi<sup>n</sup>  
 ndacu daquihí<sup>n</sup> ñáhá xii-o núú ùhú núú ndàhú, chi Xítohó Jesucrístú ní  
 xíhí-gă te ní ndoto-gă, te cuándaa-gă núú ndécú Dütú Ndiöxí núcöo-gă xio  
 cùha-gă, te duca<sup>n</sup> ïo cunuu-gă, te yàcá<sup>n</sup> càhá<sup>n</sup> ndàhú-gă núú Dütú Ndiöxí  
 cuendá-ó. **35**Te vâ yöö ìi<sup>n</sup> ndacu cada ñaha xii-o ìi<sup>n</sup> sá ñà túú vâha cuendá  
 sá vâ cúú ìní ñáhá-gă Xítohó Jesucrístú xii-o, te ni tnúndòho tnúhu ndàhú,  
 te ni sá ndìhú iní-ó ñă cútnùnì iní-ó ñăsa cada-o cãcu nihnu-o ìi<sup>n</sup> sá ná  
 yãha-o, te ni nchàa sá cádá ñaha ñáyiú sá cuendá-gă, te cuèi-ni sá vâ ñihí-ó  
 sã cóhó sã caxí-ó, te cuèi-ni sá vâ ñihí-ó dđó cuihnu-o, te cuèi ndècu-ná-ó  
 sã yãha-o ìi<sup>n</sup> sá yãha-o, te cuèi sa ndècu-ná-ó sã cáhni ñáhá-yu, dico Xítohó  
 Jesucrístú vâ dáñá ndèe-gă sá cúú ìní ñáhá-gă xii-o. **36**Te quee ndáá-xi  
 nàcuáa ní cáhá<sup>n</sup> ìi<sup>n</sup> téé ní xóo cáhá<sup>n</sup> tnúhu Yá Ndiöxí ndéé sanaha ñi ngódó  
 tnùnì núú tütú-gă núú càchí-xi:

Yòhó Dütú Ndiöxí nchaa-ni nduu nchaa-ni òré cuinì ñáyiú cahni  
 ñáhá-yu xii-ndí sá cuendá-n,  
 te càchí-yu sá cúú-ndĩ dàtná cue mbéé cue quitì sa ndècu túha-ná  
 cahní-yu.

Duha ní cachí téé ní xóo cáhá<sup>n</sup> tnúhu-gă-á<sup>n</sup>, te duca<sup>n</sup> ñi ngódó tnùnì núú  
 tütú-gă. **37**Te cuèi duca<sup>n</sup> nãndi sá ná càda ñáhá-yu xii-o, dico vâ ndácũ-yu  
 nadatùhú-yu iní-ó chi ndacu nahi-ni-o yãha-o nchàa sá dúcá<sup>n</sup> ná càda  
 ñáhá-yu xii-o, te duca<sup>n</sup> chi Xítohó Jesucrístú Yaá ío cùu iní ñáhá xii-o  
 ndecu ndìhi ñaha-gă chindèe ñaha-gă. **38-39**Te yúhú cútnùnì ndáá iní-í sá  
 ñi ìi<sup>n</sup> sá ío ñuyíú-a vâ ndácú-xí càda-xi cuendá sá vâ cúú ìní ñáhá-gă Yă  
 Ndiöxí xii-o, te ni sã cùú-ó, te ni sã cùndècu-o ñuyíú-a, te ni ìi<sup>n</sup> espíritú sá  
 ïo cunuu cundìhi yucu ñávãha te ni ìi<sup>n</sup> dava-gă cue espíritú cùndìhi-xi vâ  
 ndácú-xí càda-xi cuendá sá vâ cúú ìní ñáhá Yă Ndiöxí xii-o. Te ni sã cúú  
 ñùyíú-a vitna, te ni sã cúú ndèe cuèe-gă, te ni ìi<sup>n</sup> sá ndécú àndiù, te ni ìi<sup>n</sup> sá  
 ndécú ñùyíú-a, te ni ìi<sup>n</sup> sá ñi cadúha mee Yă Ndiöxí, ni ìi<sup>n</sup> xĩá<sup>n</sup> vâ ndácú-xí

càda-xi cuendá sá vă cúú ìní ñáhá-gă xii-o chi ndècu ndìhi-o Xítóhó Jesucristú Yaá cúú Xítóhó-ó.

**Yá Ndiöxí ní cachí-gá sá ñáyiú isràél cuú-yu  
ñáyiú canchicú<sup>n</sup> nihnu ñaha xii-gá**

**9** <sup>1</sup>Te yúhú càhá<sup>n</sup> ndáá-í chi cùu-í ìi<sup>n</sup> téé ndècu ndìhi Xítóhó Jesucristú, te ndècu ndìhi-í Espíritú Yă Ndiöxí nŭu xǎ<sup>n</sup> cútnùní iní-í sá càhá<sup>n</sup> ndáá-í. <sup>2</sup>Te nchaa-ni nduu nchaa-ni òrè ío ndìhú iní-í, te duca<sup>n</sup>-ni ò quide úhú-xi iní-í <sup>3</sup>sá cuendá nchaa ñáyiú cùu ndi mee-í. Te núu dícó cúú-xí ìi<sup>n</sup> sá chíndèè ñaha xií-yu nucúndecu váha-yu núú Yă Ndiöxí ñá, te dàña-í mèè-í dàcuíta nihnu ñaha Xítóhó Jesucristú nŭu dícó sá cúú. <sup>4</sup>Te nchaa ñáyiú cùu ndi mee-í-á<sup>n</sup> cúŭ-yu ñáyiú isràél, te Yá Ndiöxí ní cachí-gá sá cúŭ-yu déhe-gá, te ní quide-gá nàcuáa ní cutnùní iní-yu sá ò càhnu cuu-gá, te ní cáhá<sup>n</sup> ndáá-gá núŭ-yu nàcuáa cada ñaha-gă xií-yu, te ní xáha<sup>n</sup>-gă xii ndíi Moisés ní chídó tnùní ndíi nàcuáa cadá-yu cundecú-yu. Te ní xáha<sup>n</sup>-gă xií-yu nàcuáa cadá-yu cada càhnu ñahá-yu xii-gá, te ní xáha<sup>n</sup> tùcu-gá xií-yu nchaa nàcuáa cada-gá ndéé cuèé-gá. <sup>5</sup>Te nchaa ñáyiú-á<sup>n</sup> cúŭ-yu ñaní tnáhá nchàa cue téé ní cunuu ñí xíndecu ndéé sanaha, te diu-ni ñaní tnáhă-yu cùu Xítóhó Jesucristú Yaá ní tendaha Dŭtú Ndiöxí ní quixi ñuyíú-a, te tnáhá-gá cúú-gă Ndiöxí te ío cùnuu-gá, te nchaa nduu nchaa quíú ò càhnu cuu-gá. Te duca<sup>n</sup> na cùnduu.

<sup>6</sup>Te vá càchí-ó să Yă Ndiöxí ñá túú ní quide-gá nchaa nàcuáa ní cachí-gá cada-gá cuendá sá ñà túú sàndáá iní ñáhá dàva ñáyiú isràél xii-gá. Te sá dúcá<sup>n</sup> xíquide davá-yu te ñá túú quidé-yu nàcuáa tàú-xi cadá-yu sá cúŭ-yu ñáyiú isràél. Te ñáyiú duca<sup>n</sup> xíquide-á<sup>n</sup> cúŭ-yu ñáyiú ñá túú cùu cuendá ñáhá Yă Ndiöxí. <sup>7</sup>Te cuèi ncháá-yu cùu-yu ñaní tnáhá ndíi Àbrahám dico ñá túú quidé-yu nchaa nàcuáa tàú-xi cunduu cadá-yu sá cúŭ-yu ñaní tnáhá ndíi. Te Yá Ndiöxí ní xáha<sup>n</sup>-gă xii ndíi Àbrahám: “Nchaa cue ñaní tnáhá tĕ Isàac téé cùu déhe ducu<sup>n</sup>-n, mee-ni cuè ñáyiú-á<sup>n</sup> cuu ñaní tnáhá-n”, duha ní xáha<sup>n</sup>-gă xii ndíi Àbrahám. <sup>8</sup>Te xǎ<sup>n</sup> cútnùní iní-ó să ñă ncháá ñáyiú cùu ñaní tnáhá ndíi Àbrahám cúŭ-yu ñáyiú cùu cuendá Yă Ndiöxí, chi mee-ni ñáyiú sàndáá iní nàcuáa ní cáhá<sup>n</sup>-gá cada-gá, ñáyiú-á<sup>n</sup> cúú cuendá-gá. <sup>9</sup>Te duha ndùu tnúhu ní xáha<sup>n</sup> Yă Ndiöxí xii ndíi Àbrahám: “Sáá nduu te yúhú cada-í te coo ìi<sup>n</sup> déhe-n ndìhi ñadìhí-n tă Sărá”, duha ní xáha<sup>n</sup>-gă xii ndíi.

<sup>10</sup>Te ñá díú-ní xǎ<sup>n</sup> ní quide Yá Ndiöxí, chi tnáhá ní ndatnúhu-gá ndìhi ndíi Rèbecá cútnáhá vitna ñùhu úú déhe ndíi ndìhi ndíi Isàac téé ní cuu ñaní tnáhá-ó ñí xíndecu ndéé sanaha. <sup>11-13</sup>Te cútnáhá vitna ñùhu-gá déhe ndíi Rèbecá, cútnáhá vátá cadá-gă-güexi ni ìi<sup>n</sup> sá cuèhé sá dúhá, te ni ìi<sup>n</sup> sá vâha, ní xáha<sup>n</sup> Yă Ndiöxí xii ndíi: “Déhe-n tĕe díhna na càcu te téé-á<sup>n</sup> tñi-dé nchaa tnúhu cáhá<sup>n</sup> déhe-n tĕe cùu uú ná càcu”, duha ní xáha<sup>n</sup>-gă xii

ndíi Rèbecá. Te ní quee ndáá-xi nàcuáa ní cáhá<sup>n</sup> Yă Ndiöxí núú tütú-gá núú cächí-xi: “Té Jàcób ní cuu váha iní-í núú-dě, te té Esàú ñá túú ní cùu váha iní-í núú-dě”, duha cächí-gá núú tütú-gá. Te duca<sup>n</sup> ñí cuu chi duca<sup>n</sup> ñí cachí méé-gă cunduu sá cãhá<sup>n</sup>-gá nchaa ñáyíu cuìní méé-gă, te ñá díú cuèndá ìí<sup>n</sup> chiu<sup>n</sup> quidé-yu cãhá<sup>n</sup> ñáhá-gă xií-yu.

14Te vá cúú tnàhí cáhá<sup>n</sup>-ó sã Yă Ndiöxí ñá túú quide váha-gá sá dúcá<sup>n</sup> quide-gá chi mee-gă ío ndáá quidé-gă! 15Te mee-gă ní xáha<sup>n</sup>-gă xii ndíi Moisés: “Cundàhú iní-í chindee-í mee-ni cuè ñáyíu cächí iní-í”, duha ní xáha<sup>n</sup>-gă xii ndíi. 16Te xíã<sup>n</sup> cútnùní iní-ó sã cùndàhú iní-gá ñáyíu chi duca<sup>n</sup> cuìní méé-gă cunduu, dico ñá túú cùndahú iní ñáhá-gă xií-yu cuèndá sá dúcá<sup>n</sup> cuìní-yu cada-gá, te ni ñà túú cùndahú iní ñáhá-gă xií-yu cuèndá sá ío ndùcu ndeé-yu quidé-yu ìí<sup>n</sup> sá quidě-yu. 17Te núú tütú Yă Ndiöxí cãhá<sup>n</sup>-xi nàcuáa ní xáha<sup>n</sup>-gă xii téé ní cuu Faràón téé ní xíndaha nació<sup>n</sup> Ègíptú, te duha ní xáha<sup>n</sup>-gă: “Yúhú ní quide-í yíndàha-n ñáyíu cuèndá cada-í titní núú sã cáda-í núú-n cuèndá cutnùní iní-n sã ío cãhnu cuu-í, te duca<sup>n</sup> nchaa ñáyíu ñuyíú cutnùní iní-yu sá yǔhú cúu-í Ndiöxí”, duha ní xáha<sup>n</sup>-gă xii téé ní cuu Faràón. 18Te xíã<sup>n</sup> cútnùní iní-ó sã Yă Ndiöxí cùndàhú iní-gá mee-ni cuè ñáyíu cächí iní méé-gă, te duca<sup>n</sup> ndàda díi-gá iní nchaa ñáyíu cächí iní méé-gă duca<sup>n</sup> càda-gá.

19Te sá dúhá cãhá<sup>n</sup>-í te dava-ndo quèsaha-ndo: “Ná cuèndá Yă Ndiöxí dácàa-gá cuéchi díquí ñáyíu núu ni ìí<sup>n</sup>-yu ñá ndácǔ-yu quehdé nihnú-yu cuèndá sá vã cáda Yă Ndiöxí nàcuáa cuìní-gá”, quesaha-ndo. 20Te chí cuãha cuèndá sá dìcò ñáyíu ñuyíú-a cùu-ndo te ñá túú ndùu váha-xi sá nchòhó cáhá<sup>n</sup>-ndó ìí<sup>n</sup> tnúhu sá ñà túú ndùu váha sá cúú-xí Yă Ndiöxí. Te duha na cãhá<sup>n</sup>-í núú-ndó nàcuáa tecú tnùní-gá-ndó nàcuáa ndùu tnúhu cãhá<sup>n</sup>-í. Te ñá túú xìní-ó sã ìí<sup>n</sup> quídi ñuhu cúñaha-xi xii ñáyíu ní cadúha ñaha xii-xi: “Ná cuèndá duha ní cadúha ñaha-n xii-í”, cúñaha-xi. 21Chi ñáyíu càdúha nchaa quídi-á<sup>n</sup> cuu-ni cadúha-yu ndíhi ñuhu cuèi nása na cùnduu quídi cadúha-yu canehe chiu<sup>n</sup>-yu, chi ìí<sup>n</sup>-ni ñuhu cadúha-yu quídi cánehe chiu<sup>n</sup>-yu ndi tnahá nduu sàcòo-yu vico ndíhi quídi sá cãnehe chiu<sup>n</sup>-yu nduu cùtexínu.

22Te diu-ni duca<sup>n</sup> quide Yá Ndiöxí, chi cuìní-gá dandòho-gá ñáyíu ñá túú quide nchaa nacúaa nduu vétú iní-gá, te cada-gá nàcuáa cutnùní iní-yu sá ío cãhnu cuu-gá. Te sa ndècu túha-ná-yu sá quíhí<sup>n</sup>-yu núú ùhú núú ndàhú, te cuèi duca<sup>n</sup> dico ío ta quide cahnu iní-gá cuáhá<sup>n</sup>. 23Te duca<sup>n</sup> quide-gá cuèndá cutnùní iní nchaa ñáyíu ñuyíú sã ío váha quide-gá sá cúú-xí nchaa nchoo ñáyíu cùndahú iní-gá, chi ní cachí-gá sá nchóó cuè ñáyíu cùndahú iní-gá nduu táhú-ó cùndecu-o ndíhi-gá núú ío váha càa ndecu-gá. 24Te dava nchoo ñáyíu ní cáhá<sup>n</sup> Yă Ndiöxí cúú-ó ñáyíu isràél, te dava-o cùu-o ñáyíu ñá túú cùu ñáyíu isràél. 25Te ní quee ndáá-xi nàcuáa ní

xáha<sup>n</sup> Yă Ndiöxí xii ndíi Òseás téé ní xóo cáhá<sup>n</sup> tnúhu-gá ndéé sanaha nĩ chídó tnùní ndíi núú tütú-gá núú cächí-xi:

Ñáyiú ñá túú cùu cuendá-í ní cùu te nduu cuendá-í-yu,  
te ñiú-ni ñáyiú-á<sup>n</sup> ñà túú cùu váha iní-í núú-yu ni cùu, dico vitna  
cùu váha iní-í núú-yu.

**26** Te ñiú-ni ñuú núú dúcá<sup>n</sup> nĩ cachí-í sá ñà túú ñáyiú cùu cuendá-í  
ñiú-ni ñuú-á<sup>n</sup> coo ñáyiú cuu déhe yúhú Dútú Ndiöxí Yaá ndécú  
tũu andiú.

Duha ní xáha<sup>n</sup> Yă Ndiöxí xii ndíi Òseás ní chídó tnùní ndíi núú tütú-gá.

**27** Te ndíi Chàíá téé ní xóo cáhá<sup>n</sup> tucu tnúhu Yá Ndiöxí ndéé sanaha nĩ  
cáhá<sup>n</sup> ndíi cuendá ñáyiú isràél, te duha ní cachí ndíi: “Cuèi cuéhé víhí  
ñáyiú isràél dàtná cuéhé ñuhu cúchí làmár dico sacú-ni-yu vá quíní-yu  
tnúndòho tnúhu ndàhú. **28** Te Yá Ndiöxí ío ndíhi cada-gá nchaa nàcuáa  
càhá<sup>n</sup>-gá ñuyíú”, duha ní cachí ndíi. **29** Te ní cáhá<sup>n</sup> tucu ndíi nàcuáa cada-xi  
ndéé cuèé-gá, te ní cachí ndíi:

Yá Ndiöxí Yaá táxí tnùní nchaandi túhú sá ìó andiú ndíhi ñuyíú ñà  
túú ní dànaa-gá nchaa ñáyiú isràél, chi núu ni ndíhi-yu danàa  
ñaha-gá,

te nchoo cùu-o datná ní cuu nchaa ñáyiú ní xíndecu ñuú Sòdomá  
ndíhi nchaa ñáyiú ní xíndecu ñuú Gòmorrá, te ndíhi-o nàa datná  
ní naa nchaa ñáyiú-á<sup>n</sup> ní cùu.

Duha ní cachí ndíi.

### **Ñáyiú isràél ñá túú sàndáá iní-yu tnúhu Xítohó Jesucristú**

**30** Te sá cuendá xíá<sup>n</sup> ñuú vitna cächí tnúhu-í xii-ndo sã cuè ñáyiú ñá túú  
cùu ñáyiú isràél ñá túú ní nànducu nihnú-yu nàcuáa cadá-yu cudíú-yu núú  
Yă Ndiöxí, dico vitna cùdiú-yu núú-gã chi ní sàndáá iní-yu Xítohó  
Jesucristú. **31** Te ñáyiú isràél nchícú<sup>n</sup> nihnú-yu tnúhu sá dánèhé ñáhá xíi-yu  
nàcuáa cadá-yu cudíú-yu núú Yă Ndiöxí dico ñá túú cùdiú-yu núú-gã chi  
ñá ndácũ-yu cadá-yu nchaa nàcuáa càhá<sup>n</sup>-xi. **32** Te duca<sup>n</sup> ñà túú cùdiú-yu  
núú Yă Ndiöxí chi ñá túú sàndáá iní-yu Xítohó Jesucristú, te sàni iní-yu sá  
sã cuendá mee-ni nchaa sá quidé mèè-yu cudíú-yu núú-gã, te sá dúcá<sup>n</sup>  
quidé-yu te cùú-yu dàtná ñi<sup>n</sup> ñáyiú nguñenu ñi<sup>n</sup> yúú te ndùá-yu. Te duca<sup>n</sup>  
sãtnahá-xi cùú-yu chi ñá túú cùu váha iní-yu núú Xítohó Jesucristú. **33** Te  
quèe ndáá-xi nàcuáa ní cáhá<sup>n</sup> Yă Ndiöxí ñi<sup>n</sup> xichi núú tütú-gá núú cächí-xi:

Yúhú táxí ndècu-í ñi<sup>n</sup> téé ñuú Sìón, te cuu-dé dàtná ñi<sup>n</sup> yúú, te yúú-ã<sup>n</sup>  
nguñenu ñáyiú te nduá-yu,  
te nchaa ñáyiú na quíndáá iní ñáhá xii-dé, te vá ndíxí cuèchi iní-yu  
sá dúcá<sup>n</sup> nĩ sàndáá iní ñáhã-yu xii-dé.

Duha cächí-gá núú tütú-gá.



**10** <sup>1</sup>Te nchòhó ñáyiú ndècu ndìhi-í ichi Xítohó Jesucristú cèchí tnúhu-í xii-ndo sǎ cǎhá<sup>n</sup> ndìhi-í Yǎ Ndiöxí cuendá ñáyiú isràél, chi ío cuìní-í sá nánìhí tàhú-yu. <sup>2</sup>Te na cǎhá<sup>n</sup> ndáá-í cuendá-yu sá ïo ndùcu ndeé-yu xínu cuechí-yu núú Yǎ Ndiöxí, te òcò-ni sá ñà túú quède-yu nàcuáa cuìní méé-gǎ cadá-yu. <sup>3</sup>Chi ñà túú quède cuendá-yu nàcuáa cuìní Yǎ Ndiöxí cada ñaha-gǎ xií-yu nàcuáa cudùu-yu núú-gǎ, te quède-ní-yu nàcuáa sàni iní méé-yu cudùu-yu núú-gǎ te ñà túú cuìní-yu tñí-yu tnúhu cǎhá<sup>n</sup>-gǎ nàcuáa cudùu-yu núú-gǎ. <sup>4</sup>Te Xítohó Jesucristú ní quède-gǎ cuendá sá vǎ cúnùu-gǎ nchaa tnúhu ní chídó tñùní ndíi Moisés, te nchaa ñáyiú na quèndáá iní ñáhá xii-gǎ te diu-gǎ cada te cudùu-yu núú Yǎ Ndiöxí. <sup>5</sup>Te ndíi Moisés cǎhá<sup>n</sup> ndíi núú tütú ndíi cuendá ñáyiú cuìní cudùu núú Yǎ Ndiöxí cuendá sá nchìcú<sup>n</sup> nihnú-yu nchaa nàcuáa ní cǎhá<sup>n</sup> ndíi. Te ní cǎchí ndíi sá ncháá ñáyiú na càda nchaa nàcuáa ní xáha<sup>n</sup> Yǎ Ndiöxí xii ndíi ní chídó tñùní ndíi te naníhí tàhú-yu, te núu òcò ndacú-yu cadá-yu nchaa nàcuáa ní cǎhá<sup>n</sup> ndíi. <sup>6</sup>Dico vitna núu na quèndáá iní-ó Xítohó Jesucristú, te cudùu-o núú Yǎ Ndiöxí. Te duha cǎchí tnúhu ní chídó tñùní ndíi núú tütú-gǎ: “Vá cǎní iní-ndó sǎ xíní ñùhu-xi cada-ndo ïi<sup>n</sup> sá vǎ yòo tñàhí ndàcu cada sá cǎá tǔu-ndo àndiu te cúñaha-ndo xii Cristú cuu<sup>n</sup>-ndo ndìhi-gǎ núú ñùyíu-a. <sup>7</sup>Te ni vǎ cǎní tǔcu iní-ndó sǎ quèhí<sup>n</sup> túu-ndo núú xindecu nchaa ñáyiú ní xíhí te cada-ndo sǎ Cristú ndoto-gǎ”, duha cǎchí tnúhu-á<sup>n</sup> sǎ vǎ dúcá<sup>n</sup> cǎni iní-ó. <sup>8</sup>Te cǎchí tucu tnúhu-á<sup>n</sup>: “Tnúhu Yǎ Ndiöxí sá ndécú ndìhi ñaha-xi xii-ndo chi sàni iní-ndó cuendá tnúhu-á<sup>n</sup> te cǎhá<sup>n</sup>-ndó”, duha cǎchí tnúhu-á<sup>n</sup>. Te tnúhu sá ndécú ndìhi-ndo-á<sup>n</sup> cúu-xí tñùhu cǎhá<sup>n</sup>-ndí núú ñáyiú, te xini ñùhu-xi sá quèndáá iní-yu tnúhu-á<sup>n</sup>. <sup>9</sup>Te núu na ñùnuu-ndo cǎhá<sup>n</sup>-ndó sǎ Xítohó Jesucristú cúu-gǎ Xítohó-ndó, te quèndáá iní-ndó nì yuhu ni iní-ndó sǎ Yǎ Ndiöxí ní dándótó-gǎ Xítohó Jesucristú, te naníhí tàhú-ndó te núu duca<sup>n</sup> na càda-ndo. <sup>10</sup>Te nchaa ñáyiú duca<sup>n</sup> sàndáá iní te cǎhá<sup>n</sup>-yu sá Xítohó Jesucristú cúu-gǎ Xítohó-yu, ñáyiú-á<sup>n</sup> cudùu-yu núú Yǎ Ndiöxí te naníhí tàhú-yu.

<sup>11</sup>Te núú tütú Yǎ Ndiöxí cǎchí-xi sá nì ïi<sup>n</sup> ñáyiú sàndáá iní ñáhá xii Xítohó Jesucristú vá ndíxí cuèchi iní-yu sá dúcá<sup>n</sup> sàndáá iní ñáhǎ-yu xii-gǎ. <sup>12</sup>Te sá cúu-xí Xítohó Jesucristú chi ïi<sup>n</sup>-ni cùu ñáyiú isràél ndìhi ñáyiú ñà túú cùu ñáyiú isràél, chi diu-gǎ cúu-gǎ Yaá cúnùu taxi tñuní-gǎ nchaa ñáyiú, te ío váha quède-gǎ sá cúu-xí nchàa ñáyiú cǎhá<sup>n</sup> ndìhi ñaha xii-gǎ. <sup>13</sup>Te quèe ndáá-xi nàcuáa cǎhá<sup>n</sup>-xi núú tütú Yǎ Ndiöxí núú cǎchí-xi: “Nchaa ñáyiú na cǎhá<sup>n</sup> ndàhú núú Xítohó Jesucristú sá dácǎcu nihnu ñaha-gǎ xií-yu, te ñáyiú-á<sup>n</sup> naníhí tàhú-yu”, duha cǎchí-xi núú tütú-gǎ. <sup>14</sup>Te ñáyiú-á<sup>n</sup> vǎ nihí-yu nàcuáa cǎhá<sup>n</sup> ndàhú-yu núú-gǎ te núu ñà túú sàndáá iní ñáhǎ-yu xii-gǎ, te ni vǎ nihí-yu nàcuáa cadá-yu quèndáá iní ñáhǎ-yu xii-gǎ te núu vátá cùndèdóho-gǎ-yu tnúhu-gǎ, te ni vǎ nihí-yu

tnúhu-gá te núu vá yõo quíhí<sup>n</sup> cútnuhu ñaha xii-yu. **15**Te ni vă yõo quíhí<sup>n</sup> duca<sup>n</sup> cútnuhu ñaha xii-yu tnúhu-gá te núu Yá Ndiõxí vá téndaha-gá ñáyiú quíhí<sup>n</sup> cútnuhu ñaha xii-yu. Te núu tùtú Yá Ndiõxí càchí-xi: “Ío vii ío váha cùu iní-ó vëxi ñáyiú dānehé ñáhá xii-o nacuáa ndùu tnúhu sá càhá<sup>n</sup> nācuáa naníhí tǎhú-ó”, duha càhá<sup>n</sup>-xi núu tùtú-gá.

**16**Te ñá ncháǎ-yu cuení-yu quindáá iní-yu tnúhu-á<sup>n</sup>. Te ní quee ndáá-xi nācuáa ní xáha<sup>n</sup> ndíi Chàíá xii Yá Ndiõxí te duha ní xáha<sup>n</sup> ndíi xii-gá: “Yòhó Dútú Ndiõxí na nācāni tnúhu-í núu-n sǎ ïo sacú-ni ñáyiú sàndáá iní-yu tnúhu càhá<sup>n</sup>-ndí”, duha ní xáha<sup>n</sup> ndíi xii-gá. **17**Te xini ñuhu-xi sá dǐhna-gá cundedóho-yu tnúhu-á<sup>n</sup> cuendá duca<sup>n</sup> te quindáá iní-yu, te tnúhu-á<sup>n</sup> cúu-xí tnúhu Xítóhó Jesucristú.

**18**Te vá cúu cǎhá<sup>n</sup>-ó sǎ ñà túú ní ñíhí ñáyiú isràél tnúhu-gá, chi ncháá-yu ní ñíhí-yu tnúhu-gá, chi núu tùtú Yá Ndiõxí càchí-xi:

Cue tée ní cǎhá<sup>n</sup> tnúhu Yá Ndiõxí ní cǎhá<sup>n</sup>-güedé tnúhu-gá núu ñáyiú,  
te tnúhu-á<sup>n</sup> ñí xité nuu-xi ñíhí ñuyíú.

Duha càchí-xi núu tùtú-gá. **19**Te ni vă càhá<sup>n</sup>-ó sǎ ñáyiú isràél ñà túú ní cùu tnuní iní-yu nācuáa ndùu tnúhu-gá chi ní tecú tnùní-yu. Te ndéé sanaha ñí chídó tnùní ndíi Moisés nācuáa ní xáha<sup>n</sup> Yá Ndiõxí xii ñáyiú isràél, te duha ní xáha<sup>n</sup>-gǎ xii-yu:

Yúhú cada váha-í ncháa ñáyiú ñà túú cùu ñáyiú isràél, ñáyiú ñà túú cùtnuní iní-xi nācuáa cada váha cundecu núu-í,  
te nchòhó cudéé<sup>n</sup>-ndó ñǔh-yu te cuu cuédú iní-ndǔ-yu.

Duha ní xáha<sup>n</sup> Yá Ndiõxí xii-yu te duca<sup>n</sup> ñí chídó tnùní ndíi Moisés. **20**Te ndíi Chàíá ñà túú tnàhí ni yùhú ndíi ní quide ndíi núu Yá Ndiõxí ní cǎhá<sup>n</sup> ndíi tnúhu-gá, te ní cachí ndíi:

Ñáyiú ñà túú nānducu ñaha xii-í ní cùu ní naníhí ñáhǎ-yu xii-í,  
te ni ñà túú ndùcu tnúhu ñáhǎ-yu xii-í ní cùu te ní xiní ñáhǎ-yu.

Duha ní cachí ndíi Chàíá ní cǎhá<sup>n</sup> ndíi tnúhu Yá Ndiõxí. **21**Te ní quide tucu ndíi núu Yá Ndiõxí ní cǎhá<sup>n</sup> ndíi tnúhu-gá cuendá ñáyiú isràél, te ní cachí ndíi: “Ncháa-ni nduu yìhi-í càhá<sup>n</sup>-í ñáyiú isràél te ñà túú cuení-yu quindáá iní-yu chi ío sàá iní-yu”, duha ní cachí ndíi Chàíá ní cǎhá<sup>n</sup> ndíi tnúhu Yá Ndiõxí.

### Cuendá ñáyiú isràél ñáyiú naníhí tǎhú

**11** **1**Te cuéi duca<sup>n</sup> dico vá càhá<sup>n</sup>-ó sǎ Yá Ndiõxí dáquèe tǐhú-gǎ ñáyiú isràél chi diu-ni ñáyiú-á<sup>n</sup> cúu cuendá-gá, chi yúhú tnàhá-í cúu-í mei tēe isràél, te ñānī tnáhà-í ní cuu ndíi Àbrahám tée ní xindecu ndéé sanaha vīhi-gá, te diu-ni ñānī tnáhà-í ní cuu tucu ndíi Benjámín. **2**Te ndéé sanaha dùca<sup>n</sup> ní cachí Yá Ndiõxí sá nchǔhú ñáyiú isràél cúu-ndí ñáyiú cùu

cuendá-gá, te ñá túú dàquee tǐhú ñáhá-gă xii-ndí, te nchòhó sa xìní-ndó nàcuáa càhá<sup>n</sup>-xi núú tǔtú Yă Ndiöxí núú càchí-xi nàcuáa ní quide té Èliás ní ndacá<sup>n</sup> cuéchi-dé núú-gă cuendá ñáyiú isràél. <sup>3</sup>Te duha ní xáha<sup>n</sup>-dě xii-gá: “Yòhó Dútú Ndiöxí, ná nàcani tnúhu-í núú-n sǎ ñí sahní-yu cue tée càhá<sup>n</sup> tnúhu-n, te ní dátanú-yu núú xihí quiti ndùu táhú-n, te yúhú-nǎ ní cácu-í ndécù-í dico nànducu ñáhá-yu chi tnàhá-í cuìní-yu cahni ñáhá-yu xii-í”, duha ní xáha<sup>n</sup>-dě xii Yă Ndiöxí. <sup>4</sup>Te Yă Ndiöxí ní xáha<sup>n</sup>-gă xii-dé: “Sa ní dáquée dǐ<sup>n</sup>-í úsá mǐl cue tée cùu cuendá-í, te ñá túú nèhe-güedé sá yíñùhu núú Bàál sá càchí-yu cùu ndiöxí-yu te ñá ndàá sá ndiöxí cúú-xí”, duha ní xáha<sup>n</sup>-gă xii té Èliás. <sup>5</sup>Te duca<sup>n</sup> sǎtnahá-xi cùu vitna chi xǐndecu ñáyiú ní cáhá<sup>n</sup>-gá ní chìtnahá ñáhá xii-gá, te duca<sup>n</sup> ñí quide-gá chi ní cundàhú iní ñáhá-gă xií-yu. <sup>6</sup>Te duca<sup>n</sup> ñí cáhá<sup>n</sup> ñáhá-gă xií-yu sá cúndàhú iní ñáhá-gă, te ñá díú cuendá ì<sup>n</sup> chiu<sup>n</sup> quidé-yu duca<sup>n</sup> nì cáhá<sup>n</sup> ñáhá-gă xií-yu, chi núu dícó cuendá ì<sup>n</sup> chiu<sup>n</sup> quidé-yu duca<sup>n</sup> nì cáhá<sup>n</sup> ñáhá-gă xií-yu ña, te ñá díú-gă sá cúú iní méé-gă duca<sup>n</sup> nì cáhá<sup>n</sup> ñáhá-gă xií-yu te núu duca<sup>n</sup>.

<sup>7</sup>Te na càchí tnúhu-í xii-ndo nàcuáa cùu vitna sá ñáyiú isràél cuìní-yu cudǐú-yu núú Yă Ndiöxí dico ñá ndácǔ-yu, dico dava ñáyiú ní cáhá<sup>n</sup>-gá ñáyiú-á<sup>n</sup> cúdíú-yu núú-gă, te ñáyiú duca<sup>n</sup> ñà túú cùdíu núú-gă-á<sup>n</sup> ïo ní cuu sàá iní-yu núú-gă. <sup>8</sup>Te ní quee ndáá-xi nàcuáa càhá<sup>n</sup>-xi núú tǔtú Yă Ndiöxí núú càchí-xi: “Yă Ndiöxí ní cachí-gá sá cúú-yu ñáyiú ío ñí dǐquí-xi, chi cuèi ndèhé-yu nàcuáa càhá<sup>n</sup> tnúhu-gá dico ñá cútnùní iní-yu nàcuáa càhá<sup>n</sup>-xi, te cuèi ndèdóho-yu dico ñá túú quèe díquí-yu, te duca<sup>n</sup>-ni quidé-yu ndéé vitna”, duha càchí-xi núú tǔtú-gá. <sup>9</sup>Te ndíi Dàvíí ní cachí ndíi:

Ñáyiú ío váha ndècu te cùdíí iní-yu quidé-yu vico,  
dico yáha-yu dàtná yáha ì<sup>n</sup> quiti ngáva trampá àdi ì<sup>n</sup> quiti ñá  
cútnùní iní-xi quée xití ñunu,  
chi cuíta nihnú-yu te nacháhu-yu nchaa sá quidě-yu.

<sup>10</sup>Te cùú-yu ñáyiú ñá túú vèdana tècú tnùní, te cùu tucú-yu dàtná ì<sup>n</sup>  
ñáyiú ío ndòho nchido ì<sup>n</sup> sá vèe.

Duha ní cachí ndíi Dàvíí.

### Ñáyiú ñá túú cùu ñáyiú isràél naníhí tàhú-yu

<sup>11</sup>Te cuèi duca<sup>n</sup> dico vá càchí-ó sǎ sà dúcá<sup>n</sup> ñà túú ní quide ndáá ñáyiú isràél te ní xíta nihnu duú<sup>n</sup>-yu, te ñáhá chi sá dúcá<sup>n</sup> ñí quidé-yu te ní ngúndecu ndíhi dava-gá ñáyiú tnúhu sá càhá<sup>n</sup> nàcuáa naníhí tàhú-yu, te ñáyiú isràél quiní-yu nàcuáa naníhí tàhú ñáyiú ñá túú cùu ñáyiú isràél, te tnàhá-yu cudǐí iní-yu naníhí tàhú-yu. <sup>12</sup>Te sá dúcá<sup>n</sup> ñí quide sàá iní-yu ñá túú ní quide ndáá-yu núú Yă Ndiöxí, te xǐá<sup>n</sup> ní cuu-xi ì<sup>n</sup> sá vǎha sá cúú-xí

ñāyiu nihī ñuyíu, dico sáá nduu te cada ñāyiu isràél nchaa nācuáa càhá<sup>n</sup> Yă Ndiöxí, te dāvá-á<sup>n</sup> ïo-gá váha cuu xii nchaa ñāyiu nihī ñuyíu.

13Te nchòhó ñāyiu ñá túú cùu ñāyiu isràél càchí tnúhu-í xii-ndo sã Yă Ndiöxí ní cachí-gá sá càhá<sup>n</sup>-í tnúhu-gá núú-ndó, te yúhú càchí-í sá ïo càhnu cuu chiu<sup>n</sup> quide-í. 14Te duha càhá<sup>n</sup>-í cuendá sá nūu cudana ïo dava ñāyiu cùu ndi mee-í cudíí ìní-yu cada váha ñaha Yă Ndiöxí xií-yu dàtná quidé váha ñaha-gã xii-ndo, te naníhí tãhú-yu. 15Te sá cuendá sá ñí quee tíhú ñāyiu isràél ní nacáhá<sup>n</sup> cáhnú ìní tnáhá ñāyiu nihī ñuyíu ndihí Yă Ndiöxí, dico na sáá nduu núcúndecu váha ñāyiu isràél ndihí Yă Ndiöxí, te ío-gá váha tnahá ñāyiu nihī ñuyíu, te ñāyiu-á<sup>n</sup> cada iní-ó sã cúú-yu dàtná ñāyiu ní xíhí, dico dāvá-á<sup>n</sup> cada tucu iní-ó sã cúú-yu dàtná ñāyiu ní ndoto chi nucúndecu váha-yu ndihí-gá. 16Te núu sá lúhá-ní ïí<sup>n</sup> tílúlú yusa<sup>n</sup> cāváha te ñiu-ni duca<sup>n</sup> cāváha nihí. Te núu cāváha yóho ïí<sup>n</sup> yutnu te ñiu-ni duca<sup>n</sup> cāváha-xi nihí-xi. Te ñiu-ni duca<sup>n</sup> sãtnahá-xi cùu ñāyiu isràél, chi ñaní tnáhã-yu ní xíndecu ndéé sanaha ñí cuú-yu ñāyiu ní cuu cuendá ñáhá Yă Ndiöxí, te ñiu-ni duca<sup>n</sup> cùu cuendá ñáhá-gã xii mée-yu ndéé vitna.

17Te ïo ïí<sup>n</sup> yutnu váha nàni olívú, te dava dité yutnu-á<sup>n</sup> ñí téhndé te ní nucódó dité yutnu òlívú cùtexínu, te mee-nã yutnu òlívú váha-á<sup>n</sup> ïo váha quide-xi nchito dité yutnu òlívú cùtexínu-á<sup>n</sup>. Te dité nchaa yutnu òlívú váha-á<sup>n</sup> cúú-xí dàtná ñāyiu isràél, te nchaa dité-xi sá ñí téhndé-á<sup>n</sup> cúú-xí ñiu-ni ñāyiu isràél ñāyiu ñá túú tnáhá tnúhu ndihí Yă Ndiöxí. Te dité yutnu òlívú cùtexínu sá ñí nucódó tnáhá-ã<sup>n</sup> cúú-xí dàtná ñāyiu ñá túú cùu ñāyiu isràél tnáhá tnúhu ndihí Yă Ndiöxí. 18Te vá cání ìní-ndó sã sà dúcá<sup>n</sup> ndècu váha-ndo ndihí Yă Ndiöxí te ío cùnūu-ndo dacúúxí ñāyiu isràél, te vá dúcá<sup>n</sup> càni iní-ndó chi sá cuendá nchaa ñaní tnáhá ñāyiu isràél ní xíndecu ndéé sanaha duca<sup>n</sup> ndècu váha-ndo ndihí Yă Ndiöxí vitna, te ñá díú sã cuendá nchòhó ndécú ndihí váha ñāyiu-á<sup>n</sup> Yă Ndiöxí vitna.

19Te cudana sàni iní-ndó te càchí-ndó sã ñāyiu isràél ní quee tíhú-yu cuendá sá nchòhó nucuñí-ndó nūu-yu nucúndecu váha-ndo ndihí Yă Ndiöxí. 20Te ndáá sá ñí quee tíhú-yu chi ñá túú ní sàndáá iní ñáhã-yu xii-gá, te nchòhó ío váha cùu ndecu-ndo ndihí-gá chi ní sàndáá iní-ndó-gã, dico vá càchí-ndó sã ïo càhnu cuu-ndo, te ío váha chí cuãha cuendá nācuáa cundecu-ndo. 21Te cue ñāyiu isràél cúú-yu ñāyiu cùu cuendá-gá ní cùu te ní dáquée tíhú ñáhã-gã xií-yu cuendá sá ñà túú ní sàndáá iní ñáhã-yu xii-gá, te tnáhá nchòhó daquèe tíhú ñáhã-gã xii-ndo te núu na càda-ndo datná ní quide ñāyiu-á<sup>n</sup>. 22Te chí cádá cuendá sá Yă Ndiöxí ío váha iní-gá, dico cùdée<sup>n</sup>-gã núú nchàa ñāyiu ñá túú sàndáá iní ñáhã xìi-gá, dico sá cúú-xí nchòhó cue ñāyiu sàndáá iní ñáhã xìi-gá chi ío váha iní-gá. Te duca<sup>n</sup>-ni cùnduu váha iní-gá sá cúú-xí-ndó te núu vá dáñá ndèé-ndó càda-ndo nācuáa càhá<sup>n</sup>-gá cuendá sá ïo váha iní-gá, te núu ñáhã te tnáhã

nchòhó quee tìhú-ndó dàtná ní quee tìhú ñàyiù isràél, ñàyiù ñá túú ní sàndáá iní ñáhá xii-gá. **23**Dico núu ñàyiù isràél ñàyiù ní dáquéé tìhú ñáhá Yă Ndiöxí quíndáá iní ñáhă-yu xii-gá te nduu cuendá ñáhá tùcu-gá xií-yu, te ñàyiù-á<sup>n</sup> cúũ-yu dàtná dava dité yutnu òlívú sá ñí téhndé te ní nucódó tnáhá tùcu. Te duca<sup>n</sup> sätnahá-xi cùú-yu te núu na quíndáá iní ñáhă-yu xii-gá. **24**Te nchòhó cúú-ndó dàtná nchaá dité yutnu òlívú cùtexínu, chi ñá díú ñàyiù isràél cúú-ndó, te dité nchaá yutnu òlívú cùtexínu-á<sup>n</sup> ñí nucódó-xi núú dité yutnu òlívú váha-á<sup>n</sup>. Te yáchí-gá nucúndecu váha ñàyiù isràél ndìhi Yă Ndiöxí, chi cùú-yu dàtná nchaá dité yutnu òlívú váha sá ñí téhndé te ní nucódó tnáhá tùcu. Te duca<sup>n</sup> sätnahá-xi cùú-yu te núu na quíndáá iní ñáhă-yu xii-gá.

**Sáá nduu te naníhí tàhú ñàyiù isràél**

**25**Te nchòhó ñàyiù ndècu ndìhi-í ichi Xítóhó Jesucristú, na càchí tnúhu-í xii-ndo ì<sup>n</sup> tnúhu ndùu yuhu ni cuu, cuendá sá vă cání ìní-ndó sã ïo-gá váha sàá díquí-ndó dàcúxí ñàyiù isràél, chi dava ñàyiù isràél cúú sàá iní-yu núú Yă Ndiöxí nini na ndìhi ñàyiù ní cachí Yă Ndiöxí ngúndecu váha ndìhi ñáhă-yu xii-gá, ñàyiù ñá túú cùu ñàyiù isràél. **26**Te nduu na ndìhi ñàyiù-á<sup>n</sup> ngúndecu váha-yu ndìhi Yă Ndiöxí, te dàvá-á<sup>n</sup> naníhí tàhú ñàyiù isràél chi quee ndáá-xi nàcuáa càhá<sup>n</sup> Yă Ndiöxí núú tütú-gá núú càchí-xi:

Ndàa ñuú Sìón quixi Yaá cada naníhí tàhú nchaá ñàyiù,  
te diu-ni Yaá-á<sup>n</sup> cada-gá cuendá sá dáñá nchàa ñàyiù isràél ichi  
cuèhé ichi duha.

**27**Te yúhú cada càhnu iní-í nchaá cuéchi ñàyiù isràél, chi cada-í dàtná ní cachí-í ndéé sanaha.

Duha càchí Yă Ndiöxí núú tütú-gá.

**28**Te sá cuendá tnúhu sá càhá<sup>n</sup> nàcuáa naníhí tàhú-ó xíã<sup>n</sup> cúú ùhú iní ñàyiù isràél Yă Ndiöxí, te sá dúcá<sup>n</sup> quidé-yu xíã<sup>n</sup> nchòhó ní níhí-ndó tnúhu sá càhá<sup>n</sup> nàcuáa naníhí tàhú-ndó. Te ní cachí Yă Ndiöxí sá ñàyiù isràél cuu cuendá-gá, te cùu iní ñáhá-ní-gă xií-yu, te duca<sup>n</sup> quide-gá chi duca<sup>n</sup> ñí xáha<sup>n</sup>-gă xii cue ñaní tnáhă-yu ní xíndecu ndéé sanaha. **29**Te Yă Ndiöxí ñá túú ndùu úhú iní-gá ì<sup>n</sup> sá táxí-gă, te ni ñà túú ndìxi cuéchi iní-gá sá càhá<sup>n</sup> ñáhă-gă xii-o. **30**Te nchòhó chi ñá túú sàndáá iní-ndó Yă Ndiöxí ní cùu, dico vitna nini ñà túú sàndáá iní ñáhá ñàyiù isràél xii-gá, te ní cundàhú iní ñáhă-gă ní dácăcu nihnu ñaha-gă xii-ndo núú ùhú núú ndàhú. **31**Te vitna quidé-yu dàtná ní xóo cada nchòhó cútnáhá ñá túú ní xóo quíndáá iní-ndó-gă. Dico sáá nduu te natuha ñáhă-yu xii-gá te dácăcu nihnu ñaha-gă xií-yu sá cúndàhú iní ñáhă-gă dàtná ní quide ñaha-gă xii nchòhó. **32**Te Yă Ndiöxí ní dáñá-gă sá dúcá<sup>n</sup> cùnduu saá iní nchaá ñàyiù cuendá cuìní-gá cundàhú iní ñáhă-gă xií-yu.



**33**Te súúni vǎha quide ñaha Yá Ndiöxí xii-o, te ío váha xíní-gá nchaa cuéi sá ío andiu te cuéi sá ío ñuyíú-a, te duca<sup>n</sup> ío váha sàá nchaa sá xíní tnùní-gá. Te ñá ndácú-ó cùtnuní iní-ó nǎ cúú nchàa sá sání iní-gá cada-gá, te ni ñá ndácú-ó cùtnuní iní-ó nàcuáa ndùu cuendá nchaa sá quidé-gǎ. **34**Te núú tùtú-gá càchí-xi: “Vá yõo ì<sup>n</sup> cùtnuní iní-xi nàcuáa sàni iní Yá Ndiöxí, te ni vǎ yõo ì<sup>n</sup> ndàcu dacahu iní ñáhá xii-gá nàcuáa cáhá<sup>n</sup>-gá. **35**Te Yá Ndiöxí ñá túú quide yica iní-gá cada-gá sá vǎha sá cúú-xí ñǎyiu cuendá ì<sup>n</sup> sá sǎñhá-yu xii-gá chi ñá túú dùca<sup>n</sup> quide-gǎ”, duha càchí-xi núú tùtú-gá. **36**Te duca<sup>n</sup> chi mee Yá Ndiöxí ní taxi ndecu-gá nchaandi túhú sá ío ñuyíú, te diu-ni mee-gǎ táxí tnùní-gá nchaa sá ñí taxi ndecu-gá, te nchaa cùu-xi cuendá-gá. Te vitna chí ná càchí-ó sǎ ío càhnu cuu-gá ni caa ni quíhí<sup>n</sup>. Te duca<sup>n</sup> na cùnduu.

**Cada-o nàcuáa nduu vétú iní Yá Ndiöxí**

**12** **1**Te vitna nchòhó ñáyiu ndècu ndihi-í ichi Xítóhó Jesucrìstú càchí tnúhu-í xii-ndo sǎ Yá Ndiöxí cùndàhú iní ñáhá-gǎ xii-o chindee ñaha-gá, núu xíǎ<sup>n</sup> càhá<sup>n</sup> ndàhú-í núú-ndó sǎ dáñá-ndó mèe-ndo núú ndáhá-gǎ, te cada iní-ndó sǎ cúú-ndó dàtná ì<sup>n</sup> táhú sǎ nchító-ó ñí nduu táhú-gǎ. Te cuu-ndo ñáyiu váha ñáyiu cada nchaa nàcuáa nduu vétú iní Yá Ndiöxí chi duca<sup>n</sup> tàú-ndó càda-ndo sá cúú-xí-gǎ. **2**Te vá cànchìcú<sup>n</sup> nihnu-gá-ndó càda-ndo datná xǐquide nchaa ñáyiu ndècu ichi cuehé ichi duha ndècu ñuyíú-a, te vá cúhú<sup>n</sup>-gǎ iní-ndó ìchi cuehé ichi duha-á<sup>n</sup>, chi mee-ñá sá vǎha cuhu<sup>n</sup> iní-ndó, te duca<sup>n</sup> te cutnùní iní-ndó nchàa nacuáa cuìní Yá Ndiöxí cada-ndo, te nchaa sá cuìní-gá cada-ndo cùu-xi mee-ni sá vǎha, sá ío váha ndùu vétú iní-gá, te cùu-xi nchaa sá xíní ñùhu-xi cada-ndo núú-gǎ.

**3**Te sá cuendá chiù<sup>n</sup> ní cundàhú iní ñáhá Yá Ndiöxí ní taxi-gá xii-í xíǎ<sup>n</sup> nùu na càhá<sup>n</sup>-í dóho-ndo vitna: Vá cání iní-ndó ì<sup>n</sup> sá ñà túú tàú-ndó càni iní-ndó te cucaha<sup>n</sup>-ndo sǎ ío càhnu cuu-ndo. Te nchòhó ní sándáá iní-ndó Yá Ndiöxí nùu chindee ñaha-gá xii-ndo, te vitna chí cuǎha cuendá nùu ná daha núú chiù<sup>n</sup>-gá ndacu-ndo càda-ndo. **4**Te nchoo tìtní xichi cùu yiqui cuñú-ó, te ndi díí<sup>n</sup> ndì díí<sup>n</sup> chiù<sup>n</sup> quide-xi ì<sup>n</sup> ì<sup>n</sup>-xi. **5**Te duca<sup>n</sup> sǎtnahá tucu-xi cùu nchoo ñáyiu ndècu ndihi Xítóhó Jesucrìstú chi cuéi ná daha tnàhá-ó dico ì<sup>n</sup>-ni cùu-o ndihi-gá, te duca<sup>n</sup> mèe-o tucu ì<sup>n</sup>-ni cùu-o.

**6**Te mee Yá Ndiöxí ní cundàhú iní ñáhá-gǎ xii-o ñí taxi-gá chiù<sup>n</sup> taú-ó càda-o ì<sup>n</sup> ì<sup>n</sup>-o te chindee ñaha-gá xii-o, te xíní ñuhu-xi cada-o nacuáa ndùu chiù<sup>n</sup> ní taxi-gá cada-o. Te núu ní nduu táhú-ó nùú-gǎ sá càhá<sup>n</sup>-ó tnúhu sá dácàhu iní ñáhá mèe-gá xii-o te cáhá<sup>n</sup>-ó nàcuáa sándáá iní-ó chindee ñaha-gá xii-o, **7**àdi ní nduu táhú-ó nùú-gǎ sá ío váha chindee-o tnàha ñáyiu-o te diu-ni duca<sup>n</sup> càda-o, àdi ní nduu táhú-ó dànehé-ó ñáyiu

tnúhu-gá te diu-ni duca<sup>n</sup> càda-o, <sup>8</sup>àdi ní nduu táhú-ó nǔú-gă sá dácàhá<sup>n</sup>-ó ñăyiu canchicú<sup>n</sup> nihnú-yu ichi-gá te diu-ni duca<sup>n</sup> càda-o, àdi ní nduu táhú-ó nǔú-gă sá cuăñaha-o xii tnahă ñăyiu-o să ñihí-ó ndècu ndihî-o te diu-ni duca<sup>n</sup> càda-o, dico ni yùhu ni iní-ó cuăñaha-o xii-yu, àdi ní nduu táhú-ó nǔú-gă taxi tnùnî-ó te diu-ni duca<sup>n</sup> càda-o, te ni yùhu ni iní-ó càda-o, àdi ní nduu táhú-ó nǔú-gă chindee-o cuè ñăyiu ndècu ndihî tnúndòho tnúhu ndàhú te diu-ni duca<sup>n</sup> càda-o, te ío cudíí ìní-ó càda-o chiu<sup>n</sup>-á<sup>n</sup>.

**Nchaa nàcuáa tàú-xi cada nchaa ñăyiu ndècu ichi Xítóhó Jesucrístú**

<sup>9</sup>Te cuu iní tnáhá ndîsa-ndo ì<sup>n</sup> ì<sup>n</sup>-ndo, te dañă-ndo nchaa sá cuèhé sá dúhá te cada-ndo mèe-ni sá vâha. <sup>10</sup>Te ío cuu iní tnáhá-ndó, te cada-ndo cuendá sá ì<sup>n</sup>-ní ñăyiu cùu-ndo, te ì<sup>n</sup> ì<sup>n</sup>-ndo càni-gá iní-ndó cànehe yîñuhu núú tnáhá-ndó.

<sup>11</sup>Te nducu ndèe-ndo cada-ndo nchaa chiu<sup>n</sup> tahu Xítóhó Jesucrístú vá tùhío-ndo, te cada-ndo ñi yuhu ni iní-ndó să cúú-xí-gă.

<sup>12</sup>Te ío cudíí ìní-ndó cùndecu-ndo chi ní ngúndecu ndihî-ndo tnúhu ndee ìní sá cúndècu ndihî-ndo Xítóhó Jesucrístú, te cada càhnu iní-ndó cuèi nándi na càda ñaha ñăyiu xii-ndo să cuendá-gá, te vá dáñá ndèé-ndó cǎhá<sup>n</sup> ndihî-ndo Yă Ndiöxí.

<sup>13</sup>Te chindee tnàha-ndo te núu ìó dava nchòhó ñăyiu ndècu ichi-gá ìó ì<sup>n</sup> sá cúmăní xii-ndo, te ío váha cuu iní-ndó còto-ndo ñăyiu véxi vehe-ndo.

<sup>14</sup>Te cǎcá<sup>n</sup> táhú-ndó nǔú Yă Ndiöxí cuendá nchaa ñăyiu nándi quide ñaha xii-ndo, te cǎcá<sup>n</sup> táhú-ndó nǔú-gă sá ná chindee ñaha-gá xií-yu te ñá díú dà cǎcá<sup>n</sup> táhú-ndó nǔú-gă sá ná dàcuíta nihnu ñaha-gă xií-yu.

<sup>15</sup>Te núu ìó ñăyiu cùdíí ìní-xi te cudíí ìní-ndó ndìhí-yu, te núu ìó ñăyiu ndìhú iní-xi te ndìhú iní-ndó ndìhí-yu.

<sup>16</sup>Te cuu ì<sup>n</sup>nuu-ndo cùndecu-ndo, te vá cǎdá càhnu-ndo mee-ndo, te tnahá tnúhu-ndo ndihî nchaa ñăyiu ndàhú iní-xi, te vá cǎní ìní-ndó să ïo-gá túha-ndo.

<sup>17</sup>Te vá nánchòcáva-ndo nàchinaa-ndo ì<sup>n</sup> sá quidé ñaha ñăyiu xii-ndo, te ío nducu ndèe-ndo cada-ndo mee-ni sá vâha nàcuáa cuu váha iní ñăyiu.

<sup>18</sup>Te ío nducu ndèe-ndo cada-ndo sá ndácú-ndó cùndecu váha-ndo ndihî nchaa ñăyiu. <sup>19</sup>Te nchòhó ñăyiu ío cùu iní-í, vá cǎní ìní-ndó nàchinaa-ndo ì<sup>n</sup> sá cǎdá ñaha ñăyiu xii-ndo, chi cundetú-ndo să mée Yă Ndiöxí ná nàchinaa-gá sá quidé ñahá-yu xii-ndo, chi quee ndáá-xi nàcuáa cǎhá<sup>n</sup> Yă Ndiöxí núú tütú-gá núú cǎchí-xi: “Yúhú dandòho-í-yu chi nachinaa-í nchaa sá quidè-yu”, duha cǎchí-gá núú tütú-gá. <sup>20</sup>Te xini ñuhu tucu-xi cada-ndo nacuáa cǎhá<sup>n</sup> tucu-xi ingá xichi núú tütú-gá núú cǎchí-xi: “Te núu ñăyiu cùu úhú iní ñáhá xii-ndo ñá túú să cóhó să cǎxí-yu te cuăñaha-ndo xii-yu, te núu duca<sup>n</sup> na càda-ndo te ío cucaha<sup>n</sup> núú-yu”, duha cǎchí-xi núú tütú-gá.

**21** Te núu ìò ìì<sup>n</sup> sá quidé ñàha tnaha ñáyi-ndo xii-ndo te vá nánchòcáva-ndo nàchinaa-ndo sá quidé ñàhá-yu xii-ndo, chi cada-ndo sã vãha sá cúú-xí-yu, te duca<sup>n</sup> te vá cáda-ndó sã ñà túú tàú-ndó càda-ndo núu Yã Ndiöxí dàtná quidě-yu.

**13** <sup>1</sup>Te nchaa ñáyi-ndo tàú-yu quindáá iní-yu nchaa cue tée cùchiu<sup>n</sup>, chi Yá Ndiöxí ní cachí-gá sá cùndècu tée cùchiu<sup>n</sup> ñuyíú-a, núu xíã<sup>n</sup> xĩndecu-güedé vitna. <sup>2</sup>Te nchaa ñáyi-ndo ñá túú sàndáá iní ñàhá xii cue tée cùchiu<sup>n</sup> ñá túú tnàhá iní Yã Ndiöxí sá dúcá<sup>n</sup> quidé-yu, chi mee-gã ní cachí-gá sá cùndècu-güedé. Te nchaa ñáyi-ndo duca<sup>n</sup> ñà túú sàndáá iní ñàhá xii cue tée cùchiu<sup>n</sup> nacháhu-yu sá dúcá<sup>n</sup> quidé-yu. <sup>3</sup>Te nchaa ñáyi-ndo quide váha ñá túú yùhú-yu cue tée cùchiu<sup>n</sup> chi quide váha-yu, dico nchaa ñáyi-ndo ñá túú quide váha chi xiyùhú-yu cue tée cùchiu<sup>n</sup>. Te vitna núu nchòhó cuè ní-ndó sã vã yùhú-ndó cuè tée cùchiu<sup>n</sup> te chí cáda vãha, te duca<sup>n</sup> te cáhá<sup>n</sup> váha-güedé cuèndá-ndó. <sup>4</sup>Te Yá Ndiöxí duca<sup>n</sup> ñí cachí-gá cundecu-güedé cuèndá cada-güedé sá ñà túú ñà cuu cundecu-ndo, te núu ñá túú quide váha-ndo ndècu-ndo te quiyùhú iní-ndó nũú-güedě, chi ñá túú àú<sup>n</sup> ñà cuu ndècu ndìhi-güedé tnúhu ndee iní dandòho-güedé nchaa ñáyi-ndo ñá túú quide váha, chi Yá Ndiöxí duca<sup>n</sup> ñí cachí-gá cundecu-güedé sá dúcá<sup>n</sup> càda-güedé dandòho-güedé nchaa ñáyi-ndo ñá túú quide váha. <sup>5</sup>Núu xíã<sup>n</sup> ío xini ñuhu-xi sá quindáá iní-ndó nchaa cue tée cùchiu<sup>n</sup>, te ñá díú sã yùhú-ndó dandòho ñaha-güedé xii-ndo, chi cada-ndo sã cútnùní iní-ndó sã cúú-xí ìì<sup>n</sup> sá vãha. <sup>6</sup>Chi diu cuèndá xíã<sup>n</sup> sàcá<sup>n</sup>-ndó dǐhú<sup>n</sup> nũú cuè tée cùchiu<sup>n</sup>, te duca<sup>n</sup> chi Yá Ndiöxí duca<sup>n</sup> ñí cachí-gá cundecu-güedé te diu-ná chiú<sup>n</sup> ndeé-güedé ñúhú iní-güedé.

<sup>7</sup>Te nacháhu-ndo nchaa sá tàú-ndó nũú nchaa ñáyi-ndo tàú-ndó nũú-xi, te cuèi díhú<sup>n</sup> tàú-ndó cuèndá ñuhu-ndo nũú cuè tée cùchiu<sup>n</sup> àdi nágá díhú<sup>n</sup> tàú-ndó nũú-güedě te nacháhu-ndo nũú-güedě. Te ío-gá canehe-ndo sã yíñùhu núu nchaa ñáyi-ndo cùnūu, te cáhá<sup>n</sup> váha-ndo ndìhí-yu. <sup>8</sup>Te vá dácuidó-ndó ndùu nacháhu-ndo sã tàú-ndó nũú tnàha ñáyi-ndo, te cuu iní tnàhá-ndó ìì<sup>n</sup> ìì<sup>n</sup>-ndo. Te núu duca<sup>n</sup> quide-ndo ndecu-ndo ñà, te quide-ndo nchaa nacuaá càhá<sup>n</sup> tnúhu sá sánú ìchi ñaha xii-o nacuaá cada-o cùndecu-o. <sup>9</sup>Te duha ndùu tnúhu càhá<sup>n</sup> Yã Ndiöxí cuèndá nchaa sá vã cúú càda-o: “Nchaa nchòhó cue tée vá càhá<sup>n</sup> ndìhi-ndo ñáyi-ndo dǐhí te núu ñá díú ñàdìhí-ndó cùú-yu, te duca<sup>n</sup>-ni nchaa nchòhó cue ñáyi-ndo dǐhí tucu vá càhá<sup>n</sup> ndìhi-ndo tée te núu ñá díú yì-ndo cuu-güedé, te vá cáhni-ndó tnàha ñáyi-ndo, te vá dúhú-ndó sã ndécú ndìhí-yu, te vá dácàcu-ndo cuèchi neñúú, te vá xíhó-ndó sã ndécú ndìhi tnaha ñáyi-ndo”, nchaa xéhé càchí Yã Ndiöxí sá vã cúú càda-o. Te tnúhu-a quide-o ndìhi nchaa dava-gá tnúhu sá sánú ìchi ñaha xii-o nacuaá cada-o cùndecu-o, te núu quide-o ingá tnúhu sá càchí-xi: “Cuu iní-ndó nchaa tnaha ñáyi-ndo dàtná cúú iní-ndó

mèe-ndo”, duha càhá<sup>n</sup> tnúhu-á<sup>n</sup>. Te nchaá dava-gá quidé-ó te núu quide-o nacuáa càhá<sup>n</sup> tnúhu-a. **10**Te nchaá ñáyiú cùu iní tnàha ñáyiú-xi te ñá túú quide úhú iní-yu tnàha ñáyiú-yu, te núu duca<sup>n</sup> cùu iní-yu tnàha ñáyiú-yu te quidé-yu nàcuáa càhá<sup>n</sup> tnúhu sá sánú ìchi ñaha xii-o nacuáa cada-o cùndecu-o.

**11**Te duca<sup>n</sup> xini ñuhu-xi cada-ndo chi sa ní cutnùní iní-ndó nàcuáa ta xica nduu cuáhá<sup>n</sup> ñuyíú-a, te ní sáá nduu sá ìo xini ñuhu-xi ndixi túu iní-ó càda-o nchaá nacuáa càhá<sup>n</sup> Yă Ndiöxí, chi vitna sa ní cuyatni-gá nduu nàcuaca ñaha Xítóhó Jesucrìstú xii-o dàcúúxí ndèé cùtnàhá ní sándáá iní-ó tnúhu-gá. **12**Te cada iní-ndó sã dàtná ì<sup>n</sup> niú sá sà ta cuyatni túndaá, duca<sup>n</sup> sãtnahá-xi cùu ñuyíú yíca cuèchi-a chi sa ta cùyatni nduu quixi tucu Xítóhó Jesucrìstú, te núu xíá<sup>n</sup> xíní ñuhu-xi dañ-a nchaá sá cuèhé sá dúhá te cada-o mèe-ni sá vãha, te duca<sup>n</sup> te ni ì<sup>n</sup> sá cuèhé sá dúhá vã cùnùu-xi taxi tnuní ñáhá-xí xii-o, te duca<sup>n</sup> te vã cúú-gã-ó dàtná ñáyiú ndècu núú néé chi cuu-ná-ó dàtná ñáyiú ndècu núú òtó. **13**Te cada-o nchàa nacuáa tàú-xi cunduu cundecu-o dàtná tàú-xi cada ñáyiú ndècu ìchi Xítóhó Jesucrìstú, te vã quìhí<sup>n</sup>-ó vico cuehé vico duha, te vã cúú-ó ñáyiú quihu, te ni vã càhá<sup>n</sup> ndìhi-o ñáyiú òhí te núu ñá díú ñàdìhí-ó cùú-yu, te duca<sup>n</sup>-ni cuè ñáyiú òhí tucu vã càhá<sup>n</sup> ndìhí-yu téé te núu ñá díú yì-yu cùu-güedé, te ni vã cùndècu-o ìchi díí ìní, te ni vã nàá-ó ndìhi tnaha ñáyiú-o, te ni vã cúú-ó ñáyiú cuédú ìní. **14**Te vitna nchòhó dañ-a-ndo mèe-ndo sá Xítóhó Jesucrìstú ná chindee ñaha-gá xii-ndo càda vãha-ndo cùndecu-ndo datná quidé mèe-gá ndécú-gã, te vã cání-gã iní-ndó càda-ndo datná ní xóo cada-ndo cùtnàhá ní cunuu nchàa sá cuèhé sá dúhá ìní-ndó.

**Vá cuátnùhu tnaha-o nacuáa ndècu-o ìchi Xítóhó Jesucrìstú**

**14** **1**Te núu ì<sup>n</sup> ñáyiú ndècu ìchi Xítóhó Jesucrìstú ñá túú tècú tnùnì vãha-yu nàcuáa cuìní Yă Ndiöxí cadá-yu, te quehe<sup>n</sup> cuèndá-ni-ndö-yu te vã tènàá tnáhá-ndó ndìhí-yu. **2**Chi ìó ñáyiú sàni iní sá cúú vãha iní Yă Ndiöxí sá cúú càxí-yu nání nìhí-yu, te dava ñáyiú ñá túú cùtnuní vãha iní-yu nàcuáa càhá<sup>n</sup> Yă Ndiöxí te mee-ni yücú xéxí-yu. **3**Te ñáyiú xèxi nchaá núú sã nìhí-yu te vã dáquèe tíhü-yu ñáyiú ñá túú xèxi, te duca<sup>n</sup>-ni ñáyiú duca<sup>n</sup> ñà túú xèxi-á<sup>n</sup> vã cuátnùhú-yu nchaá ñáyiú duca<sup>n</sup> xèxi nchaá núú sã nìhí-xi-á<sup>n</sup>, chi tnàhá ñáyiú duca<sup>n</sup> xèxi nchaá núú sã nìhí-xi-á<sup>n</sup> quèhé<sup>n</sup> cuèndá ñáhá Yă Ndiöxí xií-yu. **4**Te ñá túú ndècu ndìhi-o tnúhu ndee ìní cuatnúhu-o ñáyiú xínu cuechi, chi mee ñáyiú cùu patròö<sup>n</sup>-yu tàú-yu cáhá<sup>n</sup>-yu te núu cùndáá ñáyiú xínu cuechi núú-yu àdi ñá túú cùndáá-yu. Te duca<sup>n</sup> sãtnahá-xi cùu ñáyiú xínu cuechi núú Yă Ndiöxí, chi mee-gã cáhá<sup>n</sup>-gá te núu nása quidé-yu, te òu-ni mee-gã cada te cundáá-yu cundécú-yu núú-gã.

<sup>5</sup>Te na cächí tnúhu tucu-í xii-ndo sã ìó ñáyiú cächí sá ìó dava nduu ío cãhnu cuu-xi, te ìó tucu dava ñáyiú cächí-yu sá ìí<sup>n</sup>-ni cuu-xi nchaa-ni nduu, te xini ñuhu-xi sá cùtnuní ndáá iní-yu sá ndàá cúú-xí nàcuáa cãhá<sup>n</sup>-yu ìí<sup>n</sup> ìí<sup>n</sup>-yu. <sup>6</sup>Te ñáyiú cánehe íí dava nduu quidé-yu sá néhě-yu sá yíñùhu núú Yã Ndiöxí, te ñáyiú cächí sá ìí<sup>n</sup>-ní cùu-xi nchaa-ni nduu quidé-yu sá néhě-yu sá yíñùhu núú Yã Ndiöxí tnàhá-yu. Te ñu-ni duca<sup>n</sup> sãtnahá-xi cùu nchaa ñáyiú xèxi nchaa nãni ñihí-yu, chi quidé-yu sá néhě-yu sá yíñùhu núú Yã Ndiöxí, chi ndàcá<sup>n</sup> táhũ-yu núú-gã cuendá nchaa sá ñihí-yu. Te ñu-ni duca<sup>n</sup> sãtnahá-xi cùu nchaa ñáyiú ñá túú xèxi nchaa núú sã nchító-ó chi quidé-yu sá néhě-yu sá yíñùhu núú Yã Ndiöxí, te ndàcá<sup>n</sup> táhũ-yu núú-gã cuendá nchaa sá ñihí-yu.

<sup>7</sup>Te nchoo cuèi vitna ndècu vívú-ó àdi cuèi na cùú-ó dico ñá díú cuendá méé-ó cùú-ó. <sup>8</sup>Chi vitna ndècu vívú-ó te ndècu-o sá cúú-xí Xítóhó Jesucristú àdi cuèi na cùú-ó dico cuú-ó ñu-ni sá cúú-xí-gã, núú xíã<sup>n</sup> cuèi vitna ndècu vívú-ó àdi cuèi na cùú-ó dico ñu-ni Xítóhó Jesucristú cúú cuendá ñáhá-gã xii-o. <sup>9</sup>Chi Xítóhó Jesucristú ní xíhí-gá te ní ndoto-gá, te vitna cùu-gá Xítóhó nchaa ñáyiú, cuèi ñáyiú xíndecu vívú te cuèi ñáyiú ní xíhí.

<sup>10</sup>Te nchòhó, ñá túú ndùu váha-xi cuatnuhu tnàha-ndo nacúáa ndècu-ndo ichi Xítóhó Jesucristú, te ni ñá túú ndùu váha-xi daquèe tñhú tnáhá-ndó, chi nchaa-o sãá nduu cùndecu-o núú Xítóhó Jesucristú, te mee-gã cachí-gá te núú ní quide ndáá-ó àdi ñá túú ní quide ndáá-ó. <sup>11</sup>Te Yã Ndiöxí cächí-gá núú tütú-gá:

Yúhú Yã Ndiöxí ndécù-í cächí tnúhu ndáá-í xii-ndo sã nchàa ñáyiú  
ngúíñí xítĩ-yu núú-í,  
te ncháá-yu cáhá<sup>n</sup>-yu sá yúhú cùú-í Ndiöxí.

Duha cächí Yã Ndiöxí núú tütú-gá. <sup>12</sup>Núú xíã<sup>n</sup> nchaa-o ndì díí<sup>n</sup> nàcani tnúhu-o núú Yã Ndiöxí nchaa sá ñí quide-o.

### Vá dácuíta nihnu tnàha-o

<sup>13</sup>Núú xíã<sup>n</sup> vá cuátnùhu tnaha-gá-ndó, te cada yica-ndo càda-ndo mee-ni sá vãha, te vá cáda-ndó ìí<sup>n</sup> sá ñá túú tàú-ndó càda-ndo cuendá sá vã cuíta nihnu dava ñáyiú ndècu ndihí-ndo ichi Xítóhó Jesucristú. <sup>14</sup>Te yúhú ndécú ndihí-í Xítóhó Jesucristú te cùtnuní ndáá iní-í sá ncháá núú sã cúú càxi-o cuu-ni caxi-o te vá cúú cuèchi. Te ñáyiú sàni iní sá vã cúú càxi-yu te núú na càxi-yu te cuu cuèchi xíí-yu. <sup>15</sup>Te nchòhó, te núú cuendá sá xéxí-ndó nchàa núú sã cúú càxi-ndo, cuendá xíã<sup>n</sup> ñá túú-gã cúú vãha iní nchaa ñáyiú ndècu ndihí-ndo ichi Xítóhó Jesucristú, te ñá túú-gã quidé-ndó sã cúú ìní ndisa-ndó-yu te núú duca<sup>n</sup> na càda-ndo, te núú ìí<sup>n</sup> sá sání ìní-ndó càxi-ndo te cùtnuní iní-ndó sã xíã<sup>n</sup> cada-xi cuíta nihnu ñáyiú ndècu



ndihi-ndo ichi Xítohó Jesucristú te vá cáxí-ndó xǎ<sup>n</sup> te núu duca<sup>n</sup>, chi Xítohó Jesucristú ní xíhí-gá cuendá-yu. **16**Te núu ì<sup>n</sup> sá quidé-ndó sàni iní-ndó sǎ cúú-xí ì<sup>n</sup> sá vǎha, te ñáyiú cǎchí-yu sá ñà túú vǎha te vá cádá-ndó cuendá sá vǎ cǎhá<sup>n</sup> cuèhé-yu cuendá-ndó. **17**Te sá yíndàha ñaha Yá Ndiöxí xii-o xǎ<sup>n</sup> ío xìni ñuhu-xi cada ndáá-ó cùndecu-o, te cundecu váha ndihi tnàha-o, te cudíí ìní-ó cùndecu-o chi Espíritú-gá ndécú ndìhi ñaha-xi xii-o, te nchaa xéhé ïo-gá cúnùu dacúxí sǎ cóhó sǎ cáxí-ó. **18**Te nchaa ñáyiú duca<sup>n</sup> quide nchaa sá ïo-gá xíní ñuhu-xi, xinu cuechí-yu núu Xítohó Jesucristú, te sá dúcá<sup>n</sup> quidé-yu te ndùu vétú iní Yǎ Ndiöxí, te cùdiú-yu núu ñáyiú.

**19**Te nchoo chǐ ná ndùcu-o nacuáa cada-o cùndecu ndihi váha tnàha-o, te nducu tùcu-o nacuáa cada-o chìndee tnúhu tnàha-o nacuáa cuita cundáá-gá-ó nǔú Xítohó Jesucristú quíhí<sup>n</sup>. **20**Te ñá díú sǎ cuendá ì<sup>n</sup> núú sǎ xéxí-ó, te dàquee tíhú-ó sǎ vǎha ní quide ñaha Yǎ Ndiöxí xii tnàha ñáyiú-o. Te na cǎchí tnúhu ndáá-í xii-ndo sǎ ncháá-ní nǔú sǎ cúú cǎxi-o, te dìcò-ni sá ñà túú ndùu váha-xi núu sá cuendá-ni sá cáxí-ó ì<sup>n</sup> núú sǎ cúú cǎxi-o cuíta nihnu ì<sup>n</sup> tnàha ñáyiú-o. **21**Te váha-gá sá vǎ cáxí-ó cùñú te vá cóhó ndidí, te ni ñà túú nǎgá cada-o te núu xìto-o sá xǎ<sup>n</sup> cada te ngüíta tnàha ñáyiú-o cǎdá-yu sá ñà túú vǎha, àdi xito-o sá xǎ<sup>n</sup> cada te ngüíta-yu caní ì<sup>n</sup> caní úú iní-yu cundecú-yu ichi Xítohó Jesucristú, te vá cùndáá-gá-yu núú-gǎ te núu duca<sup>n</sup> na càda-o. **22**Te núu ì<sup>n</sup> sá vǎha sàni iní-ó càda-o, te vá dátúu-o nǔú ñáyiú chi mee-ni nǔú Yǎ Ndiöxí dátúu-o. Te nchoo cùu-o ñáyiú ío váha táhú-xi te núu cùtnuní ndáá iní-ó sǎ quidé ndáá-ó nǔu nándi cùu sá quidé-ó, te cùtnuní iní-ó sǎ ñà díú ì<sup>n</sup> cuéchi cùu-xi sá quidé-ó. **23**Te núu nchoo sàni iní-ó sǎ quidé vǎha-o àdi ñá túú quide váha-o òré xéxí-ó ì<sup>n</sup> núú sǎ xéxí-ó, te cuu cuéchi xii-o te núu duca<sup>n</sup> na càda-o. Te duca<sup>n</sup> cùu cuéchi xii-o chi ñá túú ì<sup>n</sup>-ni sá sání ìní-ó, chi nchaa núú sǎ quidé-ó sàni ì<sup>n</sup> sani úú iní-ó nǔu váha-ni àdi ñá túú vǎha-ni, te cuu cuéchi xii-o sǎ dúcá<sup>n</sup> quide-o.

**Cada-o sǎ vǎha sá cúú-xí tnàha ñáyiú-o**

**15** **1**Te nchoo ñáyiú ío váha sàndáá iní ñáhá xii Xítohó Jesucristú, xìni ñuhu-xi cuáñaha-o tnúhu ndee ìní xii ñáyiú ñá túú ñihí ndéé cùndecu ichi-gá, te vá cádá-ó mèe-ni sá cúú-xí mèe-o. **2**Te cada-o sǎ vǎha nàcuáa cuu váha iní tnàha ñáyiú-o cuendá cuu-xi sá vǎha sá cúú-xí-yu, te duca<sup>n</sup> cuíta ñihí ndéé-gǎ-yu quindáá iní-yu Xítohó Jesucristú. **3**Te Xítohó Jesucristú ñá túú ní quide-gá mee-ni sǎ cúú vǎha iní méé-gǎ, te ní quee ndáá-xi nàcuáa cǎhá<sup>n</sup>-xi núú tütú Yǎ Ndiöxí nàcuáa ní xáha<sup>n</sup> Xítohó Jesucristú xii-gá, te cǎchí-xi: “Nchaa ñáyiú cùu úhú iní ñáhá xii-n ní xícuèhé ní xíduha ñáhá-yu xii-í”, duha cǎhá<sup>n</sup>-xi núú tütú Yǎ Ndiöxí nàcuáa

ní xáha<sup>n</sup> Xítohó Jesucristú xii-gá. <sup>4</sup>Te ndéé sanaha nǐ ngúndeé nchaa tnúhu Yá Ndiöxí núú tütú-gá, te duca<sup>n</sup> nǐ ngúndeé cuèndá dacuàha-o, te tnúhu-á<sup>n</sup> dánèhé ñáhá-xí cùnduu cahnu iní-ó cuèi nándi nà yáha-o cùndecu-o ichi-gá, te sá xíi tnúhu-á<sup>n</sup> te vá ndìhú-gá iní-ó cùndecu-o, te diu-ni sá xíi tnúhu-á<sup>n</sup> cundecu ndìhi-o tnúhu ndee ìní. <sup>5</sup>Te Yá Ndiöxí quidé-gă ndécú ndìhi-o tnúhu cànno iní, te diu-ni-gá quidé-gă ñá túú ndìhú iní-ó ndècu-o. Te xicá<sup>n</sup> táhù-í núú-gă sá díú-gă ná cádá te cuu ì<sup>n</sup>nuu-ndo cùndecu-ndo datná ní quide mee Xítohó Jesucristú cútnáhá ní xíndecu-gá ñuyíú-a. <sup>6</sup>Te duca<sup>n</sup> nchaa-ndo cuu ì<sup>n</sup>nuu-ndo, te danìhí tnáhá-ndó yóco táchí-ndó te cachí-ndó sǎ ìo cànno cuu Yá Ndiöxí Yaá cúú Tătá Xítohó Jesucristú.

**Ñáyiu ñá túú cùu ñáyiu isràél ní níhí-yu tnúhu Xítohó Jesucristú**

<sup>7</sup>Te núu xiǎ<sup>n</sup> chí quéhé<sup>n</sup> cuèndá tnáhá dàtná ní quide Xítohó Jesucristú ní quehe<sup>n</sup> cuèndá ñáhá-gă xii-o, te núu duca<sup>n</sup> na càda-ndo te ìo cuu cànno Yá Ndiöxí. <sup>8</sup>Te na cächí tnúhu-í xii-ndo sǎ Xítohó Jesucristú ní quixi-gá ní quide-gá sá vǎha sá cúú-xí ñáyiu isràél, te sá dúcá<sup>n</sup> nǐ quide-gá xiǎ<sup>n</sup> cútnùnì ndáá iní-ó sǎ Yá Ndiöxí quidé-gă ì<sup>n</sup> sá cǎhá<sup>n</sup>-gá, chí Xítohó Jesucristú ní quide-gá nchaa nàcuáa ní xáha<sup>n</sup> Yá Ndiöxí xii cue ñanì tnáhá-ó nǐ xíndecu ndéé sanaha. <sup>9</sup>Te duca<sup>n</sup> nǐ quide Xítohó Jesucristú sá vǎha sá cúú-xí ñáyiu isràél cuèndá nchaa ñáyiu ñá túú cùu ñáyiu isràél cachí-yu sá ìo cànno cuu Yá Ndiöxí, te duca<sup>n</sup> quèsahá-yu chí ìo cùndahú iní ñáhá-gă chíndèe ñaha-gá xií-yu, te quee ndáá-xi nàcuáa cǎhá<sup>n</sup>-xi núú tütú Yá Ndiöxí núú cächí-xi:

Yúhú cachí-í sá ìo cànno cuu-n núú nchaa ñáyiu ñá túú cùu ñáyiu isràél,  
te cata-í ndudú chiñuhu ñaha-ì xii-n.

Duha cächí-xi núú tütú-gá <sup>10</sup>Te cächí tucu-xi núú tütú-gá:

Te nchòhó ñáyiu ñá túú cùu ñáyiu isràél ìo chí cúdí ìní ndìhi ñáyiu isràél ñáyiu ndècu ndìhi-í.

Duha cächí-xi núú tütú-gá. <sup>11</sup>Te cächí tucu-xi ingá xichi núú tütú-gá:

Nchaa nchòhó ñáyiu ñá túú cùu ñáyiu isràél chí cǎhá<sup>n</sup> sá ìo cànno cuu Yá Ndiöxí,

te nchaa ñáyiu na cǎhá<sup>n</sup>-yu sá ìo cànno cuu-gá.

Duha cächí-xi núú tütú-gá. <sup>12</sup>Te ndíi Chàíá cächí tucu ndíi núú tütú Yá Ndiöxí:

Coo ì<sup>n</sup> ñanì tnáhá ndíi Isáí téé ní xíndecu ndéé sanaha,  
te téé-á<sup>n</sup> taxi tnùnì-dé cue ñáyiu ñá túú cùu ñáyiu isràél,  
te ñáyiu-á<sup>n</sup> cundee cùu cahnu iní ñáhă-yu xii-dé.

Duha ní cǎhá<sup>n</sup> ndíi Chàíá cächí-xi núú tütú-gá.

13Te xicá<sup>n</sup> táhù-í núú Yă Ndiöxí Yaá ní taxi tnúhu ndee ìní ndécú ndìhi-o sá méé-gă ná càda ío cudíí ìní-ndó cùndecu-ndo, te duca<sup>n</sup> ïo váha cundecu iní-ndó nŭú-gă chi sàndáá iní-ndó-gă, te duca<sup>n</sup> Espíritú-gá ná càda te uu<sup>n</sup>-gá uu<sup>n</sup>-gá cuita ngúndecu ndìhi-ndo tnúhu ndee ìní quíhí<sup>n</sup> sá cáda vâha ñaha-gă xii-ndo.

14Te nchòhó ñáyiú ndècu ndìhi-í ichi Xítóhó Jesucristú cùtnuní ndáá iní-í sá nchòhó ío váha iní-ndó, te duca<sup>n</sup> ïo váha cùtnuní iní-ndó nchàa tnúhu váha, te duca<sup>n</sup> ïo dâsahú tnáhá-ndó nàcuáa cundecu-ndo. 15Te dava tnúhu ní chídó tnùn-í núú tütú-a cùu-xi tnúhu sá ïo càhá<sup>n</sup>-í dóho-ndo, te duca<sup>n</sup> nŭ tee-í cuèndá sá nchòhó dandàcu iní-ndó tnúhu-á<sup>n</sup>, te ní tee-í chi Yă Ndiöxí ní cundàhú iní ñáhá-gă xii-í ní taxi-gá chiú<sup>n</sup> quide-í 16xínú cuèchi-í núú Xítóhó Jesucristú càhá<sup>n</sup>-í tnúhu-gá núú ñáyiú ñá túú cùu ñáyiú isràél. Te tnúhu-á<sup>n</sup> cúú-xí tnúhu sá sánú ìchi ñaha xii-o nàcuáa naníhí tàhú-ó, te duca<sup>n</sup> dànehé-í ñáyiú ñá túú cùu ñáyiú isràél tnúhu Yă Ndiöxí cuèndá cuú-yu dàtná ì<sup>n</sup> sá ndúú tãhú-gă, te Espíritú-gá quidé-xí cùú-yu ñáyiú cùdiu núú-gă, te cùu váha iní ñáhá-gă xií-yu.

17Te ío váha cùu iní-í cuèndá nchaa chiú<sup>n</sup> quide-í sá cúú-xí Yă Ndiöxí, chi Xítóhó Jesucristú ndécú ndìhi ñaha-gá xii-í. 18Te mee-ni nàcuáa quide Xítóhó Jesucristú chíndèe ñaha-gá xii-í xíã<sup>n</sup>-ni càhá<sup>n</sup>-í, te sá dúcá<sup>n</sup> quide-gá xíã<sup>n</sup> ní sàndáá iní cue ñáyiú ñá túú cùu ñáyiú isràél tnúhu-gá. Te duca<sup>n</sup> chi ní chindee ñàha-gá xii-í ní càhá<sup>n</sup>-í tnúhu-gá te duca<sup>n</sup>-ni nŭ chindee ñàha-gá xii-í ní quide-í titní núú sã nŭ quide-í núú-yu ní xiní-yu. 19Te Espíritú Yă Ndiöxí ní quide-xi ní quide-í titní núú sã vã yõo tnàhí ndàcu cada ní xiní-yu te ío ní cuñúhu-yu. Te nchaa ñuú ní sáhá<sup>n</sup>-í ní càhá<sup>n</sup>-í tnúhu Xítóhó Jesucristú núú ñáyiú cuèi ndéé ñuú Jerusàlén, te cuèi ndéé distritú Ìlírícú, núu nchaa ñuú-á<sup>n</sup> nŭ sáhá<sup>n</sup>-í ní càhá<sup>n</sup>-í núú-yu tnúhu sá càhá<sup>n</sup> nàcuáa naníhí tàhú-ó. 20Te duca<sup>n</sup> ïo ndùcu ndee-í càhá<sup>n</sup>-í tnúhu sá càhá<sup>n</sup> nàcuáa naníhí tàhú-ó nŭú vátá ñihí-gá-yu tnúhu cuèndá Xítóhó Jesucristú, te duca<sup>n</sup> quide-í chi ñá túú cuìní-í quíhí<sup>n</sup>-í càhá<sup>n</sup>-í tnúhu-gá núú sã xíndecu ñáyiú càhá<sup>n</sup> tnúhu-gá. 21Te quide-í nàcuáa càhá<sup>n</sup>-xi núú tütú Yă Ndiöxí núú càchí-xi:

Ñáyiú vátá ñihí-gá tnúhu cuèndá Yaá quixi ñuyíú te níhí-yu,  
te duca<sup>n</sup> tècú tnùn-í-yu tnúhu-gá.

Duha càchí-xi núú tütú-gá.

### Té Păblú cuìní-dé quíhí<sup>n</sup>-dé ñuú Ròmá

22Te sá dúcá<sup>n</sup> càhá<sup>n</sup>-í tnúhu-gá nŭú xíã<sup>n</sup> ñá túú ní ndàcu-í quixi-í quixi coto ñaha-í xii-ndo cuèi duca<sup>n</sup>-ni sàni iní-í quixi coto ñaha-í. 23Te ní cuu titní cuíá duca<sup>n</sup>-ni sàni iní-í quixi coto ñaha-í xii-ndo, te vitna ní ndìhi-í nchaa iha ní càhá<sup>n</sup>-í tnúhu Xítóhó Jesucristú núú nchàa ñáyiú. 24Núu xíã<sup>n</sup>

sání iní-í sá ndùu na quíhí<sup>n</sup>-í nàció<sup>n</sup> Èspañá te yáha cáhá<sup>n</sup>-í quini-í nása ndècu-ndo, te dàvá-á<sup>n</sup> ïo cudíí iní-ó cùndecu tnaa-o, te duca<sup>n</sup> te òré nucúhu<sup>n</sup> tucu-í ichi te cada ndee iní-ndó chindee ñaha-ndo xii-í. **25**Te vitna quíhí<sup>n</sup>-í ñuú Jerusàlén quínehe-í sá ndúú tǎhú ñǎyiu ndècu ichi Xítóhó Jesucristú xíndecu yacá<sup>n</sup>. **26**Te ñáyiu xíndecu ichi Xítóhó Jesucristú ndécú dístítú Macèdoniá, ndíhi dístítú Acǎyá ní cuu ï<sup>n</sup>nùú-yu ní sacá<sup>n</sup> tnáhǎ-yu sá ndúú tǎhú ñǎyiu ndàhú xíndecu ichi-gá ndécú ñùú Jerusàlén. **27**Te duca<sup>n</sup> tnàhí ní cudíí iní-yu cadá-yu, te duca<sup>n</sup> tnàhí tàú-yu cadá-yu chindèe-yu ñáyiu xíndecu ñuú Jerusàlén. Te ñáyiu Macèdoniá ndíhi ñáyiu Acǎyá-á<sup>n</sup> ñà túú cùú-yu ñáyiu isràél. Te ñáyiu xíndecu ñuú Jerusàlén cúú-yu mee-ni ñáyiu isràél, te duca<sup>n</sup> tàú-yu cadá-yu chi sá cuendá ñáyiu isràél-á<sup>n</sup> nǐ níhǐ-yu tnúhu sá càhá<sup>n</sup> nàcuáa naníhí tǎhú-yu, núu xǎ<sup>n</sup> tàú-yu chindee ñàhá-yu ndíhi nchaa sá nihí-yu. **28**Te sátá ná yǎha quínguáha cuendá-í-yu sá ndúú tǎhú-yu, te duca<sup>n</sup> te dàtnùnǐ quee-í quíhí<sup>n</sup>-í nàció<sup>n</sup> Èspañá, te ichi yáha-í yáha cáhá<sup>n</sup>-í núu ndécú-ndó. **29**Te cùtnunǐ ndáá iní-í sá òré ná quèxio-í núu ndécú-ndó, te Xítóhó Jesucristú ío chindee ñàha-gá xii-í cáhá<sup>n</sup>-í tnúhu-gá núu-ndó nàcuáa ío váha cundecu-ndo ìchi-gá.

**30**Te nchòhó ñáyiu ndècu ndíhi-í ichi Xítóhó Jesucristú càhá<sup>n</sup> ndàhú-í núu-ndó sǎ ïo chindee ñàha-ndo xii-í cáhá<sup>n</sup> ndíhi-o Yǎ Ndiöxí cuendá-í, te duca<sup>n</sup> càda-ndo chi ndècu ndíhi-ndo Xítóhó Jesucristú. Te Espíritú Yǎ Ndiöxí quídé-xí cùu iní tnáhá-ó ï<sup>n</sup> ï<sup>n</sup>-o. **31**Te ío chí càcá<sup>n</sup> tǎhú nǔú Yǎ Ndiöxí sá ná còto ñaha-gá xii-í, te ñá túú nǎ cada ñaha nchàa ñáyiu ñá túú sàndáá iní ñàhá xii-gá xíndecu dístítú Jùdeá. Te cacá<sup>n</sup> tǎhú tucu-ndo núu-gǎ sá ncháá sǎ cánèhe-í quíhí<sup>n</sup> nduu tǎhú ñáyiu ndècu ichi-gá ndécú ñùú Jerusàlén ío váha cuu iní-yu quehe<sup>n</sup> cuendá-yu. **32**Te duca<sup>n</sup> càda-ndo cuendá sá nǔu Yǎ Ndiöxí ná càchí-gá te ío cudíí iní-í òré quèxio-í núu ndécú-ndó, te ío váha cuu iní-í cundecu ndíhi ñaha tnài xii-ndo. **33**Te vitna xìcá<sup>n</sup> tǎhú-í núu Yǎ Ndiöxí Yaá quídé ïo váha cùu iní-ó ndècu-o sá ná chindee chitúu ñaha-gǎ xii-ndo nchàa-ndo. Te duca<sup>n</sup> na cùnduu.

**Té Pǎblú quídé ndèe iní-dé ñáyiu ndècu ñuú Rómá**

**16** **1**Te yúhú tendaha-ǐ tá Fèbé quixi-xi núu ndécú-ndó, te tnàhá-xi ndècu-xi ichi Xítóhó Jesucristú, te quíde-xi chiu<sup>n</sup> Yǎ Ndiöxí sá cúú-xí ñáyiu ndècu ichi Xítóhó Jesucristú xíndecu ñuú Cèncreá. **2**Te cuíní-í sá ïo váha cuu iní-ndó quèhe<sup>n</sup> cuendá-ndó-xí, chi ndècu ndíhi-xi Xítóhó Jesucristú, te cada-ndo nàcuáa tàú-xi cunduu dàtná tàú-xi cada ñáyiu ndècu ichi-gá, te ío chindee-ndo-xi te núu ná cúú sǎ xíní ñùhu-xi, chi tnàhá-xi ío chindee-xi cue ñáyiu ndècu ichi Xítóhó Jesucristú, te tnàhá yúhú duca<sup>n</sup> ïo chindee-xi.

<sup>3</sup>Te cúñaha-ndo ïo na càda ndee iní té Àquilú ndihì ñadìhí-dé tá Prìscilá, chi ñáyi-u-á<sup>n</sup> ñí quide chiù<sup>n</sup>-í ndihí-yu ní quide-ndí chiù<sup>n</sup> Xítohó Jesucrìstú. <sup>4</sup>Chi mèe-yu ní cácu cuú-yu sá cuendá sá ñí dácäcu ñàhá-yu xii-í sá ñí yáha-í, núu xíá<sup>n</sup> ío ndàcá<sup>n</sup> táhù-í núù-yu, te ñá díú-ní yùhú duca<sup>n</sup> ïo ndàcá<sup>n</sup> táhù-í núù-yu chi tnàhá nchaa ñáyi-u ñá túú cùu ñáyi-u isràél xíndecu ichi-gá xíndecu nchaa xichi duca<sup>n</sup> ïo ndàcá<sup>n</sup> táhù-yu núú tē Àquilú ndihì núú ñadìhí-dé tá Prìscilá. <sup>5</sup>Te cúñaha tùcu-ndo sá ïo na càda ndee iní nchaa ñáyi-u xíndecu ichi Xítohó Jesucrìstú tàcá vehe té Àquilú ndihì tá Prìscilá dácuahá-yu tnúhu-gá, te cúñaha tùcu-ndo sá ïo na càda ndee iní té Epènetú chi tnàhá-dé ío ñùhu iní-í-dé, chi tée-á<sup>n</sup> cúú-dě tée díhna nuu ñí sándáá iní tnúhu Xítohó Jesucrìstú distrítú Acäyá. <sup>6</sup>Te cúñaha tùcu-ndo sá ïo na càda ndee iní tá Màriá xíchí ndécú ndihì-ndo, xíchí ïo ndùcu ndee xinu cuechi núú Xítohó Jesucrìstú. <sup>7</sup>Te cúñaha tùcu-ndo sá ïo na càda ndee iní cue tée cùu ndì mee-í té Àndrónicú ndihì té Jùniás, chi tnàhá-güedé ní xíhi ndihì ñaha-güedé xii-í vecaá, te ío cùdiu-güedé núú nchaa cue tée ní táúchíú<sup>n</sup> Jèsús cáhá<sup>n</sup> tnúhu-gá. Te díhna-gá-güedé ní sándáá iní-güedé tnúhu Xítohó Jesucrìstú dácúxí yùhú.

<sup>8</sup>Te cúñaha-ndo sã ná càda ndee iní té Àmpliás chi tnàhá-dé ío ñùhu iní-í-dé, te ndècu-dé tnàhá-dé ichi Xítohó Jesucrìstú. <sup>9</sup>Te cúñaha tùcu-ndo xii té Bänú tée cùndihì ñaha xii-o quide-o chiu<sup>n</sup> Xítohó Jesucrìstú sá ná càda ndee iní-dé, te cúñaha tùcu-ndo xii té Èstaquís sá ná càda ndee iní-dé chi tnàhá-dé ío ñùhu iní-í-dé. <sup>10</sup>Te cúñaha tùcu-ndo xii té Àpelés sá ïo na càda ndee iní-dé, chi tée-á<sup>n</sup> ïo váha cùndáá-dé núú Xítohó Jesucrìstú, te cúñaha tùcu-ndo xii ñáyi-u xíndecu vehe té Arístóbulú sá ïo na càda ndee iní-yu. <sup>11</sup>Te cúñaha-ndo xii té Heròdión tée cùu ndì mee-í sá ïo na càda ndee iní-dé, te cúñaha-ndo xii ñáyi-u ndècu ichi Xítohó Jesucrìstú xíndecu vehe té Nàrcisú sá ïo na càda ndee iní-yu. <sup>12</sup>Te cúñaha-ndo xii tnàhá tá Trìfená ndihì tá Trìfosá sá ïo na càda ndee iní-yu, chi tnàhá-yu quidé-yu chiù<sup>n</sup> Xítohó Jesucrìstú. Te tnàhá tá Përsidá xíchí ndécú ndihì-o ichi Xítohó Jesucrìstú cúñaha-ndo xii-xi sá ïo na càda ndee iní-xi, chi tnàhá-xi ío ndùcu ndee-xi quide-xi chiu<sup>n</sup> Xítohó Jesucrìstú. <sup>13</sup>Te cúñaha-ndo tnàhá té Rűfú tée ío váha sándáá iní tnúhu Xítohó Jesucrìstú sá ïo na càda ndee iní-dé ndihì ñaná-dě, chi ñaha-á<sup>n</sup> quidé ìní-í sá cúú-á<sup>n</sup> dàtná ñànà-í. <sup>14</sup>Te cúñaha-ndo sã ïo na càda ndee iní té Àsíncritú, ndihì té Flègonté, ndihì té Hërmás, ndihì té Pàtrobás, ndihì té Hërmés, ndihì nchaa dava-gá cue ñáyi-u ndècu ndihì-o ichi Xítohó Jesucrìstú xíndecu ndihì-güedé. <sup>15</sup>Te cúñaha tùcu-ndo sá ïo na càda ndee iní té Fìlólogó, ndihì tá Jűliá, ndihì té Nèréú, ndihì cúha té Nèréú, ndihì tá Òлимпás, ndihì nchaa dava-gá ñáyi-u sándáá iní tnúhu Xítohó Jesucrìstú xíndecu ndihí-yu.



16Te ío yiñùhu cada ndee iní tnáhá-ndó ìí<sup>n</sup> ìí<sup>n</sup>-ndo. Te nchaa ñáyiú tàcá nchaa iha dàcuaha tnúhu Xítóhó Jesucristú quidé ndèe iní ñáhă-yu xii-ndo.

17Te nchòhó ñáyiú ndècu ndihí-í ichi Xítóhó Jesucristú càhá<sup>n</sup>-í dóho-ndo sã cádá cuendá-ndó nũu ío ñáyiú quide nacuáa vá cúú ìí<sup>n</sup>nuu-ndo cundecu-ndo, chi ñáyiú-á<sup>n</sup> sánú ichi ñahá-yu ìí<sup>n</sup> ichi ñá túú vâha, chi ñá túú ìí<sup>n</sup>-ni cuu-xi tnúhu càhá<sup>n</sup>-yu ndihí tnúhu sá ñí níhí-ndó ndècu ndihí-ndo, te ñáyiú duca<sup>n</sup> xĩquide vá nihí tnáhá-gă-ndó ndihí-yu. 18Chi ñáyiú-á<sup>n</sup> ñà túú quidé-yu chiú<sup>n</sup> sá cúú-xí Xítóhó Jesucristú, chi mee-ni sã cúú-xí mèe-yu quidé-yu, te mee-ni nchàa tnúhu sá ío vii ío váha cuáhá<sup>n</sup> càhá<sup>n</sup>-yu òré cuáhá<sup>n</sup>-yu dândahú-yu nchaa ñáyiú ío yáchí sàndáá iní-xi ìí<sup>n</sup> tnúhu. 19Te nchaa ñáyiú nihí-yu tnúhu sá nchòhó sàndáá iní-ndó tnũhu Xítóhó Jesucristú, núu xíă<sup>n</sup> ío cùdíí ìní-í. Te cuení-í sá nchòhó ío váha cutnùní iní-ndó nàcuáa cada-ndo mèe-ni sá vâha, te vá cání ìní-ndó càda-ndo datná xĩquide nchaa ñáyiú ndècu ichi cuehé ichi duha. 20Te Yá Ndiöxí Yáá quidé ío váha cùu iní-ó ndècu-o ío ndĩhi cada-gá cuendá sá sàcuíhná ñà túú-gă ná cada ñaha-xi xii-ndo, te xicá<sup>n</sup> táhù-í núú Xítóhó Jesucristú sá ío na chindee chitúu ñaha-gă xii-ndo.

21Te té Timùteú té quide ndihí-í chiú<sup>n</sup> Xítóhó Jesucristú iha quide ndee iní ñáhá-dě xii-ndo, te tnàhá té Lùciú, ndihí té Jàsón, ndihí té Sosipàtér cue tée cùu ndi mee-í quidé ndèe iní ñáhá-güedě xii-ndo.

22Te tnàhá yúhú té Tèrciú té càdúha tutú-a cuendá té Păblú quidé ndèe iní ñáhà-í xii-ndo, chi ìí<sup>n</sup>-ni cùu-o ndihí Xítóhó Jesucristú.

23Te tnàhá té Găyú té dii vèhe-xi ndecu-í quidé ndèe iní ñáhá-dě xii-ndo, te diu-dé ní taxi nùu-dé vehe tàcá ñáyiú dàcuahá-yu tnúhu Xítóhó Jesucristú. Te tnàhá té Èrastú té yìndaha díhú<sup>n</sup> ñùú quidé ndèe iní ñáhá-dě xii-ndo, te tnàhá té Cuártú té ndècu ndihí-o ichi Xítóhó Jesucristú quidé ndèe iní ñáhá-dě xii-ndo.

24Te xicá<sup>n</sup> táhù-í núú Xítóhó Jesucristú sá ío na chindee chitúu ñaha-gă xii-ndo nchàa-ndo. Te duca<sup>n</sup> na cùnduu.

### Cáhá<sup>n</sup>-ó sã ío càhnu cuu Yá Ndiöxí

25Te vitna chí ná càchí-ó sã ío càhnu cuu Yá Ndiöxí, chi mee-gă cada te ío-gá cuita níhí ndéé-gă-ndó cùndecu-ndo ichi Xítóhó Jesucristú dàtná càchí tnúhu sá càhá<sup>n</sup> nàcuáa naníhí tàhú-ó, tnúhu sá dánèhé-í ñáyiú cuendá Xítóhó Jesucristú, te nchaa tnúhu-a ìí<sup>n</sup>-ni cùu-xi ndihí nchaa tnúhu sá ñí cachí Yá Ndiöxí cuu yuhu ndèe cútnàhá ní ngáva ñuyíú, te vitna ní quee túu-xi, 26chi mee Yá Ndiöxí ní dátũu-gá núú-ó vitna, te càhá<sup>n</sup>-ndí nàcuáa ní chídó tnùní cue tée ní xóo cáhá<sup>n</sup> tnúhu Yá Ndiöxí ndéé sanaha. Te duca<sup>n</sup> tnũhu sá ndúú yùhu ni cuu ta xité nuu-xi nihí ñuyíú cuáhá<sup>n</sup>, chi

## ROMANOS 16

duca<sup>n</sup> ñĩ cachí Yă Ndiöxí Yaá ndécú nchàa nduu nchaa quíú cunduu  
cuèndá sá quèndáá iní ñáhá ñăyiu xii-gá, te tñí-yu nchaa tnúhu càhá<sup>n</sup>-gá.

27 ¡Te ñ<sup>n</sup>dìi-ni Yá Ndiöxí cúú-gă Yaá ío sàá sá xìní tnùnì-xi! ¡Te nchaa-o  
chĩ ná càchí-ó să ño càhnu cuu-gá, chi ndècu ndìhi-o Xítóhó Jesucristú, te  
duca<sup>n</sup>-ni càda-o ñi caa ñi quíhí<sup>n</sup>! Te duca<sup>n</sup> na cunduu. Te ío chí cádá ndè  
iní-nă vitna.